

Liahona

A close-up photograph of a young man with dark hair, smiling broadly. He is wearing a dark blue suit jacket, a white dress shirt, and a light blue patterned tie. In the background, there are other people and some greenery, suggesting an outdoor event.

**Moa Yangfala
Oli Stap Go long
Tempol: Helpem
Olgeta blong Oli
Rere, p. 18**

**Stap lukluk long Misin blong
Mi tru long Oi Niu Ae, p. 42**

**Olsem Wanem Nao Bisop
I Save Helpem Yu blong
Sakem Sin, p. 58**

**Jisas I Talem Lavem Evriwan
—Iven Olgeta we Oli Stap
Fos, p. 68**



*"Be nomata yumi filim
se bae yumi lus long
medel blong situesen
blong yumi naoia,
God i promesem hop
we i kam long laet
blong Hem—Hem i
promesem blong
saenem rod long
fored blong yumi, mo
soemaot long yumi
rod we i go aot long
tudak."*

Presiden Dita F. Ukdof, Seken
Kaonsela long Fas Presidensi,
"Hop we I Kam long Laet
blong God," Konfrens Ripot,
Epril 2013.

Liahona, Oktoba 2013



20

OL MESEJ

- 4 **Fas Presidensi Mesej: Responsabiliti la blong Yumi Blong Go Sevem Man**
I Kam long Presiden Tomas S. Monson
- 7 **Visiting Tijing Mesej: Tabu Misin blong Jisas Kraes: Stap Olsem Krieta**

OL SPESEL STORI

- 12 **Mekem Gud Pat blong Yu**
I Kam long Elda Kwentin L. Kuk
Long wan taem we fasin blong no stap talemaot nem blong yumi i moa isi bitim bifo, i gat ol impoten prinsipol blong folem blong no stap haedem fes, be blong stap tru long fet blong yu.

LONG KOVA

Fored: Foto pikja we i kam long Kodi Bel. Long bak: Foto pikja we i kam long Kodi Bel. Insaed long kova blong fored: Foto pikja we i kam long iStockphoto/Thinkstock.

- 18 **Ol Yangfala mo Ol Kavenan blong Tempol**
I Kam long Geri mo Susan Kata
Naioia i taem blong stat rere ol pikinini blong yufala blong go insaed long tempol.

- 20 **Bigfala Misinari Raet blong Yumi**
I Kam long LaRene Pota Gaunt mo Linda Deka Lopes
Evri misinari, blong bifo o blong tedei, oli givim seves wetem hop blong mekem laet i moa gud long ol nara pipol.

- 26 **Rere blong Fesem Dei blong Faet**
I Kam long Elda Edwardo Gavaret
Ol prinsipol we oli moa simpol oli save talemaot fiuja blong yumi long medel blong ol faet blong laef.

- 30 **Mekem Wok blong Fasin blong Sevem Man i Go Hariap**
Membasip long Jos blong Lod, i minim se oli singaotem yu blong wok fulwan long wok blong Hem.

- 34 **Stap Kam wan Man blong Pis**
I Kam long Matiu D. Fliton
Gospel i jenisim hat blong wan man mo i tekem famle blong hem i kam tugeta.

OL DIPATMEN

- 8 **Notbuk blong Oktoba Konfrens: Ol tingting blong Jeneral Konfrens**
I Kam long Tina Spensa
- 9 **Stap Tijim Blong Ol Yut Oli Kam Strong: Helt long saed blong Bodi mo long saed blong Filing**
- 10 **Nius blong Jos**
- 38 **Ol Voes blong Ol Lata-dei Sent**
- 80 **Kasem Taem Yumi Mit Bakegen: Mi Swea**
I Kam long R. Val Jonson



42

**42 ?Olsem Wanem Nao Bae Mi
Stap Olsem Wan Misinari we
I Wok Gud?**

I Kam long Loren Bangeta Wael
*Mi mas faenem wan niufala
mining blong sakes.*



*Luk sapos yu
save faenem
Liahona we
oli haedem
insaed long
magasin ia.*

**46 Stap Kam Wan Misinari blong
Prijim Gospel blong Mi**

I Kam long Elda Deved A. Bedna
*Olfaef stamba samting we bae
I helpem yu blong kam wan
moa gud misinari.*

51 Jes Smael mo Talem No

I Kam long Hesel Meri Tibule
*?Olsem wanem nao mi save talem
no long presiden blong kampani?*

52 Blong Oi Yut Oli Kam Strong:

**Stap strong, Stap helti,
Stap smat**
I Kam long Elda Adrian Okoa
*?Putum sus blong yu blong ron
mo gohed blong go!*

54 Folem ol step blong hem

I Kam long Melisa Senteno
*Blong kam olsem Jisas Kraes wan i
save filim olsem hem i save ol sam-
ting long saed blong ol smosmol
samting mo paoa, be proses blong
hem I stat wetem fasfala step
blong yu.*

56 Oi Kwestin mo Ansa

*?Wanem nao mi talem long olgeta
we oli no memba we oli stap askem
se from wanem sam memba blong
Jos oli no stap laef folem ol standet
blong yumi?*

**58 ?From Wanem mo Wanem Nao
Mi Nidim Blong Konfesem long
Bisop blong Mi?**

I Kam long Elda K Skot Gro
*Fasin blong sakem sin i wan
samting blong miwan we i stap
bitwin mi mo Lod. ?From wanem
mi nidim blong toktok wetem bisop
blong mi tu?*

52



61

**61 Stap Invaetem Sevya
blong Kam Insaed**

I Kam long Elda O. Vinsen Halek
*?Sevya i stap wet blong yu invae-
tem hem i kam insaed long laef
blong yu!*

62 Wan Fres Niu Dikon

I Kam long Jen Makbraed Koet
*Benji i bin fraet tumas blong pa-
sem sakramen. ?Bae hem i save pa-
sem gud sakramen ia?*

**64 Folem rod: Blong Stap
Wet long Winta Kwota**

I kam long Jenifa Madi

**66 Oi Sent oli Stop long
Winta Kwota**

I kam long Ari Van De Graf

**67 Spesel Witnes: ?Olsem
wanem nao Jisas Kraes
i toktok long ol profet?**

I Kam long Elda D. Tod Kristofeson

68 Stap Helpem Vaelet

I kam long Salot Mae Sepad
*Vaelet i bin stap nogud long Ema
oltaem. ?From wanem Ema i mas
naes long hem?*

**70 Stap Karem Praemer i Kam
Hom: Bae Mi Serem Gospel
Wetem Evri Pikinini blong God**

72 Kamil blong Niu Yok Siti

74 Pej blong Yumi

76 Blong Oi Yang Pikinini

**81 Pikja blong Profet:
Deved O. MaKei**

Sam Tingting blong Famle Haos Naet

Magasin ia i gat ol stori mo ol aktiviti we oli save yusum long famle haos naet.

Wanem i kam afta, hem i tu tingting blong yusum.



FOTO PIKJA IKAM LONG CRAIG DIMOND

"Blong Kam Wan Misinari blong Prijim

Gospel blong Mi, pej 46: Tingting blong
toktok raon olsem wan famle long ol faef
stamba samting blong *Prijim Gospel blong
mi*. Afta traem blong praktisim olgeta prin-
sipol ia. Yu save go tru long seksen blong
Prijim Gospel blong mi tugeta mo givim
ol nara memba blong famle ol janis blong
praktis tijim ol pat blong ol lesen blong ol
misinari taem ol nara memba blong famle i
stap aktem olsem olgeta i ol investigeta. Yu
save tokbaot ol jalenj blong misinari wok
mo tingting long ol wei blong developem ol
fasin ia we Elda Deved A. Bedna I tokbaot.

"Stap strong, Stap helti, Stap smat,"

pej 52: Afta we yu gotru long toktok blong
Elda Adrian Okoa, lukluk blong planem

wan aktiviti blong mekem famle blong yu
oli save aktiv tugeta long saed blong bodi.
Yu save pleplei wan sotfala gem o wok-
baot. Mekem sua blong mekem aktiviti ia
I stret long olgeta olfala mo paoa blong
wanwan famle memba (yu save askem
ol bigfala pikinini blong helpem ol smol
pikinini blong finisim aktiviti, eksapol).
Afta long aktiviti blong yufala, tokbaot
olsem wan famle ol samting we bae i
save help long saed blong stap aktiv long
saed blong bodi. Yu save planem ol wei tu
blong gohed blong wok olsem wan famle
blong folem kaonsel blong profet blong
yumi we i stap laef blong lukaot gud long
bodi blong yumi.

LONG LANWIS BLONG YU

Liahona mo ol nara tul blong Jos oli stap long plante lanwis long www.languages_lds.org.

OL TOPIK INSAED LONG MAGASIN IA

Ol namba oli ripresentem fas pej blong stori.

Eksampl, 12, 56

Fasin blong konfes, 58

Fasin blong Man I

Agensem Yu, 42, 64, 68

Fasin blong Sakem Sin, 58

Fasin blong stap rere, 26

Fasin blong strap

swea, 80

Fasin blong toktok, 80

Fasin olsem hemia blong

Kraes, 54

Fogivnes, 58, 68

Frensip, 39, 40, 72

Helt, 9, 52

Jareti, 4, 20, 34, 68

Jisas Kraes, 7, 76

Jos Histri, 64, 66

Kriesen, 7

MaKei, Deved O., 81

Mekem man i aktiv, 4,
30, 38

Misinari wok, 20, 30, 40,
42, 46, 61, 70, 72

Ol Bisop, 58

Ol Gol, 12, 54

Ol Pikinini, 76

Ol Profet, 67

Ol Standet, 56, 80

Paeonia, 64

Pis, 34

Prijim Gospel blong Mi,

42, 46, 54

Prishud, 62, 76

Revelesen, 67

Stap Jajem Man, 56

Stap Tru mo Strong, 12,
51

Tabu Spirit, 41, 46

Tempol, 18, 34

Temtesen, 51, 80

Tok blong Waes, 9, 51, 52



I Kam long Presiden
Tomas S. Monson

RESPONSABILITI IA BLONG YUMI BLONG Go Sevem Man

Long ol Lata-Dei Sent, nid ia blong go sevem ol brata mo ol sista we, from wan spesel risen o wan nara risen, oli aot long rod blong stap fulwan insaed long Jos, i wan samting we i impoten tumas long taem we i no save finis. ?Yumi save sam pipol olsem, we long wan taem, oli bin akseptem gospel? Sapos yes, nao, ?wanem nao responsabiliti blong yumi blong go sevem olgeta?

Tingting long olgeta we oli lus long medel blong olfala, olgeta we oli wide mo olgeta we oli sik. Plante taem tumas, yumi faenem olgeta oli stap long ples we i no gat man long hem we i drae, we oli stap long wan kona, mo samting ia, oli singaotem fasin blong stap yuhan. Taem yangfala taem i pas finis, taem helt i stap go daon, taem paoa i nomo strong, taem laet blong hop i nomo saen strong, i taem nao blong han we i save help, mo hat we i save gat lav mo sore i kam givhan mo sapotem olgeta.

I tru, i gat ol narafala we oli nidim blong oli sevem olgeta tu. Sam oli traehad wetem sin, mo sam narawan oli stap go olbaot from se oli fraet, o oli les, o oli no save samting. Nomata wanem risen i stap, oli mekem olgeta oli stap long kona blong olgeta, oli nomo kam long Jos. Mo bae oli stap lus olsem kasem taem we, insaed long yumi—ol aktiv memba blong Jos—wan filing blong go help mo sevem man i wekap.

Wan blong Soem Rod

Samtaem i pas, mi bin kasem wan leta we i kam long wan man we i bin aot long Jos. Hem i stap olsem eksampol blong plante memba blong yumi. Afta we hem i tokbaot olsem wanem hem i kam blong go inaktiv (nomo kam long Jos), hem i raetem:

“Mi bin gat plante samting, mo naoia mi gat smol samting nomo i stap. Mi no hapi mo mi filim olsem se mi no mekem wan gud samting nating long saed blong evri samting. Gospel i neva aot long hat blong mi, nomata hem i no

pat blong laef blong mi. Mi askem ol prea blong yufala.

“Plis, no fogetem mifala we mifala i stap aotsaed ia—ol Lata-Dei Sent we oli lus. Mi save weaples Jos i stap long hem, be samtaem, mi ting se mi nidim wan narawan blong i soemaot rod long mi, i leftemap tingting blong mi, i tekemaot fraet blong mi, mo i talem testemoni blong hem long mi.”

Taem mi bin stap ridim leta ia, ol tingting blong mi oli tingbaot wan visit we mi bin mekem long wan bigfala art eksebisen blong wol—long Miusium ia we oli save gud long hem, Viktoria mo Albet Miusium, long London, Inglaterra. Insaed long wan frem, i gat wan Naesfala painting we Josef Malod Willem Tena i pentem long 1831. Painting ia i soem ol blak klaod we oli hevi, mo solwota we i raf tumas we i minim se i gat denja mo ded. Wan laet we i kam long wan sip we i lusum rod i saen longwe long solwota. Long fored blong painting, i gat wan bigfala laef-bot we ol wef we oli kam brok i saksakem olbaot. Ol man oli pul strong long saed blong laefbot ia taem i stap draon long strong raf solwota. Long soa, i gat wan waef mo tu pikinini i stanap, oli wetwet long ren mo win i blo strong long olgeta. Oli wari mo lukluk i go long solwota. Long maen blong mi, mi katemsot nem blong painting ia. Long mi, hem i kam *Go Sevem Man*.¹

Long medel blong ol strong win blong laef, denja i stap wet i stap. Ol man mo ol woman, ol boe mo ol gel, oli faenem se oli lus mo oli stap fesem fasin we bae oli prapa spolem olgeta. ?Huia nao bae i stiarem ol laefbot ia, i livim i stap biaen ol gudfala samting blong hom mo livim famle, mo i go sevem man?

Wok blong yumi i posibol blong yumi mekem. Yumi stap mekem wok blong Lod; yumi gat raet long help blong Hem.

Long taem blong seves blong Masta, Hem i singaotem ol man blong pulum fis long Galili, talem long olgeta blong



oli livim ol net blong olgeta i stap mo folem Hem: "Bambae mi mekem yufala i kam ol man blong pulum man."² Bae yumi joenem ol laen blong ol man blong pulum ol man mo ol woman, blong mekem se bae yumi givhan long wanem we yumi save givhan long hem.

Diuti blong yumi, i blong go aot blong sevem olgeta we oli aot long sefti blong kam long Jos, blong mekem se yumi save tekem olgeta oli kam joenem lafet long tebol blong Lod mo kakae long toktok blong Hem, blong stap glad long kampani blong Spirit blong Hem, mo blong "oli no moa stap olsem we [oli] ol strenja, no [oli] man blong nrafala ples. Naoia [oli] gat raet insaed long ples blong God, olsem ol nrafala man blong God nomo, [Oli] insaed long famle blong God finis."³

Prinsipol blong Lav

Mi bin faenem se i gat tufala stamba risen we i stap blong wan i kambak long Jos, mo blong hem i jenism ol fasin blong hem, ol samting we hem i stap mekem oltaem, mo ol akseni blong hem. Faswan, wanwan

man o woman i kambak from se wan i bin soem hem ol plante defren samting we hem i save mekem, mo i bin helpem hem blong mekem i kamtru. Man o woman ia we i no aktiv, i no save stap wetem samting we i nogud tumas taem oli luk se oli save kasem samting we i gud evriwan.

Seken, ol narawan oli kambak from se olgeta we oli lavem, o from "ol nrafala man blong God" oli bin folem toktok blong Sevya, mo oli bin lavem neiba blong olgeta olsem we oli lavem olgetawan bakegen,⁴ mo oli bin helpem ol nrafalawan blong mekem ol drim blong olgeta i hapen, mo ol samting we oli wantem long laef i kamtru.

Bigfala poen we i mekem samting i defren long rod ia, i bin—mo bae i go-hed blong stap—prinsipol ia blong lav.

Long tru mining blong hem, olgeta pipol ia we oli stanap we oli lus long strong win blong peinting blong Tena, oli olsem plante lesaktiv memba blong yumi, we oli stap wet se olgeta we oli stiarem ol laefbot oli go sevem olgeta. Hat blong olgeta i singaot from help. Ol mama mo ol papa oli prea from ol boe mo gel blong olgeta. Ol waef oli askem long heven blong heven i tajem hasban blong olgeta. Samtaem, ol pikinini oli prea from papa mo mama blong olgeta.

Hem i prea blong mi, se bae yumi wantem blong go sevem hem we i lesaktiv mo tekem olgeta oli kambak long glad blong gospel blong Jisas Kraes, blong oli save gat raet, wetem yumi, long evri samting we ful felosip long Jos i gat blong givim.

Bae yumi go aot blong sevem wan we i lus we i stap raon long yumi: olgeta we i olfala, olgeta we oli wido, olgeta we oli sik, olgeta we oli handikap, olgeta we oli lesaktiv, mo olgeta we oli no stap obei long ol komamen. Bae yumi stretem han blong yumi i go long olgeta; han ia we bae i help mo hat ia we i save lave mo sore. Taem yumi mekem olsem, bae yumi tekem glad i go long hat blong olgeta, mo bae yumi filim bigfala gud tingting we i kam long yumi taem yumi stap helpem wan narawan long rod ia we i go long laef we i no save finis. ■

OL NOT

1. Ful taetol blong peinting, hem i *Life-Boat and Manby Apparatus Going Off to a Stranded Vessel Making Signal (Blue Lights) of Distress*.

2. Matiu 4:19.

3. Efesas 2:19.

4. Luk long Matiu 22:39.

YUSUM MESEJ IA BLONG TIJ

Tingting blong askem ol pipol we yu stap visitim sapos oli save eniwan we i bin stap traehad blong kam long Jos. Yu save jusum wan man o woman, mo toktok raon long ol wei blong soemaot lav, olsem blong invaetem hem blong tekpat long wan famle haos naet, o blong kam kakae wetem yu.

Presen we I Jen

I Kam long Josi S. Kilpak

Mi bin mekem plante rong joes taem mi bin stap long hae skul. Ol joes ia, oli lidim mi long ol risal we i nogud mo mi no hapi; mo mi bin disaed blong yusum skul holidei blong stat blong mekem ol jenis. Taem skul i stat bakegen, mi bin kakae lanj long wan batrum, o wan ples we i emti blong mekem se mi mas ronwe long ol nogud rilesensip we oli stap wet blong welkamem mi bakegen.

Mi neva filim miwan olsem long tetaem ia.

Afta nao, God i bin givim mi wan presen: Hem i sendem

Jen i kam. Gel ia i neva jajem mi from ol mistek blong mi, be, hem i stap leftemap tingting blong mi blong gohed long stret daerekken. Save ia se bae hem i stap long skul i bin helpem mi blong gohed blong ridim ol skripja blong mi mo fidim testimoni blong mi. Taem we taem blong graduesen i kam, mi bin pruvum miwan finis se mi bin putum ful tingting blong mi jenis.

Samtaem, mi stap askem miwan se bae mi stap wea tedei sapos Jen i no bin kam long mi. ?Bae mi save holemtaet strong ol prinsipol blong mi sapos hem i no bin stap? Laki nomo, bae mi neva save from se hem i bin stap ia wetem ful hat blong hem, i rere mo i wantem helpem mi.

Man we i raet i stap long Yuta, YSA.

OL PIKININI

Oi Wei blong Sevem Man

Presiden Tomas S. Monson i tijim se yumi mas go aot long ol narafalawan; mo hemia i tekem tu olgeta we oli olfala, we oli wido, we oli sik, we oli lesaktiv, mo

olgeta we oli nidim sam moa help. Lukluk long ol pikja ia andanit mo raonem olgeta se oli soemaot wan samting we yu save mekem blong helpem ol narafalawan.



Long ol laen we oli stap daon ia, raetemdaon sam wei we yu save helpem ol narawan. Yu save yusum ol pikja blong kasem sam tingting.

Wetem prea stadi long toktok ia mo lukaot blong save wanem nao blong serem wetem ol sista we yu visitim. ?Olsem wanem nao blong stap andastanem laef mo misin blong Sevya i bildimap fet blong yu long Hem mo i blesem olgeta we yu stap lukaot gud long olgeta? Blong moa infomesen, go long reliefsociety.lds.org

Tabu Misin blong Jisas Kraes: Stap Olsem Krieta

Hemia i faswan long wan longfala laen blong ol Visiting Tijing Mesej we bae i tokbaot ol defren saed blong misin blong Sevya.

Jisas Kraes “i bin kriitem ol heven mo wol” (3 Nifae 9:15). Hem i bin mekem hemia tru long paoa blong prishud, folem daereksem blong Papa blong yumi long Heven (luk long Moses 1:33).

Presiden Tomas S. Monson i talem: “Yumi mas talem tangkyu tumas se wan waes Krieta i mekem wan wol, mo i putum yumi long ples ia . . . blong yumi save gotru long wan taem blong tes, wan janis blong yumi pruvum yumiwan blong save kwalifae from evri samting we God i bin rere blong yumi kasem.”¹ Taem yumi yusum fridom blong joes blong yumi blong obei ol komanmen blong God mo sakem sin, yumi kam klin inaf blong gobak stap wetem Hem.

Long saed blong Kriesen, Presiden Dita F. Ukdof, Seken Kaonsela long Fas Presidensi i talem:

“!Yumi ia nao, yumi risen from wanem Hem i bin kriitem yunives! . . .

“Hemia defren tingting blong man: taem yumi komperem man long God, man i nating nomo; be yet, yumi evri



samtong long God.”² Taem yumi save se Jisas Kraes i bin kriitem wol ia blong yumi from se yumi minim evri samting long Papa long Heven, i save helpem yumi blong gat moa lav long Tufala.

I Kamaot long Ol Skripja

Jon 1:3; Hibrus 1:1–2; Mosaea 3:8; Moses 1:30–33, 35–39; Abraham 3:24–25

OL NOT

1. Tomas S. Monson, “Resis blong Laef,” *Konfrens Ripot*, April 2012, 56.
2. Dita F. Ukdof, “Yu Impoten long Hem,” *Konfrens Ripot*, Okt. 2011, 12.
3. Josef Smit insaed long *Daughters in My Kingdom: The History and Work of Relief Society* (2011), 171.
4. Luk long *Daughters in My Kingdom*, 171.
5. Luk long Joseph Smith, insaed long *Daughters in My Kingdom*, 169.

WANEM MI SAVE MEKEM?

1. ?Olsem wanem nao we taem yumi luklukgud blong andastanem tabu fasin blong yumi i mekem lav we yumi gat long Sevya i kam antap moa?

2. ?Olsem wanem yumi soem tangkyu blong yumi from ol kriesen blong God?



I Kamaot long Histri blong Yumi

Oli bin kriitem yumi folem pikja blong God (luk long Moses 2:26–27), mo yumi gat ol tabu paoa we yumi gat yet blong kasem. Profet Josef Smit i askem ol sista long Rilif Sosaeti blong oli “laef long wan mak we i inaf long ol spesel janis we oli gat.”³ Wetem gudfala toktok ia olsem wan fandesen, oli bin tijim ol sista insaed long Jos blong Jisas Kraes blong Ol Lata-dei Sent blong laef long mak blong ol tabu paoa ia we oli save kasem yet taem oli stap mekem ol stamba tingting we God i gat long olgeta i hapan. “Taem oli kam blong andastanem huia stret olgeta—ol gel blong God wetem wan paoa, we i stap insaed long olgeta finis, blong lavem mo tijim man—nao bae oli kasem ful paoa blong olgeta olsem ol tabu woman.”⁴

“Oli putum yufala long wan situesen we yufala i save mekem ol samting folem ol sore ia we God i bin putum insaed long hat blong yufala,” Profet Josef Smit i talem. “Sapos yufala i laef gud inaf folem ol prinsipol ia, !bae ol samting oli bigwan mo gud tumas!—sapos yufala i laef go kasem ol spesel janis blong yufala, bae oli no save blokem ol enjel blong kam ol patna blong yufala.”⁵

SAMFALA TINGTING BLONG JENERAL KONFRENS

I Kam long Tina Spensa



"?Traem Talem se Huia I Stap Kam Kakae Tedei long Naet?"

Fiftin dei bifo stat blong wanwan jeneral konfrens, famle blong mifala i hangem wan notis we i anaonsem stat blong "?Traem Talem se Huia I Stap Kam Kakae Tedei long Naet?" Afta, mifala i ademap ol las pikja blong ol profet, sia mo reveleta we i stap long ol las konfrens edisen blong ol magasin blong Jos.

Mi rere fastaem taem mi lukaotem ol samting abaot profet we bae mifala i welkamem long naet ia. Samtaem, mi faenem ol samting raon long haos we bae i ripresentem sam samting we mi bin faenemaot, mo mi putum olgeta long wan plet. Long taem blong kakae long naet, taem mi stap talem ol stori abaot wanwan samting ia, evriwan i traem blong faenemaot se huia nao man ia. Sam narafala taem, mi talem wan o tu stori we profet i bin serem long taem blong las jeneral konfrens.

Mi sapraes tumas long ol samting we ol pikinini blong mi oli tingbaot abaot ol profet mo aposol blong yumi we yumi lavem tumas; mo tu, mi save se simpol gem ia i mekem lav mo save blong mi abaot ol bigfala man ia i kam antap.

Kopi blong Mi blong Konfrens

Taem Elda Nil L. Andesen blong Kworam blong Olgeta Twelef Apostol mo waef blong hem, Keti, i bin visitim stek konfrens blong mifala, Sista Andesen i bin serem wan stori wetem mifala. Hem i talem se taem oli bin stap laef long Franis, hem i bin mekem ol fotokopi blong ol toktok blong konfrens blong wanwan pikinini blong olgeta—wetem ol smol yangfalan tu. Hem i sek taem hem i faenemaot praes blong ol fotokopi, we i sas tumas. Afta, tingting i kam long maen blong hem: ?Hamas nao i imponent long yu mo famle blong yu blong gat ol toktok blong ol profet?"

Stori ia i tajem mi, mo mi mekemsua se evriwan long famle blong mifala i gat kopi blong hemwan blong ol toktok blong konfrens. Ol gel blong mitufala i glad tumas. Mifala i yusum olgeta long famle haos naet mo long taem blong skripja stadi. Mi lavem blong luk wan gel blong mi i ridim ol toktok ia hemwan mo i stap makem olgeta wetem haelaeta. Wan nara gel, we i jes baptaes, i plis long mi blong ridim ol toktok wetem hem, mitufala nomo.

Konfrens Jalenj

Olsem pat blong lesen blong mi long Rilif Sosaeti, mi bin givim jalenj long wanwan sista blong luklukbak long ol toktok blong las konfrens; sam sista oli ridim bakegen ol toktok ia, samfala oli lukluk bakegen olgeta toktok ia long Intanet. Samfala sista oli talemaot olsem wanem oli bin filim se oli rere moa from konfrens we i stap kam. ■

Woman we i raet ia, i stap long Washington, YSA.

HELT LONG SAED BLONG BODI MO LONG SAED BLONG FILING

Long sam yut, taem oli mestem blong yusum ol prinsipol blong stap fit long saed blong bodi, i save stap olsem wan samting we i blokem olgeta blong gat ol fren mo bildimap tras long olgetawan. Antap long hemia, helt long saed blong bodi, mo long saed blong filing oli impoten tumas, be plante taem, oli ol poen we oli no lukluk long olgeta tumas blong rere blong go long wan misin. Long ol pej 52–53 blong magasin ia, Elda Adrian Okoa blong olgeta Seventi i tokbaot olsem wanem we taem yumi tekem kea long bodi blong yumi i save mekem se yumi gat gud helt long saed blong bodi mo filing. Hem i stap mekem yumi tingbaot se yumi mas mekem spot mo yumi mas obei long Tok blong Waes (luk long D&C 89) blong mekem yumi moa helti mo moa hapi. Taem yufala i stap helpem ol pikinini blong yufala blong lanem mo yusum ol prinsipol blong gud helt long saed blong bodi mo filing, bae oli save kam antap long fasin blong olgeta blong trastem olgetawan mo rere blong givim wan fiju seves.

Elda Okoa i talem: "Taem yu tekem kea long bodi blong yu, i blesem maen blong yu mo i helpem yu blong tingbaot se yu wan pikinini blong God, mo yu save trastem yuwan mo stap hapi. Laef blong yumi long saed blong filing, long saed blong bodi, mo long saed blong spirit oli joen tugeta."

Sam Tingting blong Tijim Ol Yut

- Ridim stori blong Elda Okoa tugeta mo developem wan famle spot plan wetem ol stret, ril gol blong stap fit.
- Wetem ol yangfala pikinini blong yu, ridim pat ia long saed blong helt long saed blong bodi mo long saed blong filing we i stap long smol buk *Blong Ol Yut Oli Kam Strong* (ol pej 25–27). Toktok raon long wanem nao i rili minim blong stap helti long saed blong filing.
- Singsing "Though Deepening Trials" (*Hymns*, no. 122) tugeta mo toktok raon long wanem nao laef bakegen long ded i tijim yumi long saed blong olsem wanem bodi blong yumi blong mit mo bun i impoten tumas.
- Stadi long ol skripja we oli listimdaon wetem stori ia mo toktok raon long wanem oli stap tijim abaot helt long saed blong bodi mo filing.

Sam Tingting blong Tijim Ol Pikinini

- Soem wan pikja blong tempol long pikinini blong yu. Toktok raon long wanem nao i minim taem Aposol Pol i tijim se bodi blong yumi i "haos blong Tabu Spirit" (Fas Korin 6:19) mo olsem wanem save ia i save helpem yumi blong tekem kea long bodi mo tingting blong yumi.



OL SKRIPJA WE I GO WETEM STORI

- Ol Proverb 16:32
Daniel 1:3–20
Luk 21:19
Rom 12:1–2
Fas Korin 6:19–20
Fas Tesalonaeka 5:14
Alma 38:12; 53:20
Luk long Doctrine and Covenants 88:15; 89

- Mekem wan lis blong ol gudfala pleiplei aktiviti we pikinini blong yu i wantem mekem olsem wan famle. Afta, kriitem wan plan long olsem wanem blong mekem ol aktiviti ia oli pat blong wan famle laef.
- Toktok raon long sam wei blong andastanem mo lukaotem ol filing, we i tekem tu kros mo fasin blong harem nogud. Singsing "If You're Happy" (*Children's Songbook*, 266), "Mi Traem blong Kam Olsem Jisas" (*Liahona*, April 2012, 64), o wan nara singsing abaot ol filing mo fasin blong mekem ol gudfala joes. ■

OL NIUS BLONG JOS

Visitim news.lds.orgnews.lds.org blong kasem moa nius mo moa samting we i stap hapan long Jos.

Ol Memba I Save Askem Prishud Laen blong Atoriti

I Kam long Raean Mogeneg

Jos Nius

Jos i save givim naoia infomesen blong prishud laen blong atoriti olsem wan seves long ol memba taem oli askem. Prishud laen blong atoriti i wan oda blong wok blong ol odinesen we yu save folem i gobak long taem we Jos i bin stat long hem mo i gobak stret long Sevya.

Nomata we wan man we i kasem prishud we i stap long ofis blong Seventi i save stap insaed long wan prishud laen blong atoriti blong wan memba, i nogat wan laen we i defren bakegen we i blong ofis blong Seventi nomo. Mo tu, prishud laen blong atoriti blong ol bisop mo ol petriak, oli folem i gobak tru long hae pris odinesen blong olgeta.

Oli save askem long Jos infomesen abaoi ol Melkesedek Prishud laen blong atoriti nomo; Ol laen blong Aronik Prishud, oli no givim. Ol memba oli save askem infomesen blong Melkesedek laen blong atoriti blong olgetawan nomo, blong wan pikinini we i stap long hom, o blong wan yang misinari we i stap long seves long misin. Ol infomesen ia oli no ol ofisol rekod blong Jos.

Sapos yu wantem blong askem prishud laen blong atoriti blong yu, putum ful nem blong yu, deit we yu bon, membasip rekod namba (we i stap long wan tempol rekomen o askem long wod klak blong yu), nem blong man we i bin odenem yu long ofis blong elda o hae pris (sapos yu save), mo adres we bae oli sendem i kam long yu mo telefon namba blong yu o imel adres blong yu.

Sendem rikwes blong yu i go long:

Priesthood Line of Authority

Global Service Center

120 North 200 West

Salt Lake City, Utah 84103-1514, USA

Fax: 1-801-240-6816

Telephone: 1-800-453-3860, extension 2-3500

Imel: Sendem wan imel i go long

lineofauthority@ldschurch.org wetem "PLA" olsem taetol. Bae oli sendem wan fom blong yu fulumap i kambak, mo afta yu sendem i gobak (bae i gat wan otomatik ansa long eni mesej we taetol hem i "PLA"). ■



*Prishud laen
blong atoriti
blong olgeta
we oli stap me-
kem wok blong
ol odinens, oli
save folem i
gobak long
Sevya.*



Oi man blong danis wetem fan, oli mekem namba "20" long wan so we i bin tekemples blong tingbaot namba 20 aniveseri blong Jos long Mongolia.

Mongolia I Selebretem 20 Yia blong Jos

Long Mandei 15 Epril 2013, moa bitim 300 Jos memba i bin kam tugeta long Saisan Hil long Ulanbatar, Mongolia, blong selebretem nambatwante aniveseri blong Jos long kantri ia. Wan kwaea blong 50 memba i bin singsing, mo grup i bin lisin long wan rekoding blong Elda Nil A. Makswel (1926–2004) taem we hem i bin stap dediketem Mongolia blong oli save stat prijim gospel long kantri ia long 1993.

Elda Tai Kwok Yuen, we long wan taem, i bin memba blong Esia Eria Presidensi i bin kam wetem Elda Makswel long Mongolia long 1993, i bin luk olsem wanem "ol han blong Lod i no bin stop blong muv long pat ia blong plantesen blong hem."

Plante defren aktiviti truaot long wik ia i bin makem aniveseri ia. Wan kam tugeta blong ol misinari i bin tekem 200 riten misinari i kam tugeta. Moa bitim 1,000 misinari blong Mongolia we oli bin wok olsem fultaem misinari—kolosap 1 aot long evri ten memba long Mongolia. I bin gat ol seves blong baptaes truaot Mongolia long Fraedei naet; 24 pipol i bin kasem baptaes long dei ia. Meri N. Kuk, Yang Woman jeneral presiden we i jes rilis nomo, i bin toktok long wan divosen blong ol Yang Woman, mo wan famle histri open haos we i soem wan vidio we i abaot niu Famle

Tri Projek. Wan kalja naet we i soem ol rij kalja mo talen blong plante Jos memba blong Mongolia.

Oi Lata-dei Sent long Haiti I Selebretem Aniveseri, Oli Help blong Planem Ol Tri

Long namba 1 Mei 2013, ol memba blong Jos long Haiti oli bin tekem pat long wan bigfala projek blong planem tri raon long kantri. Wan bigfala namba blong ol smosmol plant, oli bin plantem long fas dei blong projek, mo plante moa bae i folem. Taem projek ia i finis, bae samples 400,000 niufala tri i gro long Haiti, mo i gat ol laman, aranis, kokonas, popo, mo ok tri.

Jos i pem ol tri ia olsem pat blong go-hed blong sapotem Haiti afta we etkwek i bin spolem olgeta. Projek ia i givim janis tu long ol memba blong mekem wan seves projek blong selebretem 30 aniveseri blong Jos long aelan nesen ia. 30 yia i pas, Presiden Tomas S. Monson, afta we i kam wan memba blong Kworom blong Olgeta Twelef Aposol, i bin visitim Haiti mo dediketem graon ia blong oli prijim gospel we i kambak.

Elda Nil L. Andesen blong Kworom blong Olgeta Twelef Aposol i bin stap long Haiti long taem blong selebresen ia mo prisaed long seremoni ia blong presentem

ston ia we oli raet long hem we i makem stat blong Jos long Haiti.

Jos I Donetem Wan Milian Paon blong Kakae blong Stap Fidim Amerika

Long Mei 2013, Jos tru long yumaniterian sapot blong hem, ol Lata-dei Sent ol bin donetem moa bitim wan milian paon blong kakae blong stap fidim Amerika, long bigfala oganaesesen blong fidim ol man long Yunaeted Stet we i no wan bisnis. Long doneSEN ia i gat insaed ol tin kakae olsem ol frut, vejetebol, mo ol bin, we bae oli givim-aot i go long ol famle we oli stap long nid tru long ol komuniti ples blong storem kakae mo ol komuniti haos raon long Yunaeted Stet.

Bob Aiken, presiden mo jif eksekutiv ofisa blong Fidim Amerika, i bin talem se doneSEN ia bae i inaf blong kukum samples 625,000 plet kakae.

Oi misinari mo ol memba long Haiti we oli planem ol tri long ol hil antap long kaptel siti blong Poro Prins, we i stap biaen long foto ia.



FOTO IKAM LONG LESON SWENSEN



I Kam long Elda
Kwentin L. Kuk
Blong Kworom blong
Olgeta Twelef Aposol

Pante taem, Presiden Deved O. MaKei (1873–1970) i stap storian long wan tru stori we i bin hapen taem mi stap long misin long Skotlan. Hem i stap filim se hem i wantem gobak hom afta we hem i stap long misin blong sot taem, mo hem i bin spendedem sam aoa blong lukluk ples kolosap long Steling Kasel. Taem we hem mo kompanion blong hem i kambak long wokbaot blong tufala blong visitim kasel ia, oli bin pas long fored blong wan biling we oli raetem wan toktok long ston we i stap antap long doa, mo toktok ia i blong Sekspia we i stap talem: “Nomata Huia Yu, Mekem Gud Pat Blong Yu.”

Taem hem i tokbaot eksperiens ia bakegen, Presiden MaKei i bin eksplenem: “Mi talem long miwan, o Spirit we i stap insaed long mi: ‘Yu wan memba blong Jos blong Jisas Kraes blong Ol Lata-dei Sent. Moa long



*Stap stret mo gud. Bildimap wan famle.
Faenem wan stret wei blong givim wanem
we wan i nidim. Givim seves olsem
we oli singaotem yu blong mekem.
Rere blong mitim God.*



FOTO BLONG ELDA KWENTIN L KUK WE I KAM LONG KREG DAEMON; FOTO PIKAI I KAM LONG SKOT DEVES

hemia, yu yu wan ripresentativ blong Lod Jisas Kraes. Yu bin akseptem responsabiliti olsem wan ripresentativ blong Jos.¹ Afta nao, mi tingting long wanem mitufala i bin mekem long aftenun ia. Mifala i bin go lukluk ples, mifala i bin kasem save abao histri blong ples, hem i tru, mo mi glad tumas long hemia. . . . Be, hemia i no misinari wok. . . . Mi bin akseptem mesej we i bin kam long mi long ston ia, mo stat long taem ia, mitufala i bin traem blong mekem pat blong mitufala olsem ol misinari long Skotlan.¹

Mesej ia i bin impoten tumas mo i bin tajem gud laef blong Presiden MaKei, mekem se hem i bin yusum blong givim insperesen long hem long ful laef blong hem. Hem i bin mekem strong tingting se nomata wanem responsabiliti bae hem i gat, bae hem i mekem gud long hem.

No Mekem Samting Olsem se Yu Wan Narafala Man

Wetem lukluk i stap long ol plante gud-fala samting we yufala, yufala we i yangfala jeneresen blong Jos i gat, ?wanem nao wari blong mi long saed blong fiuja blong yufala? ?Wanem kaonsel nao mi save givim long yufala? Faswan, bae man i pusum yu blong yu mekem samting olsem se yu yu wan narafala man—blong yu haedem fes blong yu—mo kam wan we i no yu, mo wan we yu no wantem kam olsem.

Eli long histri blong Jos, Profet Josef, Ema mo twin pikinini blong tufala we tufala i gat 11 manis, Josef mo Julia, oli bin stap long Haeram, Ohaeo, long Jonson fam. Tufala pikinini i bin sik long sik misel. Josef mo smol boe blong hem, tufala i bin silip long timba bed kolosap long doa.

Long naet, wan grup blong ol man we oli pentem fes blong olgeta i blak, oli pusum doa mo oli pulum Profet i go aotsaed, mo oli kilim hem mo oli kapsaetem kolta long hem mo Sidni Rigdon.

Pat we i moa nogud long trabol taem ia, i we smol Josef i bin stap long kolkol blong naet taem oli bin pulum papa blong hem i

go, mo hem i kasem wan nogud flu. Olsem risal, hem i bin ded sam dei afta.²

Olgeta we oli bin tekpat long taem blong kilimded Profet Josef from bilif blong hem, mo olgeta we oli kilimded brata blong hem, Haeram, oli bin pentem ol fes blong olgeta blong traem haedem huia olgeta.³

Tedei, fasin blong no stap talemaot nem blong yumi i moa isi bitim bifo, be long narasaed, i gat ol impoten prinsipol blong folem blong no stap haedem fes, be blong stap “tru long fet we sam man oli bin ded from.”⁴



Elda L. Tom Peri i bin mekem gud pat blong hem taem hem i bin stap long Japan.

Wan long ol bigfala proteksen agensem fasin blong mekem ol nogud joes, i blong no haedem nem blong yu. Sapos yu luk se yu wantem olsem, plis, yu mas save se hem i wan saen blong bigfala denja, mo hem i wan tul blong enemi blong pusum yu blong mekem wan samting we bae yu no mekem sapos man i save nem blong yu.

Hem i wan praktis tedei blong wan i haedem nem blong hem blong raetem ol toktok we i talem nogud man, i daonem man, hemia long intanet. Sam oli singaotem *hot toktok*.

Aposol Pol i bin raetem:

“Yufala i no krangke: rabis toktok i save spolem fasin blong man.

“Yufala i mas stretem tingting blong yufala, mo lego ol sin blong yufala. I gat sam long yufala we oli no save God nating” (Fas Korin 15:33–34).

Hem i klia se rabis toktok i no wan kwestin blong nogud fasin nomo, be sapos olgeta we oli ol Lata-Dei Sent oli stap praktisim, bae oli spolem olgeta we oli no save God nating, o oli no gat wan testimoni abao Sevya.

Eni fasin blong yusum Intanet blong mekem man i fraet, spolem nem blong wan man, o putum man long nogud ples, i rong. Wanem yumi stap luk long sosaeti i we, taem ol pipol oli stap blokem fes o nem blong olgeta, bae oli mekem ol kaen fasin ia we i spolem gud olgeta long fes blong pablik. Hem i agensem tu ol stamba prinsipol we Sevya i bin tijim.

Sevya i bin eksplenem se Hem i no bin kam blong panism wol be blong sevem wol. Afta, hem i tokbaot wanem ia i panismen:

“Delaet i kam long wol finis, be ol man oli no laekem delaet, oli laekem tudak from we fasin blong olgeta i no stret.”

“Man we i stap mekem fasin we i no stret, hem i no laekem delaet, i agens long hem, mo i no save kam long delaet, from we delaet ya bambae i soemaot ol fasin blong hem.

“Be man we i stap mekem ol stret fasin nomo, hem i save kam long delaet, blong delaet ya i soemaot we ol fasin we hem i stap mekem, be God i bin givhan long hem blong i mekem.” (Jon 3:19–21; luk tu long ol ves 17–18).

Man we i stret mo gud i no nidim blong blokem fes blong haedem nem.

Mekem Samting Folem Ol Tru Bilif blong Yu

Mekem samting i folet ol tru bilif blong yu, taem yu spendem taem long ol samting we bae i bildimap mo developem fasin blong yu mo bae i helpem yu blong kam moa olsem Kraes. Mi hop se i no gat wan long yufala i lukluk se fas samting long laef i, “taem blong fani mo pleplei,” be bae i luk se i “wan taem blong rere blong mitim God” (Alma 34:32).

Wan gudfala eksampol blong mekem gud pat blong yumi mo yusum gud taem long stret fasin, i kamaot long wan samting we i bin hapen long laef blong Elda L. Tom Peri taem we, olsem wan Marin soldia, hem i bin stap long ami fos blong Yunaeted Stet long Japan long en blong Wol Wo 2. Elda Peri i bin serem hemia taem hem i bin talem spesel witnes blong hem abao Sevya, we oli stap soem long senta blong ol visita.

“Mi bin pat blong fas grup blong ol Marin we i go soa long Japan afta long saening blong pis triti afta long Wol Wo 2. Taem mifala i go insaed long siti blong Nagasaki we



*Wan long ol bigfala
proteksen agensem
fasin blong mekem ol
nogud joes, i blong no
haedem nem blong yu.*

i smas gud, hem i bin wan long ol eksperiens long laef blong mi we i sore tumas. Wan bigfala pat blong siti i bin smas fulwan. Sam long ol ded oli no berem olgeta yet. Olsem tim blong wok, mifala i statem mekem ol hedkwota mo bin go long wok.

“Situesen ia i no bin gud nating, mo sam long mifala i bin wantem blong help moa. Mifala i bin go long hedkwota blong mifala mo askem raet ia blong helpem bildimbak ol Kristin Jos. From nomo gavman i bin stopem long taem blong wo, ol jos ia i bin stop blong wok. Sam bilding i bin smas gud evriwan. Wan grup blong mifala i bin wilng blong fiksim mo plastarembak ol japel ia long taem we mifala i no wok blong mekem se mifala i save gat bakegen ol Kristin seves.

“. . . Mifala i bin faenem ol man blong wok blong God we oli no bin save wok long taem blong ol yia blong wo, mo leftemap tingting long olgeta blong gobak long ol pulpit blong olgeta. Mifala i bin gat wan gudfala eksperiens wetem ol pipol ia taem oli kasem bakegen eksperiens blong fridom blong praktisim Kristin bilif blong olgeta.

“Wan samting i bin hapen taem mifala i stap livim Nagasaki blong gobak hom we oltaem mi stap tingbaot. Taem mifala i stap go insaed long tren we bae i tekem mifala i go long ol sip blong tekembak mifala i go hom, i bin gat plante nara Marin we oli bin jikim mifala. Oli bin gat ol gel fren blong olgeta we oli stap talem tata long olgeta. Oli bin laf long mifala mo talem se mifala i bin mestem ol gudfala taem, taem mifala i bin stap long Japan mo mifala i bin westem taem blong mifala blong wok mo plastarem ol wol.

“Taem oli stap gohed blong jikim mifala, antap lelebet kolosap long stesen blong tren, kolosap 200 long ol impoten Kristin Japanis we mifala i bin fiksim ol jos blong olgeta i stap singsing “Go Fored Ol Kristin Soldia.” Oli bin kamdaon mo givim long mifala plante presen. Afta oli stanap laen folem rod blong tren, mo taem tren i stat blong folem rod, mifala i putumaot ol han blong mifala i go aotsaed mo tajem ol fingga blong olgeta taem mifala i go. I nomo gat toktok; mifala i sore tumas long olgeta. Be mifala i glad tumas se mifala i save givim smol help long wan wei blong bildimbak Kristin laef long wan nesen afta long wo.⁵

Plis tingting hevi mo tekem step blong jusum olsem wanem bae yu yusum taem blong yu. Olsem we yufala i save luk long eksampol insaed long vidio blong Elda Peri, mi no stap tokbaot se bae yufala i putum relijin blong yufala i flasem klos blong yufala, o blong yufala i priten blong

stap fetful. Hemia i save mekem yufala i sem, mo mekem sem long Jos. Mi stap tokbaot blong yufala i mas kam huia yufala i mas kam.

Setem Oi Gol we Oli Stret

Nambatri kaonsel blong mi i abaot sam long ol gol we yufala i mas tingting long olgeta. Long kolosap semtaem we Elda Peri i bin stap long Japan wetem ol Marin, Presiden Boed K. Peka i bin stap long Japan wetem Eafos long en blong Wol Wo 2.



***Presiden Boed K. Peka i bin kasem
blesing blong setem ol gol we oli
stret mo gud.***

Long 2004, mi bin go wetem Presiden Peka mo sam narawan moa i go long Japan. Hem i gat wan janis blong gobak long step blong hem mo tingtingbak long sam long ol eksperiens mo desisen we hem i bin mekem long taem ia. Hem i tokbaot sam long seminari toktok ia. Wetem raet blong hem, mi serem sam tingting mo filing blong hem.

Presiden Peka i tokbaot ol eksperiens we i bin hapen long wan aelan aotsaed long kos blong Okinawan. Hem i talem se hemia hil blong hem long ples we i stap hemwan. Hao hem i bin rere mo taem hem i mitim ol nara memba i mekem bilif blong hem long gospel tijing i kam strong moa. Be hem i no gat yet wan konfemesen—stret save ia long saed blong wanem hem i bin filim se i tru.

Man we i raetem laef blong Presiden Peka i talem wanem i hapen: "Agensem pis blong konfemesen we

hem i bin stap lukaotem, hem i kam blong fesem wan rabis faet agensem ol man we oli gat nating wetem wo. Hem i wantem wan taem blong stap hemwan, wan taem blong tingting, nao wan dei hem i klaem long wan ples we i hae moa bitim solwota. Long ples ia hem i faenem ol hahfah blong wan olfala haos, mo wan plantesen blong poteto we i gro olbaot. Long medel blong ol plan we oli stap go ded, hem i luk ded bodi blong wan mama wetem tufala pikinini blong hem. Hemia i mekem hem i harem nogud tumas, mo i miks wetem ol filing blong lav long famle blong hemwan, mo evri famle."⁶

Afta, hem i go insaed long wan ples we ol ami oli bילדيم, mo i lukluk ples, i tingting hevi, mo i bin prea. Presiden Peka, taem i lukbak long taem ia i talem se i wan taem we hem i kasem konfemesen. Hem i bin kasem insperesen long wanem bae hem i mas mekem wetem laef blong hem. I tru, hem i no save nating se bae hem i kasem hae mo tabu koling ia we hem i gat naoia. Visen blong hem, i blong hem i kam wan tija, we i tokbaot bigwan ol tijing blong Sevya. Hem i bin mekem tingting blong hem we bae hem i gat wan laef we i stret mo gud.

Tingting i kam strong long hem se bae hem i gat wan waef we i stret mo gud mo tugeta, bae tufala i lukaotem wan bigfala famle. Yangfala soldia ia i bin luksave se wok ia we hem i jusum bae i givim naf mane long hem, mo waef blong hem bae i serem ol sem tingting mo bae i wantem blong laef wetem smol samting nomo. Sista Dona Peka, hem i bin, mo hem i stap yet, long Presiden Peka, wan kompanion we i stret evriwan. I neva gat taem we mane i ova smol, be tufala i bin gat evri samting we tufala i nidim. Tufala i bin lukaotem 10 pikinini mo tufala i bin mekem sakrifaes. Naoia tufala i gat 60 apupikinini mo 79 smol apupikinini.

Mi serem tru stori ia wetem yufala, from se plante taem tumas, gol blong yumi i folet wanem we wol i luk i impostaen. Ol stamba samting oli simpol nomo blong ol memba we oli bin kasem ol odinens blong sevem man. Stap stret mo gud. Bildimap wan famle. Faenem wan stret wei blong lukaotem famle. Mekem wok taem oli singaotem yu. Rere blong mitim God.

Sevya i bin tijim se "stamba blong prapa laef blong man i no stap long ol samting we hem i gat" (Luk 12:15).

Bildimap Kantri blong Yu mo Komuniti blong Yu

Antap long ol fasin, kwaliti mo desisen we yufala i gat, sapos yufala i mas stap olsem jeneresen we yufala i nid blong stap, bae yufala i bildimap kantri blong yufala, mo



Jiu/Kristin laef we yumi karem long ol olfala i kam, i bigwan, be tu, i wan samting we i nid blong stap long plan blong Papa long Heven.

komuniti we yufala i stap laef wetem. Jeneresen blong yufala, olsem jeneresen we i hae moa, bae i nidim blong protektem stret mo gud fasin mo fridom blong religijn. Jiu/Kristin laef we yumi karem long ol olfala i kam, i bigwan, be tu, i wan samting we i nid blong stap long plan blong Papa long Heven. Yumi nidim blong holemaet blong ol fiuja jeneresen oli yusum. Yumi nidim blong joenem ol gudfala pipol, mo tu, ol pipol blong nara jos—speseli olgeta we oli filim se oli mas ansa long God. Ol pipol ia nao we bae oli save andastanem kaonsel ia we i se “nomata huia yu, mekem gud pat blong yu.” Sakses blong leftemap ol Jiu/Kristin valiu mo fridom blong religijn bae i makem jeneresen blong yufala olsem jeneresen we i hae moa we yufala i mas kam.

Wetem ol jalenj we oli stap long wol tedei, Fas Presidensi mo Kworom blong Olgeta Twelef oli wari se yufala i mas tekempat long rod blong politik long kantri we yufala i stap long hem. Jos i stanap hemwan, i no gat saed long politik mo i no sapotem ol kandidet o pati. Be mifala i wantem luk, se ol memba blong jos oli stap fulwan blong sapotem ol kandidet mo ol pati we oli jusum, we oli stanap long ol prinsipol we bae i protektem wan gud gavman. Doktrin blong yumi i klia; yumi mas wok strong blong lu-kaotem ol man we oli ones mo waes (luk long D&C 98:10).

Mifala i gat bigfala tras long yufala. Lidasip blong Jos i ones blong taalem se hem i biliv se yufala i save bildimap kingdom i bitim ol jeneresen blong bifo. Yufala i gat lav mo tras blong mifala, be tu, prea mo blesing blong mi-fala. Mifala i save se sakses blong jeneresen blong yufala i stamba blong Jos i gohed blong stanap mo blong kingdom i gro. Mifala i prea se bae yufala i mekem gud pat blong yufala: yufala i no stap blokem fes blong yufala, mo yufala i mekem samting folem huia yufala, setemap ol stret gol, mo bildimap kantri mo komuniti we yufala i laef wetem. ■

I kam long wan Jos Edukesen Sistem faeasaed blong ol yang adalt we hem i bin givim long Brigham Yang-Aedaho long 4 Maj 2012. Blong kasem ful toktok we oli raetem, visitim lds.org/broadcasts/archive/ces-devotionals/2012/01?lang=eng.

OL NOT

1. David O. McKay, insaed long Francis M. Gibbons, *David O. McKay: Apostle to the World, Prophet of God* (1986), 45.
2. Luk long Mark L. Staker, “Remembering Hiram, Ohio,” *Ensign*, Okt. 2002, 32, 35.
3. Luk long *Teachings of Presidents of the Church: Joseph Smith* (2007), 24.
4. “True to the Faith,” *Hymns*, no. 254.
5. L. Tom Perry, insaed long “Joy—for Us and Others—Comes by Following the Savior,” <http://lds.org/prophets-and-apostles/what-are-prophets-testimonies?lang=eng>.
6. Lucile C. Tate, *Boyd K. Packer: A Watchman on the Tower* (1995), 58–59.

OL YANGFALA *mo* OL KAVENAN BLONG TEMPOL

I kam long Geri mo Susan Kata

Olsem ol man we i wok long tempol, mifala i bin gat blesing blong toktok wetem sam yang adalt we oli stap kam long tempol blong kasem endaomen blong olgeta. Mifala i faenem se i help blong oli gat wan woksop blong rere blong go long tempol, be, stret mo gud paoa blong lidim olgeta we i kam long papa mo mama mo ol lida i mekem wan bigfala wok blong helpem olgeta blong mekem ol kavenan blong tempol. Olsem ol papa mo mama, mo ol lida, yumi nidim blong helpem ol yut, i no blong rere from wan fultaem misinari se- ves, we i stap sam manis nomo, be tu, blong oli mekem mo kipim ol kavenan blong tempol, we i stap blong taem we i no save finis. Ol fas step i stat long taem we wan i smol pikinini.

Stap Rere long Ol Smol Pikinini

Ol papa mo mama oli save soem long ol pikinini blong olgeta olsem wanem tempol i impoten taem oli go wosip long tempol mo taem oli serem ol testemoni blong olgeta long saed blong wok blong tempol. Iven tu long ol ples we i no posibol blong go long tempol oltaem, ol mama mo papa oli save putum insaed long hat blong pikinini blong olgeta, tingting ia blong wantem go long tempol.

Presiden Howod W. Hanta (1907–95) i tijim ol mama mo papa se: “Bae yumi serem, wetem ol pikinini blong yumi ol filing long saed blong spirit we yumi bin gat insaed long tempol. Mo bae yumi tijim olgeta moa strong mo moa gud long saed blong ol samting we i stret blong talem abaot ol stamba tingting blong haos blong Lod.”¹ Ol pikinini blong yumi oli nid blong save se tempol i wan ples we yumi bin kasem ol ansa blong ol prea blong

Wetem yia blong save go long misin we i kam daon, plante taosen mo moa yangfala oli stap, naoia, mekem tabu kavenan blong tempol.

yumi, mo i ples we yumi bin filim lav blong God.

Ol mama mo papa oli save tijim tu ol pikinini blong olgeta blong luk fored mo laef klin inaf blong gat wan limit-yus rekomen, blong mekem se oli gat janis blong kwalifae taem bae oli kasem 12 yia. Taem we taem i kam blong ol yut ia blong go long tempol, mifala i luk glad mo hae tingting we oli gat taem oli soem ol rekomen ia long tempol.

Stap Mekem Ol Yut Oli Rere

Ol mama mo papa oli save helpem ol pikinini blong olgeta blong stap wok long lukaotem famle histri blong olgeta blong mekem se taem oli kasem 12 yia, oli save karem ol famle

nem i go long tempol. Long olgeta yut we oli stap mekem hemia, Elda Deved A. Bedna blong Kworom blong Olgeta Twelef Aposol i promesem: “Lav mo tangkyu blong yu from ol bubu blong yu bae i kam antap. Testemoni blong yu long saed blong Sevya mo jenis blong laef blong yu i go long Sevya bae i kam bigwan mo bae i stap. Mo mi promesem yu se bae yu kasem proteksen agensem bigfala paoa blong enemi.”²

Mitufala i bin luk plante eksapol blong promes ia i kamtru. I no longtaem i pas, wan yang woman i talem long mitufala se afta we hem i stap lukaotem nem blong bubuwoman blong hem, hem i kam long tempol blong mekem wok blong hem. Hem i talem se taem hem i stap kasem baptaes long bihaf blong hem, hem i gat klia filing se bubuwoman blong hem bae i welkamem hem long nekis laef. Ol eksperiens olsem, oli mekem testemoni i kam strong moa mo i putum wan filing blong wantem tekem pat moa long ol odinens blong tempol.

Plante yut oli fesem temtesen blong dresap nogud. Taem





ol papa mo mama, mo oli lida oli werem ol naes mo gud klos, bae ol yut oli luksave se, olgeta tu, oli save mekem semmak. Ol yut oli nid blong andastanem se wei we oli dresap, mo olsem wanem oli tritim bodi blong olgeta i save soem se oli stap olsem disaepol.

Ol mama mo papa oli save helpem ol yut blong rere blong go insaed long tempol taem oli helpem olgeta blong andastanem ol kavenan we bae oli mekem insaed. Ol kavenan blong tempol i tekem ol promes blong "folem stret loa blong klin fasin mo jastiti, blong help, blong gat gud hat, blong save akseptem tingting blong man nating yu no agri wetem mo gat gud tingting, mo stap klin evriwan; blong givim talen mo nara samting blong serem trutok mo leftemap famle blong man; blong holemataet strong tingting long wok blong trutok; mo blong lukao-tem, long evri wei, blong givhan long bigfala wok blong stap rere, blong mekem se wok bae i rere blong risivim King blong hem—we i Lod Jisas Kraes."³ Ol mama mo papa oli save testifae se ol yut bae oli kasem ol blesing blong olgetawan mo ol blesing we oli gat paoa long ful laef blong olgeta taem oli stap holemataet ol kavenan ia, mo ol kavenan ia bae oli gat moa mining long ol yut taem ol mama mo papa blong olgeta i helpem olgeta blong andastanem se blesing mo kavenan i kam posibol tru long Atonmen blong Jisas Kraes.

I gat plante wei we yumi save help blong mekem ol pikinini mo ol yut blong yumi oli rere blong kasem ol blesing blong tempol. Moa oli rere, moa bae oli stap long pis mo oli filim Spirit; mo long wei ia bae oli save gat eksperiens long saed blong spirit taem oli kasem endaomen blong olgeta. Wan eksperiens blong tempol we i leftemap tingting bae i mekem se oli komitim olgeta moa olsem ol disaepol blong Kraes mo oli kam ol misinari we oli moa gud—oli gat strong tingting blong helpem olgeta we oli tijim blong rere blong kasem ol tabu tempol kavenan blong olgeta bakegen. ■

OL NOT

1. Howard W. Hunter, "Follow the Son of God," *Ensign*, Nov. 1994, 88.
2. Deved A. Bedna, "Hat blong Ol Pikinini Bae I Tanem," *Konfrens Ripot*, Okt. 2011, 19–23.
3. James E. Talmage, *insaed long Mekem Rere blong Go Insaed long Tabu Tempol* (2002), 38.

BIGFALA Misinari Raet blong Yumi

*Evri misinari, blong bifo o blong tedei,
oli givim seves wetem hop blong mekem
laet i moa gud long ol nara pipol.*

I Kam long LaRene Pota Gaunt
mo Linda Deka Lopes

Ol Magasin blong Jos

Ol misinari blong tedei, oli tekem wetem olgeta, wan bigfala histri blong fulumap wol wetem save abaat Lod (luk long Aesea 11:9). I stat long Ebraham i go long Pol, i go kasem Wilfod Wudrof, ol misinari long ol skripja mo histri blong Jos oli stap ol bigfala eksampol long ol misinari blong tedei.

Nomata yumi ol memba misinari, o yumi stap rere blong wan fultaem seves, o yumi stap long wan misin, o yumi kambak long wan misin, yumi save tekem strong paoa long tingting mo insperesen we i kam long ol eksampol ia.

Misinari Raet blong Yumi insaed long Baebol mo long Perel we I Gat Bigfala Praes

Ol misinari blong bifo, olsem Jona, oli bin singaotem olgeta blong givim wan voes blong woning long ol pipol (luk long Esekiel 3:17–19). Aot long eksampol blong Jona, yumi luk se i impoten blong sakem sin mo blong stap obej. Stori blong Ebraham i tijim yumi long saed blong laen mo paoa blong Melkesedek Prishud.

Ol misinari blong Niu Testeman, olsem Pita mo Pol, oli wok blong holemaet ol tijing blong Jisas Kraes. Be, wetem taem, wol i bin foldaon long apostasi. God i putumbak gospel tru long Profet Josef Smit. Yumi stap wok naoia, semmak olsem ol misinari oli bin stap mekem, blong holemaet mo serem ol tijing blong Jisas Kraes.



© 2002 DANIEL A. LEWIS

Jona long Soa blong Nineve, i kam long Daniel A. Lewis. Jona i bin sakem sin mo i bin go prij mo konfemem se Jehova i rul evri ples mo i no stopem lav blong Hem long wan nesen o pipol nomo (luk long Jona 1–4).

WAN VOES BLONG WONING

"From se Lod i wan man wetem kaen fasin, Hem i stap singoatem ol wokman blong Hem blong wonem ol pipol abaat ol denja. . . . Tingting long Jona. Faswan, hem i ronwe long singaot blong Lod blong go givim woning long ol pipol blong Nineve we oli bin stap blaen mo no luk denja from sin. Hem i bin save se ol nogud pipol, truaot ol taem, oli bin sakemaot ol profet, mo samtaem, oli kilimded olgeta. Be yet, taem Jona i bin go wetem fet, Lod i bin blesem hem wetem sefti mo sakes."

Presiden Henri B. Aering, Fas Kaonsela long Fas Presidensi, "Let Us Raise Our Voice of Warning," *Liahona*, Jan. 2009, 3.





Pita mo Jon long fored blong Ol Man blong Rul long Jerusalem, *i kam long Saemon Veda*. Oli bin tekem *Pita mo Jon i kam long fored blong kaonsel, mo hae pris i bin askem tufala, "Weswe? Mifala i tok strong long yufala finis se bambae yufala i no moa yusum nem blong man ya blong tijim ol man.* ?Be naoia olsem wanem? *Yufala i mekem we ples ya Jerusalem, i fulap finis long ol tok blong yufala. . . Nao Pita . . . i talem se, "Mifala i mas obei long God, mifala i no save obei long man" (Ol Wok 5:28–29).*

Aposol Pol, *i kam long Karel Skreta. Long ol wokbaot mo leta blong hem, Pol i bin serem strong testemoni blong hem long saed blong Sevya, hemia long Smol Esia mo plante ples long wol we oli bin save se i stap long tetaem ia.*



BPK, BERLIN / GEMÄLDGALERIE ALTE MEISTER, STÄATLICHE KUNSTSAMMLUNGEN,
DRESDEN / ELKE ESTEL / HANS-PETER KLUT / ART RESOURCE, NY



Melkesedek I Blesem Ebram [Ebrahim], *i kam long Wolta Ren. Melkesedek i blesem Ebram (luk long Jenesis 14:18–20) mo tu, i givim prishud long hem (luk long D&C 84:14). Long wan narafala taem, Lod i bin kamaot long Ebram, i talem se Hem i gat wan stamba tingting blong mekem Ebram i kam wan wokman we bae i tekem nem blong Hem i go long ol defren ples. Mo bae Ebram bae i kasem wan blesing long laen blong hem we bae i kam afta long hem; se long han blong olgeta bae i tekem seves ia mo Prishud bae i go long evri nesen (luk long Abraham 2:6, 9).*



© GERI L. KAP, OLI NO SAVE MEKEM KOP



STAP TIJIM OLGETA WE OLI NO BILIV

"Ol boe blong Mosaea . . . oli bin go long medel blong ol man blong Leman. Taem oli bin stap tijim wan pipol we kastom blong olgeta i no letem blong groap long spirit, ol fetful misinari ia oli bin help blong mekem wan bigfala jenis i hapen long ol man blong Leman ia. Yumi save se . . . 'olgeta long ol man blong Leman we oli bin biliv long ol prijing blong olgeta, mo oli bin jenism laef blong olgeta long Lod, oli neva bin foldaon i gowe' (Alma 23:6)."


Elda James B. Martino blong Olgeta Seventi,
"Repentance That Brings Conversion," *Ensign*,
Sept. 2012, 58.

Amon long fored blong King Lamontae, *i kam long Geri L. Kap.*
Amon i wan long ol boe blong Mosaea, mo hem i bin sevem ol grup blong animol blong King Lamontae. Taem we king i bin askem long Amon sapos God nao i bin sendem hem, Amon i talem se Tabu Spirit nao i singaotem hem blong i tijim gospel "long pipol ia [blong Lamontae], blong hem i save karem olgeta i kam blong save samting we i stret mo i tru" (Alma 18:34).

Misinari Raet blong Yumi insaed long Buk blong Momon

Alma, Amulek, mo ol boe blong Mosaea, mo Samuel man blong Leman, oli samfala eksampol blong bigfala misinari eksampol we yumi faenem insaed long Buk blong Momon. Aot long olgeta, yumi luk ol eksampol blong fasin blong sakem sin, stap obei mo gat paoa long tingting. Semmak olsem olgeta, yumi save dipen long insperesen mo reveal sen we i kam long God blong lidim misinari seves blong yumi.

Hem I Tekem Glad Nius I Kam long Sol blong Mi, *i kam long Wolta Ren. Wan enjel i bin visitim Samuel, man blong Leman, mo i tekem "glad nius i kam long sol [blong Samuel]" abaot taem we Seuya bae i kam (Hileman 13:6–7).*
Olsem pat blong koling blong hem blong prij long ol man blong Nifae, Samuel i klaem long ol wol blong taon blong Sarahemla mo i bin serem ol glad nius ia wetem ol pipol.



Misinari Raet blong Yumi insaed long Doktrin mo Ol Kavenan

Afta long taem blong Restoresen blong gospel, ol misinari oli kam wan pat we i nid blong gat. Ol misinari olsem Dan Jons, Orson Haedi, mo Parli P. Prat i bin serem Buk blong Momon mo gospel blong Jisas Kraes. Sam, olsem brata blong Profet Josef, Samuel, oli bin givim seves kolo-sap long hom blong olgeta. Ol narafala, oli bin go longwe blong serem gospel long ol ples olsem Taelan, ol Sanwij Aelan (Hawae), Denmak, mo Inglan.

Ol fas misinari ia, plante taem oli stap long ol longfala mo fulap misin. Oli livim papa mo mama, ol swithat blong olgeta, ol waef, ol pikinini, mo ol apu pikinini, semmak olsem we yumi stap mekem tedei. Long yumi, tedei, oli stap olsem ol eksampol blong fet, strong paoa long tingting, fasin blong stap obei, save wok longtaem mo wok wetem strong tingting.



Ol Mormon Prija, *i kam long Arnold Friberg, folem wan orijinol peinting we i kam long Kristen Dalsgard. Pitja ia we i soem wan Lata-Dei Sent misinari we i stap tijim gospel blong Jisas Kraes long wan famle blong Denmak we i stap long hom blong olgeta long rural eria, i wan gud eksampol blong ol misinari wok long namba 19 senturi. Ol misinari oli bin stap tij tu taem oli stanap long ol kona blong rod, o long ol miting rum long taon.*



Wilford Wudrof I Rere blong Mekem Baptae long Benbo Fam, *i kam long Rijad A. Merei. Lod i bin lidim Wilford Wudrof long ol yia 1840 i go long fam blong Jon Benbo long Hiresosae, Inglan. Wilford i raetem: "I bin gat wan pipol i stap long ples ia we i bin stap prea blong oda blong ol samting i kam-bak olsem i bin stap bifo. Wanem i hapan, i we, ol fas teti dei afta we mi kasem ples ia, mi bin baptaesem sikis handred man. . . . Long eit manis wok long kantri ia, mi bin tekem eitin handred (wan taosen eit handred) man i kam long Jos. ?From wanem? From se i bin gat wan pipol we i bin stap ia we i rere from Gospel" ("Discourse," Deseret Weekly, 7 Nov. 1896, 643).*

*Ol misirani we oli
jes kam oli bap-
taesem ol manples
blong Sanwij
Aelan (Hawae),
hemia long ol yia
1851. Foto ia, deit
blong hem i afta
long yia ia.*



OLINO SAVE MEKEM KOP


Stap Bildimap Yumi Folem Misinari Raet blong Yumi

Stat long taem we Presiden Tomas S. Monson i bin anaonsem long Oktoba 2012 jeneral konfrens se ol yang man mo ol yang woman oli save go long wan misin long wan yia we i daon, plante taosen blong ol Lata-Dei Sent oli bin fulumap misin graon.

Long Epril 2013 jeneral konfrens, Elda Nil L. Andesen blong Kworom blong Olgeta Twelef Aposol i ademap witnes blong hem long misinari wok, mo i leftemap tingting blong wanwan long yumi blong kam wan impoten pat blong merikel

ia taem yumi gihvhan blong faenem olgeta we oli rere blong harem gospel: "Olsem we i tru we Lod i stap singaotem plante moa misinari blong go givim seves, Hem i stap wekemap ol tingting mo openem olgeta hat blong ol gud mo ones pipol blong akseptem ol misinari blong Hem. Yu save olgeta finis o bae yu save olgeta yet. Oli pat blong famle blong yu mo stap laef long komuniti blong yu. Oli wokbaot bitim yu long rod, oli sidaon wetem yu long skul, mo oli stap konek wetem yu long intanet" ("Hem i Wan Merikel," *Konfrens Ripot*, Mei 2013). ■

Serem Gospel long Ol Smol Rod, *i kam long Ken Spensa. Tufala misinari ia, tufala i stap serem gospel wetem wan man long fored blong wan bukstoal long Niu Branswik, Niu Jesi, YSA.*



JOS HISTRI MUSUMI GLAD BLONG SEREM




MISINARI BAJ BLONG YU

"Sapos yu yu no wan fultaem misinari wetem wan misinari baj we oli pinim long kot blong yu, naoia i taem blong yu pentem wan long hat blong yu—pentem olsem Pol i talem: 'Kraes i no yusum ing blong raetem, i yusum Spirit blong God ya we i laef we i no save ded.' "

Elda Nil L. Andesen blong Kworom blong Olgeta Twelef Aposol, "Hem i Wan Merikel," *Konfrens Ripot*, Mei 2013.



JOS HISTRI MUSEUM | GLAD BLONG SEREM



Misinari Oltaem, *i kam long Juei Ing Jen. Ol memba blong Jos long Taewan, semmak olsem ol memba misinari long evri ples, oli lukluk blong serem glad blong olgeta long gospel mo ol skripja. Ol skripja oli stap long tebol; mo insaed long tolfala blu kontena i gat ol skrol we i gat wan pikja blong Taepe Taewan Tempol.*

Ol Man blong Leman bae Oli Kam Bigwan Semmak Olsem Wan Ros Flaoa, *i kam long Joselito Jesus Asevedo Garsia. Pikja ia i soemaot spirit blong misinari wok long medel blong ol pipol we oli toktok lanwis blong Spein. Tufala misinari i rere blong tijim gospel taem ol narafala pipol oli go mekem wok blong olgeta evri dei. Lima Peru Tempol, we i stap long medel blong ol smol hom mo animol blong kantri ia, i ripresentem olsem wanem Jos i stap gro.*



JOS HISTRI MUSEUM | GLAD BLONG SEREM

Ol Lata-Dei Sent Misinari long Siera Leone, *i kam long Emile Wilson. Fas misin long Siera Leone i bin oganaes long Fritaon long namba 1 Julae 2007. Fritaon i kam namba 3,000 stek long Jos long namba 2 Disemba 2012.*



I Kam long Elda Edwardo Gavaret

Blong Olgeta Seventi

YU RERE FINIS BLONG FESEM DEI BLONG FAET

*Mi hop se, taem yumi putum tras blong yumi long Sevya,
Lod blong Ol Pipol, bae yumi rere, mo bae yumi no
folfoldaon long ples blong faet.*

Iong 1485, Rijad 3 i bin stap long jea blong king blong hem long Inglan. Hem i bin wan taem we gavman i muvmuv, mo Rijad i mas difendem hat blong king blong hem moa bitim wan taem. Be, hem i gat eksperiens long saed blong ami, hem i wan soldia we i strong we i bin gat wan ami blong 8,000 i go kasem 10,000 man.

Long semfala yia ia, wan man we i wantem kam king blong Inglan, Henri Tudo, wan Haeman blong Rijmon, i bin jalenjem mo fesem Rijad long wan ples we oli givim nem blong faet ia long hem: Boswot Graon. Henri, we i no olsem Rijad, i no save faet gud, mo ol man blong hem oli kasem 5,000 nomo. Be long saed blong hem, hem i gat ol gudfala advaes—aol gudfala man we oli bin tekpat long sam faet we i semmak, mo sam we i agensem Rijad. Moning blong faet i kam, mo evri samting i soem se Rijad bae i winim faet ia.

Wan bigfala stori i talemsot wanem i bin hapen long 22 Ogis 1485. Long moning ia, King Rijad mo ol man blong hem oli rere blong fesem ami blong Henri. Wina blong faet ia bae i rul long Inglan. Sot taem bifor long faet, Rijad i sendem wan man blong hem blong luk sapos hos we hem i laekem i rere finis.

“Putum kwik sus blong hem,” wokman ia i talem long wokman blong lukaot long





hos. "King i wantem blong ron long hos blong hem mo stap long fored blong ol ami trup blong hem."

Man blong lukaot long hos i talem se bae hem i mas wet. "Mi putum sus long ol hos blong ful ami blong king long ol las dei ia," hem i talem, "mo naoia, mi mas go karem sam moa aean."

Wokman ia we i no save wet i talem se hem i no save wet. "Ol enemi blong King oli stap kam naoia, mo mifala i mas mitim olgeta long graon blong faet," hem i talem. "Yu mekem nomo wetem wanem we yu gat i stap."

Olsem we hem i kasem oda, man blong lukaot long hos i mekem wanem hem i save mekem, mo i mekem fo sus blong hos wetem wan aean we i stap. Afta we hem i karemaot ol sus, hem i nilim tri long ol sus ia long hos. Taem hem i traem blong fasem nambafo sus, nao hem i luk se hem i no gat inaf nil.

"Mi nidim wan o tu nil moa, mo bae i tekem sam taem blong mi hamarem olgeta," hem i talem long wokman blong king.

Be wokman blong king i nomo save wet i go moa. "Mi stap harem ol bubu i blo nao," hem i talem. "?Be yu no save yusum nomo wanem we yu gat naoia?"

Man blong lukaot long hos i ansa se bae hem i mekem wanem hem i save mekem, be, hem i talem se nambafo sus ia bae i save kamaot ia.

"Yu nilim nomo i go," wokman blong king i givim oda. "Mo hariap, sapos no, King Rijad bae i kros long yumitu."

Faet bae i stat i no longtaem. Blong lidim ol man blong hem, Rijad i ron long hos i go antap mo i kam daon long graon blong faet, i faet mo i talem strong long olgeta se: "!Gohed! !Gohed!"

Taem Rijad i lukluk i go kros long fil blong faet, nao hem i luk sam man blong hem oli stap biaen. Nao hem i fraet se ol narafala soldia blong hem bae oli tanembak, hem i ron i go from laen ia we i stop blong pusum olgeta fored. Be bifor Rijad i save kasem olgeta, hos blong hem i kikim graon mo i foldaon, nao i sakem king i go long graon. Wan long sus blong hos ia, semmak olsem man blong lukaot long hos i talem, i kamaot long taem we king i ron long hem.

Rijad i stanap bakegen i stanap long graon, be hos blong hem i girap mo i ronwe. Taem ami blong Henri i stap wokbaot i kam, Rijad i saksakem naef blong faet blong hem long ea, i singaot se: "!Wan hos! !Wan hos! !Mi givim kingdom, yu givim wan hos!"

Be hem i let tumas. Long tetaem ia, ol man blong Rijad oli stap ronwe from we oli fraet long ami blong Henri we i stap kam kolosap, mo oli lusum faet. Stat long taem ia, ol pipol oli stap talem toktok ia:



TINGBAOT OL SMOL SAMTING

"Stap obei long ol tijing blong profet we Kraes bae i wantem yu blong folem. No faenem eskius mo sakemaot fija hapines taem yu tekem ol sotkat mo no folem ol gudfala gospel prinsipol. Tingbaot: ol smol samting i lidim yu long ol bigfala samting. Semmak, ol smol taem blong foget, o no wantem save, i save lidim yu long ol bigfala problem. Moa impoten, ol simpol, gud fasin we i happen oltaem, i lidim yu long fulap long ol gud blesing."

Elda Rijad G. Skot blong Kworom blong Olgeta Twelef Aposol, "Blong Gat Pis long Hom," Konfrens Ripot, Mei 2013.

*From wan nil nomo, wan sus i lus,
From wan sus nomo, wan hos i lus,
From wan hos nomo, wan faet i lus,
From wan faet nomo, wan kingdom i lus,
Mo evri samting ia, from nomo oli nidim wan
nil blong sus blong hos.¹*

Stap Holemaet Ol Prinsipol blong Yumi

Taem mi stap tingbaot stori ia, mi stap tingtingbak long, olsem wanem nao, wan simpol nil we oli no hamarem gud long sus blong hos i mekem sam bigfala samting olsem i happen. Yumi save komperem nil ia we i no gat long ol prinsipol blong gospel. Sapos i no gat ol prinsipol blong gospel mo ol narafala valiu mo praktis we i go wetem, bae i save mekem yumi stap nating nomo long graon blong faet agensem temtesen mo devel.

?Wanem praktis nao i no gat long laef mo famle blong yumi? ?Yumi stap tingting nating long prea blong yumi-wan, mo famle prea? ?Yumi tingting nating long strong tingting blong stadi long ol skripja? ?Yumi tingting nating blong gat famle haos naet oltaem? ?Yumi tingting nating blong pem ful taeting? ?Yumi tingting nating blong givim seves long ol brata mo sista blong yumi? ?Yumi tingting nating blong folem Sabat dei? Yumi tingting nating long tempol wosip? ?Yumi tingting nating blong gat lav long ol neiba blong yumi?

Wanwan long yumi i save lukluk insaed long yumiwan mo faenem wanem nao yumi no stap mekem, o no gat—wanem prinsipol o praktis yumi nidim blong holemaet

moa strong long laef blong yumi, mo insaed long famle blong yumi. Afta, afta we yumi faenemaot prinsipol ia o praktis ia, yumi save tekem step, wetem gud wok mo strong tingting blong *taetem nil o hamarem nil*—blong laef folem prinsipol ia moa fulwan, mo blong mekem yumi rere, mo mekem famle blong yumi i rere blong stanap from wanem we i raet.

Insaed long Doktrin mo Ol Kavenan, Lod i givim kaonsel ia blong tekem hat blong fasin blong sevem man, mo naef blong faet blong Spirit blong Hem we bae Hem i kapsaedem long yumi, mo stap fetful kasem taem we Hem i kam (27:18).

Long ol fetful wokman blong Hem, Sevyia i bin promesem se han blong yumi bae i han blong Hem, mo bae Hem i stap olsem sil blong yumi, mo smol sil blong yumi; mo bae Hem i mekem yumi i rere, mo bae yumi faet blong Hem wetem ful tingting mo paoa; mo wetem faea blong kros blong Hem, bae Hem i mekem yumi laef (luk long D&C 35:14).

Bae yumi tingbaot se nomata "yu yu mekem rere ol hos blong go mekem faet," olsem Ol Proverb i talem, "be Hae God nomo i save mekem yu yu win" (21:31). Bae yumi folem invitesen blong Moronae blong "kam long Kraes, mo stap stret gud long hem," (Moronae 10:32). Mi hop se, taem yumi putum tras blong yumi long Sevyia, Lod blong Ol Pipol, bae yumi rere, mo bae yumi no folfoldaon long ples blong faet agensem devel. ■

NOT

1. Luk long "For Want of a Horseshoe Nail," long William J. Bennett, ed., *The Book of Virtues: A Treasury of Great Moral Stories* (1993), 198–200.

MEKEM WOK BLONG FASIN BLONG SEVEM MAN

I Go Hariap

Taem yumi stap invaetem, lavem, mo givim seves long ol narafalawan, yumi kam ol tru disaepol blong Jisas Kraes, mo yumi stap help blong mekem wok blong fasin blong sevem man i stap go hariap.

Nomata we tedei, ol fultaem misinari oli glad tumas blong mekem wok tru long Intanet, mo mekem ol tua long ol mitinghaos, olgeta jenis ia, oli wan smol pat nomo long bigfala wok blong fasin blong sevem man. Wanem i moa impoten, i olsem wanem nao, yumi, olsem ol memba, yumi fit insaed long bigbigfala pikja ia blong mekem wok blong fasin blong sevem man i go hariap. Oli no stap askem yumi blong wok long wan niu program. Oli stap leftemap tingting blong yumi nomo blong stap ol tru disaepol blong Jisas Kraes. Wok blong yumi i blong yumi draonem yumi long fasin blong lavem mo givim seves long olgeta we oli stap raon long yumi—givim kamfot long wan we yumi wok wetem we i stap long nid, blong invaetem ol fren blong yumi blong kam long wan baptaes, blong stap helpem wan neiba we i olfala blong klinim yad blong hem, blong stap invaetem wan lesaktiv blong kam kakae, o blong stap helpem wan neiba wetem famle histri blong hem. Ol wei ia, oli ol nomol wei blong stap glad, blong invaetem ol lesaktiv memba, mo olgeta we oli no blong Jos oli kam insaed long laef blong yumi, mo long semtaem, insaed long laet blong gospel. Taem bae yufala i serem ol gud taem mo ol tabu taem blong laef blong yufala wetem olgeta, bae i bes wei ia nao we eniwan long yumi i save wok long plantesen blong Jisas Kraes from wok blong fasin blong sevem ol sol blong ol man mo ol woman (luk long D&C 138:56).

?Wanem Nao Hem I Wok blong Fasin blong Sevem Man?

Wok blong fasin blong sevem man i wok blong Papa long Heven blong mekem man i nomo save ded mo i kasem laef we i no save finis (luk long Moses 1:39). Impoten wok ia i tekem ol memba i mekem misinari wok, fasin blong holemaet ol konvet, mekem ol lesaktiv oli kam aktiv bakegen, mekem wok blong tempol mo famle histri, mo tijim gospel.¹ Plante taem tumas, yumi tingting se ol defdefren saed ia blong gospel, oli no joen. Be insaed long *Wok blong Fasin blong Sevem Man: Wol Lidasiip Brodkas* long 23 Jun 2013, Elda Rasel M. Nelson blong Kworom blong Olgeta Twelef Aposol i bin tijim se: “Tru, wok



FOTO RIKUA IKAM LONG DEVED STOKA



ia, oli no save serem long ol defdefren pat. Ol hadwok ia, oli no seperet; evriwan i pat blong wok blong fasin blong sevem man.”²

Toktok ia “Mekem Wok blong Fasin blong Sevem Man I Go Hariap”—nem blong fren websaet blong brodkas ia ([hasteningthework.lds.org](https://www.lds.org))—i tokbaot promes blong Lod we i talem se bambae Hem i mekem wok blong Hem i go hariap long stret taem blong hem (luk longD&C 88:73).

Ol stamba prishud odinens—baptaes, konfemesen, odinesen long prishud blong ol man, mo ol tempol odinens—oli stap olsem ol poen blong kasem long rod blong yumi blong gobak long Papa blong yumi long Heven. Taem yumi stap tekpat long wok ia blong fasin blong sevem man, yumi stap folem, mo stap givim

insperesen long ol narawan blong folem rod ia blong kavenan.

Oi Memba mo Oi Misinari Oli Wok Tugeta Anda long Oi Ki blong Prishud

Taem ia i kam nao, blong yumi luklukgud bakegen long stamba prinsipol ia, we taem yu yu wan memba Jos blong Lod, i minim se oli singaotem yu blong wok fulwan long wok ia blong Hem blong fasin blong sevem man. Ol stek presiden mo ol bisop oli holem ki blong misinari wok insaed long ol yunit blong Jos blong olgeta³ mo oli stap helppem ol memba blong mekem wanem ol tru disaepol blong Kraes oli stap mekem—oli serem laet blong gospel. Ol misin presiden oli holem ol prishud ki we i mekem i posibol blong oli lidim wok blong ol misinari we oli stap lidim



olgeta.⁴ Ol fultaem misinari, oli trenem olgeta blong tijim olgeta we oli bin rere blong akseptem gospel. Oli helpem ol memba wetem misinari wok blong olgeta, be i no nara wei raon. Long wei ia, ol fultaem misinari, mo ol memba misinari, oli ol patna blong tekem gospel i go insaed long laef blong olgeta pipol we Lod i bin mekem olgeta oli rere blong akseptem.

Long taem blong brodkas, Presiden Tomas S. Monson i bin talem: "Taem naoia, i taem blong ol memba mo ol misinari oli kam tugeta, blong oli wok tugeta, blong wok insaed long plantesen blong Lod blong tekem ol sol oli kam long Hem. Lod i bin rere long ol tul blong yumi, blong yumi serem gospel long plante defren kaen wei, mo bae Hem i helpem yumi long ol wok blong yumi sapos yumi tekem aksen wetem fet blong mekem wok blong Hem i hapen."⁵

Elda Nil L. Andesen blong Kworom blong Olgeta Twelef Aposol i bin tokbaot olsem wanem lav i impoten. Hem i bin talem: "Yumi wok tugeta wetem fet mo fasin blong stap wan—wetem fet se Lod bae i lidim wokbaot blong yumi, mo fasin blong stap wan wetem wanwan long yumi, mo wetem ol misinari; mo oltaem lav we yumi gat long Jisas

Kraes, lav we yumi gat long wanwan long yumi, mo lav we yumi gat long olgeta we yumi stap wok from bae i pusum yumi long wok ia."⁶

Oi Wod Kaonsel Oli Lidim Wok, Oi Wod Misin Lida Oli Kodinetem Wok

Anda long daereksem blong bisop, wod kaonsel i help, i sapotem, mo i kodinetem ol wok blong ol memba blong wod taem hem i mekem ol plan mo hem i stap lidim wod long wok blong fasin blong sevem man.⁷

Olsem wan memba blong wod kaonsel, wod misin lida "i kodinetem ol hadwok blong wod blong faenem, blong tijim, mo blong baptaesem ol investigeta. Hem i kodinetem wok ia wetem wok blong ol fultaem misinari."⁸

Taem hem i bin stap toktok i go long ol wod misin lida, Elda Nelson i talem: "Helpem ol misinari blong fulumap ol apoemen buk blong olgeta wetem ol gudfala janis mo apoemen blong mekem se oli no nid blong noknok long ol doa blong stap lukaotem ol pipol blong tij. . . . Yufala nao, i rop blong joenem ol misinari, wod kaonsel, mo ol memba blong wod."⁹



Tru Mak blong Sakses

Olsem ol Lata-dei Sent, yumi gat blessing ia blong stap laef long taem ia, we Lod i stap mekem wok blong Hem i hariap. From se God i gat wan stamba tingting blong putum yumi long wol long taem naoia, nao yumi gat paoa ia blong mekem moa bitim wanem we yumi save mekem. Sapos nomo yumi stap goheda blong go aot long olgeta man mo woman we oli nidim fren mo help wetem kaen fasin mo wetem lav, bambae yumi no save mestem wok ia. Misinari sakses i kam folet insperesen we i stap kam long maen mo hat blong yumi, mo taem yumi stap in-vaelem nomo olgeta narafala man insaed long laef blong yumi we i folet gospel. Invitesen ia, i mak blong sakses; i no sapos ol pipol oli kasem baptaes o no, o oli kam aktiv insaed long Jos. Olsem we Jefri R. Holan blong Kworom blong Olgeta Twelef Aposol i bin talem abaot bigfala ami blong ol misinari we oli stap go insaed long misin fil:

"Taem i kam long yumi blong yumi mas talem naoia 'luk oli kam.' Yumi evriwan i mas mekem plan, mo yusum tul ia we heven i sendem long wan wei we wok ia i givim frut blong hem."¹⁰

Hem i taem naoia, blong yumi evriwan i andastenem klia moa, pat ia we yumi mas wokem, blong mekem wok blong fasin blong sevem man i go hariap. Taem yumi stap mekem ol memba misinari wok blong yumi, stap holemaeta ol konvet, stap mekem ol lesaktiv oli kam aktiv bakegen, stap mekem tempol mo famle histri wok, mo stap tijim gospel olsem wan nomol pat blong laef blong yumi, bambae yumi gat bigfala glad, mo bae yumi kasem ol presen blong spirit we yumi nidim blong mekem Jos ia i kam strong moa long namba 21 senturi. ■


OL NOT

1. Luk long *Handbook 2: Administering the Church* (2010), japter 5.
2. Rasel M. Nelson, *Wok blong Fasin blong Sevem Man: Wol Lidasip Brodkas*, 23 Jun 2013, hasteningthework.lds.org.
3. Luk long *Handbook 2*, 5.1.6; 5.1.9.
4. Luk long *Handbook 2*, 5.1.6.
5. Tomas S. Monson, *Wok blong Fasin blong Sevem Man*, hasteningthework.lds.org.
6. Nil L. Andesen, *Wok blong Fasin blong Sevem Man*, hasteningthework.lds.org.
7. Luk long *Handbook 2*, 5.1.2.
8. *Handbook 2*, 5.1.3.
9. Rasel M. Nelson, *Wok blong Fasin blong Sevem Man*, hasteningthework.lds.org.
10. Jefri R. Holan, *Wok blong Fasin blong Sevem Man*, hasteningthework.lds.org.



Blong luk vidio blong *Wok blong Fasin blong Sevem Man: Wol Lidasip Brodkas* long 26 lanwis, go long [hasteningthework.lds.org](#). Yu save faenem brodkas ia tu i stap long nara 59 lanwis long [lds.org/broadcasts](#). *Handbook 2: Administering the Church* bae yu save faenem i stap long 29 lanwis long [lds.org/manual/handbook](#).

*Taem hem i pikimap
ol misinari long taksi
trak blong hem,
Roja Andrianarison
i putum hem long
rod blong kam olsem
wan disaepol.*



STAP KAM WAN Man blong Pis

*Tempol, misin, mo seves i bin
helpem Roja mo famle blong
hem blong muv blong kam
wan famle we i no save finis.*

I Kam long Matiu D. Fliton

Ol Magasin blong Jos

Roja Randrianarison i bin save se wan samting i no stap insaed long famle laef blong hem.

Hem i talem: "Mi prea long God blong helpem mi blong faenem wan samting blong lidim famle blong mi. Mi wantem blong lidim famle blong mi blong mekem wan gud samting, wan samting we bae i lidim mifala i go long stret rod."

Hem i stap wari long olsem wanem nao bae hem i lukaotem ol trifala pikinini blong hem—tufala boe, Radrianandri mo Sedinirina, mo gel blong tufala, Nirina. Hem i no hapi from se sotkat fasin bong hem i bin lidim olgeta blong gat ol jalenj insaed long famle. Hem i bin wantem blong stap wan papa we i moa kaen.

"Mi disaed se, mi nao, bae mi mas jenis from mi bin luk se mi bin kam wanem kaen man," hem i talem.

Sam yia bifo, Roja i bin lusum bisnis blong hem blong bildim ol haos mo i bin stap wok olsem wan taksi draeva long Antananariva, long Madagaska. Wan dei, hem i pikimap tufala sista misinari.

Hem i talem: "Taem tufala i sidaon long trak, tufala i askem nem blong mi mo sapos mi gat wan famle. Tufala i askem sapos mi bin save se huia God mo sapos mi bin stap prea long Hem."

Tufala misinari i bin singsing ol singsing wetem Roja long taem we trak i ron mo tufala i bin invaetem hem i kam long jos. Hem i bin traem blong go plante taem, be hem i neva save putum taem blong go long jos from wok blong hem, mo hem i lusum kontak wetem tufala misinari.

Samples faef manis afta, Roja i bin stap wok long haos blong hem wan dei, mo hem i harem tufala misinari i stap toktok long wan man aotsaed long fanis blong hem. Roja i save se bae oli kam toktok long hem. Hem i filim se bae hem i mas



Blong stadi long gospel olsem wan famle i bin helpem Randrianarison famle blong gro kolosap tugeta.

ansa yes long eni kwestin we bae tufala i askem.

Nao tufala misinari i talemaot nem blong tufala, mo tufala i bin askem hem sapos hem i save abaoat God. Yes. ?Sapos hem i wantem blong prea long God? Yes. ?Sapos hem i wantem toktok wetem ol misinari? Yes. ?Wetaem? Naoia. Tufala misinari i talem se bae tufala i kambak long 20 minit taem. Taem tufala i kambak, tufala i tekem wan memba wetem tufala we haos blong hem i stap kolosap.

Tufala misinari i bin tijim Roja plante taem long wan manis, insaed long hom blong hem. From ol samting we oli bin harem abaoat Jos, haf blong famle i no wantem stadi wetem ol misinari. Afta long longfala manis blong lanem gospel, Roja i go long Jos wetem ol misinari. Olsem wanem oli bin welkamem hem i bin tajem hem bigwan. “Ol memba oli welkamem mi olsem se oli bin save mi blong longtaem finis,” hem i talem.

Afta long Jos, Roja i gobak long haos blong hem mo talem long famle blong hem se bae hem i baptaes long wan manis taem, mo olgeta oli fri blong oli jusum blong joenem Jos o nogat. Famle i bin askem hem blong hem i wet blong mekem se oli save joenem hem. Oli stat blong go long ol miting blong jos, mo olgeta tu, oli bin sapraes gud.

Long fas taem we boe blong Roja, Randrianadri, i go long wan miting blong Jos, i bin tajem hem. Hem i talem: “Fas taem we mi kam long Jos, mi sapraes tumas from se ol pipol oli gat tingting i stap daon. Faswan, oli dresap gud blong kam long Jos. Afta, mi luksave se oli stap long Jos

from wan samting, be i no jes blong stap soemaot olgeta long ol nrafala pipol.”

Famle Randrianarison i baptaes olsem wan famle long 20 Febware 2003. Long tetaem ia, Nirina i gat 8 yia, Sedinirina i gat 17 yia, mo Randrianadri i gat 19 yia. Famle i stop blong wok long ol Sandei, mo oli bin mekem fasin blong laef folet gospel i kam faswan long laef.

OI Jenis

“Afta we mi baptaes, mi bin luk plante jenis insaed long hom blong mifala,” Arelina i talem, we i waef blong Roja. “Hem i kam wan hom we Spirit i stap, mo plante blesing, tugeta blong taem ia long wol mo long saed blong spirit i bin kam from mifala i laef folet gospel.”

Long lukluk long saed blong laef long wol, Roja i talem se Papa long Heven i bin helpem hem blong bildimbak bisnis blong hem. Afta long 2 yia we hem i dreavem taksi mo mekem ol nrafala smol wok we hem i save mekem blong lukluk long famle blong hem, hem i stat blong kasem ol kontrak blong bildim haos. Hem i talem: “Mi biliw se God i blesem mi oltaem taem mi disaed blong folet Hem.”

Be ol boe blong hem oli talem se bigfala jenis we oli bin luk long papa blong olgeta, hem i fasin blong papa blong olgeta. Naoia, oli talem se papa blong olgeta i wan eksampol blong tingting i stap daon mo fasin we i kaen. Roja i talem se gospel i winim tingting blong hem se hem i mas jenism hem. Stat long taem we hem i stat blong stadi long



SAPOT MANE BLONG MEMBA WE I GO LONG TEMPOL

"I gat samfala pat long wol we tempol i stap longwe tumas long ol memba blong yumi, mekem se oli no gat inaf blong pem plen blong go long tempol. From hemia, oli no save tekpat long ol blesing we oli tabu mo i blong taem we i no save finis, we i stap insaed long tempol. Blong help long saed ia, yumi gat wanem we oli sing-aotem Jeneral Sapot Mane blong Memba we I Go long Tempol. Sapot Mane ia, i givim janis blong go long tempol wan taem, long olgeta we bae oli no save go long tempol, be yet, oli wantem tumas blong gat janis ia. Eniwan we i wantem givhan mo i save givim mane i go long basket ia; i simpol, raetem infomesen long nomol donesen pepa we oli stap givim long bisop."

Presiden Tomas S. Monson,
"As We Meet Together Again,"
Liahona, Nov. 2011, 5.

gospel, Roja i bin traem blong fulumap laef blong hem wetem ol gudfala samting.

Hem i talem: "From ol tijing blong gospel, mi neva gat wan sotkaen maen bakegen. Samtaem, i gat samting i kam temtem mi, be gospel i stap long hat blong mi, long hed blong mi, mo long spirit blong mi. Hem i helpem mi blong mi stap kwaet."

Taem ol situesen i kam antap we hem i no harem gud long olgeta, Roja nao i stap blong mekem ol memba blong famle oli putum tingting i go daon, mo i talem bakegen long olgeta blong mekem samting semmak olsem we Sevya bae i mekem.

"Papa blong mi i kam blong putum tingting i stap daon, mo naoia, hem i keagud long famle blong mifala wetem lav," Sedinirina i talem. "Taem mi luk jenis long fasin blong hem, mi talem tangkyu tumas long Papa long Heven, from gospel, mo blong stap olsem ol memba blong Jos."

Wan Famle we I No Save Finis

Long 2006, wetem help blong Jeneral Sapot Mane blong Memba we I Go long Tempol, Roja mo Arelina i bin go long Johanesbeg, long Afrika, blong tufala i sil insaed long tempol.

Long 2009 i go kasem 2011, Sedinirina mo Randrianandri i bin go long misin long Saot Afrika—Sedinirina i go long Kep Taon, mo Randrianandri i go long Johanesbeg. Pat blong tingting blong olgeta blong givim seces i blong helpem ol narafala famle blong oli jenisim laef blong olgeta, semmak olsem famle blong olgeta i bin mekem.

"Wan merikel olsem i save happen; mo i bin happen from ol misinari oli bin kam long haos blong mifala," Randrianandri i talem. "Mekem se mi wantem tumas blong mekem sem samting long wan famle, samples."

Desisen ia i tekem wan nara blesing i go long Randrianarison famle. I bin gat wan taem blong naen dei, we tufala tugeta, Sedinirina mo Randrianandri, bae tufala i stap long Johanesbeg Misinari Trening Senta. Roja i bin mekem se bae oli flae long plen, i go long Saot Afrika wetem Arelina mo gel blong tufala, Nirina, blong mekem se ful famle i save


sil insaed long tempol. Nirina, we i gat 14 yia long taem ia, i bin talem se i had blong tokbaot eksperiens ia, mo wanem hem i bin filim.

Hem i talem: "Hemia i mekem fet blong mi i kam strong moa, mo i bin helpem mi blong filim kolosap moa long God."

Tedei, ol memba blong famle oli wok blong bildim mo mekem olgeta we oli stap raonabaot long olgeta oli kam strong moa. Roja i stap olsem bisop blong wod blong hem. Arelina i wok long Praemerit wetem program blong Fet long God. Sedinirina i wan asisten stek klak. Randrianandri i wan asisten wod klak. Nirina i wod miusik daerekta.

Gospel i bin wan ansa long ol prea blong Randrianarison hom. Hem i hilim ol soa we i open longtaem, i mekem olgeta oli kam kolosap moa, mo i bin givim janis long olgeta blong stap tugeta blong oltaem. Hem i tijim Roja blong lavem man. "Famle laef," hem i talem, "i wan laef we i fulap long lav." ■

Blong travel i go long Saot Afrika blong sil long Johanesbeg Tempol i mekem Randrianarison famle i kam strong moa.



?BAE MATIU I KAMBAK O NOGAT?

Mifala i bin gat wan strong grup blong ol yang man insaed long wod blong mifala, be boe blong mitufala, Matiu, i stap go folem wan we i no memba, we i laekem ol trak mo eni samting we i wok wetem enjin. Sore tumas, yangfala man ia i kamaot long wan famle we i no tingting tumas long religijn. Papa mo mama blong hem i letem fasin blong dring mo smok insaed long hom blong tufala, mo oli no bin bilih se i impoten blong stap klin long saed blong seks.

Matiu i kasem top mak long Skaot, be hem i no bin tekpat long awod miting from se hem i bin stop blong laef folem ol standet blong Skaot. Mi tekem evri Skaot awod blong hem, mo mekem wan smol bokis blong putum gud olgeta. Afta, mi putum i go long wan kona, mi hop se wan dei, ol samting ia bae oli kam impoten long hem. Taem hem i kasem 16 yia, Matiu i stap smok, i stap dring, mo i stap tekem ol drag. Hem i dropaot long skul mo i muv i go stop long haos blong gelfren blong hem. Blong 2 yia olsem, mifala i no stap luk hem.

Mifala i bin harem nogud tumas. Mifala i no save se bae hem i kambak long famle blong hem mo long religijn blong hem o no, be mifala i disaed blong folem eksampol blong Alma, long taem we hem i stretem boe blong hem we i mestem rod. Alma i bin gohed blong lavem boe blong hem, mo i bin prea wetem fet se bae "oli save tekem yu i kam long save blong trutok" (Mosaea 27:14).

Mifala i bin prea oltaem blong Lod bae i mekem wan samting long laef blong Matiu, mo mifala i tekem evri janis blong talemaot, long toktok mo ak-sen, hamas mifala i lavem hem. Taem bae hem i kam long haos, bae mifala i no talem eni samting we bae hem i save tanem olsem wan nogud toktok o wan jajmen. Mifala i stap talemaot glad blong mifala blong stap luk hem.

Wan dei, Matiu i kam hom, mo i talem se hem i wantem toktok. Hem i talem se hem i bin mitim wan gel long wan pati, we i gat kwestin abaot Jos. Bifo hem i talem long gel ia se hem i nomo save ol ansa ia, ol toktok oli stat blong kamaot long maot blong hem.

Mi tekem evri Skaot awod blong Matiu, mo mekem wan smol bokis blong putum gud olgeta. Afta, mi putum i go long wan kona, mi hop se wan dei, Ol samting ia bae oli kam impoten long hem.

Hem i luk se hem nomo i stap ansarem ol kwestin blong gel ia i kwik nomo olsem gel ia i stap askem kwestin. Matiu i talem se hem i no tingbaot se hem i bin lanem eni samting we hem i bin talem, be hem i save se ol toktok we hem i bin talem oli tru. Hem i stap askem hemwan, se from wanem hem i stap gohed long rod ia blong laef we hem i stap long hem, mo semtaem, i stap biliv yet long gospel.

Afta tri dei we hem i stap lukluk-gud long sol blong hem, hem i disaed blong livim biaen laef ia we hem i bin stap lidim. Hem i bin kam hom blong askem help blong hem i stat bakegen.

Matiu i ringim wan kasen brata long wan narafala stet, we i bin winim ol semfala hadtaem, mo i bin askem brata ia sapos hem i save stap wetem hem. Kasen brata blong hem i bin agri, mo Matiu i stat blong go long ol miting blong Jos wetem hem, mo i mitim bisop blong kasem help blong go tru long rod blong sakem sin. Hem i bin filim lav, mo sapot, mo i kam aktiv insaed long Jos.

Long stret taem, hem i mitim wan naesfala yang woman we i gat stret mo gud fasin. Tufala i lavlavem tufala mo tufala i bin mared insaed long tempol.

Taem fas bon pikinini blong tufala i bon long wol ia, mi bin go blong visitim tufala mo tekem smol bokis ia we mi bin mekem wetem ol Skaot awod blong hem. Hem i glad tumas, mo wetem gud hae tingting, hem i hangem long wan ples we oli save lukgud insaed long hom blong hem.

Wan enjel i bin kamaot long boe blong mitufala, olsem i bin hapen long Yangfala Alma. Be rod ia blong Matiu i kambak long trutok, i wan merikel nomo. ■
Oli no talemaot nem



MI BIN STAP HOM

O lsem pat blong wan seves projek, mi bin go long wan trip i go long Rwanda wetem sam narafala dokta blong help wetem sam helt nid. Afta long 2 wik, kolosap long en blong trip blong mi, mi tingting tumas i gobak hom. Mi misim famle blong mi, gudfala bed blong mi, mo hom blong mi.

Long las Sandei blong mi long Afrika, mi bin save stretem taem blong mi blong wok, blong mekem se mi save go long Jos. Nomata we oli no luksave Jos yet long Rwanda, mi bin save faenem, long websaet blong Jos, taem blong miting blong Jos mo dae-reksen blong go long Jos.

Mo ?wanem nao daerekSEN i STAP?: "Wokbaot i go daon long ston rod i krosem bilding blong Ministri. Lukao-tem wan get we i open. Afta wokbaot i go daon long ol step."

Taem mi bin stap folem ol daerek-SEN ia, mi stat blong harem klia kores blong wan hym we mi save gud. Mi go daon long ol step, mo ol toktok blong "Tijing blong Jisas Oli Stamba blong Yumi" (STSP, pej 6) i kasem sora blong mi. Ol step ia oli stop long wan smol bilding. Insaed i gat ova long 12 pipol i stap fasfas raon long doa blong go insaed. Nomata we mi

mi wan strenja long kongregesen we i stap ia, mi filim stret se oli famle blong mi. Plante brata mo sista blong Rwanda oli kam fored blong sekhan long mi, mo taem oli bin mekem ol-sem, bigfala filing ia se mi stap miwan i kamaot long baksaed blong mi—!Mi bin stap hom!

Taem mi go insaed long bilding, mi go long nomol tri aoa miting, we i no defren nating long hemia we mi stap go long hem long hom wod blong

N omata we mi mi wan strenja long kongregesen we i stap ia, mi filim stret se oli famle blong mi. Plante brata mo sista blong Rwanda oli kam fored blong sekhan long mi




mi long Kalifonia. Olgeta we oli gat Aronik Prishud oli pasem sakramen, ol toktok oli tokbaot Sevya, mo tu long Sandei Skul lesen, i semwan we oli tijim long hom wod blong mi long wik ia.

Moa impoten long hemia, Spirit blong Lod i kavremap blokem ol seves ia. I klia. Lod i smaelgud long ol gudfala pipol ia we oli traem bes blong olgeta blong givim seves long Hem. Mi bin lanem se long ol yia bifo, i gat wan smol namba blong ol man Rwanda we oli stap kam long seves long ples ia. Yet, mi kaontem se i gat ova long 100 we i kam, mo haf long olgeta oli ol smol pikinini we oli smael.

Naoia, Rwanda i open blong oli mekem misinari wok long hem, mo mi ting se ol misinari oli gat bigfala sakes taem Spirit i testifae long wan namba, we i stap go antap, blong ol investigeta blong Rwanda, se Jos we i kambak i kingdom blong God blong ful wol—blong evri graon, blong evri pipol, mo evri pikinini blong God. Mi talem tangkyu tumas from Jos, we i stap long medel pat blong Kalifonia, o daon long wan rod blong ston long medel blong Afrika. ■

Stiven Senberi, Kalifonia, YSA



?WANEM NAO I TEKEM YU KAM LONG REKSBE?

Afta plante yia we mifala i laef long ples we ol memba blong Jos oli no plante tumas, hasban blong mi mo mi i muv i go long wan ples long Reksbeg, Aedaho, YSA, we long hem, i gat tu famle nomo we i no memba. Mitufala i laki gud blong stap long saed blong wan long tufala famle ia.

Papa i stap katem gras, hemia long fas taem we mifala i draev long rod i go insaed long haos. Hasban blong mi mo mi i wokbaot krosem yad blong mitufala blong go luk mo save hem. Taem mi stretem han blong mi, mi askem: "So, ?wanem nao i mekem famle blong yu i kam long Reksbeg?"

Hem i ansa: "Wok blong mi—mo mifala i stap lukaotem wan taon we i nidim blong save abaot Kraes."

Mi filim olsem oli sakem wan baket kol wota long fes blong mi, be mi smael. Mi putum tingting long

mi, long taem ia, se nomata wanem niufala neiba blong mitufala i talem o mekem, bae mifala i ol *bes* neiba ia we famle ia bae i gat. Bae mifala i traem blong mekem samting wetem olgeta long wan wei we i gat kaen fasin, lav mo i stret, semmak olsem we bae Sevya i mekem.

Folem eit yia afta, plante aktiviti i bin tekem ples bitwin ol famle blong mifala. Oli invaetem mama ia i go long ol Rilif Sosaeti mo ol aktiviti blong Rilif Sosaeti. Hem i invaetem mi mo plante Lata-dei Sent long wan Kristin dei aot we Jos blong hem i oganaesem. Oli bin invaetem hasban blong mi mo mi i go long danis blong pikinini blong olgeta mo long piano konset blong olgeta. Oli putum olgeta tu i stap long lis blong ol taem blong kuk mo pati blong ol neiba. Mo ol bigfala pikinini blong olgeta oli stap ringim mifala taem oli nidim blong mifala i draevem olgeta i

kambak long haos afta wok, taem oli no save kasem papa mo mama blong olgeta.

Papa mo mama i wari se bae ol pikinini oli stat blong laekem tumas ol Lata-dei Sent, mekem se oli no letem ol boe blong tufala blong joenem Wod Skaot program. Be oli tekem se hom blong mifala i wan sef ples we ol pikinini blong tufala i save kam plei taem ol apu pikinini blong mitufala i stap kam.

Evri taem ol neiba blong mifala oli traem blong helpem mifala blong luk "ol mistek blong fasin blong mifala," mifala i talem bakegen long olgeta se mifala i gat bigfala respek long bilif blong olgeta mo wei we oli laef mo tijim ol pikinini blong olgeta. Afta, mifala i talemaot se mifala i wantem luk semfala respek from ol bilif blong mifala, we i lukluk tu long ol tijing blong Sevya.

Taem mama i traem blong soemaot se ol samting we oli defren bitwin mifala i bigwan, i tumas mo talem se ol Lata-dei Sent oli stap biliv long wan "defren Jisas," mi stap talemaot long hem bakegen se mitufala tugeta i bili se Jisas i kam long heven, mo Hem i Pikinini blong God we God i lavem tumas. Long en, hem mo mi i gat wan gudfala rilesensip.

Famle blong olgeta i muv i go defren ples, be oli no joenem Jos. Be sapos oli save talem se: "Mifala i bin laef long medel blong ol Momon; oli ol gud pipol we oli gat respek, mo ol tru hat," nao bae mi filim se mifala i gat sakes blong stap olsem ol gud neiba, mo helpem olgeta blong kam moa open mo stret long jajmen blong olgeta abaot ol Lata-dei Sent. ■

Sandra Ras, Aedaho, YSA



Mi putum tingting long mi, long taem ia, se nomata wanem niufala neiba blong mitufala i talem o mekem, bae mifala i ol *bes* neiba ia we famle ia bae i gat.

WAN BOKIS BLONG OL PIKJA

Sam yia i pas, hasban blong mi mo mi i stap go sakem ol dotti long ples blong dotti taem mi luk wan woman we i wok long ples ia, i pikimap wan bokis blong putum long masin blong faea blong bonem dotti. Be, bokis ia i brok, i open, mo sam foto oli foldaon.

Taem mi stap lukluk i go, mi gat strong filing blong go mo karem bokis blong pikja ia. Mi jamaot long trak blong helpem hem blong pikimap ol pikja. Woman ia mo mi i filim se ol foto ia, ating oli mestem mo oli sakem, mo mi winim tingting blong hem blong hem i letem mi tekem ol pikja ia blong traem faenem wan we i wantem gat ol pikja ia.

Taem mi gotru long plante handred foto insaed long bokis ia, mi faenem wan envelop wetem wan adres blong wan long Wobeg, Albeta, Kanada. Ova long ol yia we i kam afta, mi bin raetem sam leta i go long sam pipol wetem semfala las nem ia, be mi neva gat wan ansa.

Afta we famle blong mifala i kasem Intanet, mi faenemaot se i bin gat wan histri sosaeti long Wobeg. Mi bin askem sapos eniwan we i wok long ples ia i luksave ol nem we mi bin faenem long bak blong ol pikja ia.

Wan manis afta, mifala i kasem wan telefon kol i kam long wan man we histri sosaeti i bin kontaktem hem. Hem i talem se sista blong hem i stap kolosap long mifala, mo hem i askem sapos hem i save luk ol pikja. Yes, mifala i talem yes long hem.

Long nekis dei, Floed mo Bet Hotorn, tufala i Lata-dei Sent, tufala i kam blong luk ol pikja. Taem mi openem bokis, Brata Hotorn i talem: "Yes, hem hemia," i poenem i go long pikja we i stap antap evriwan. Hem

i pikja blong bubuman blong Sista Hotorn.

Taem oli pikimap wan pikja folem nara pikja, Brata mo Sista Hotorn i talemaot stori abaat ol pipol long wanwan foto. Tufala Hotorn i gat tu tingting se tufala i famle wetem man o woman we i bin sakem ol foto ia, mo oli no save from wanem ol foto ia oli go kasem ples blong dotti.

Mi bin gat strong filing se Papa long Heven i bin helpem mi blong givimbak ol foto ia long Hotorn famle. Mi testifae se wok blong famle histri i wan long ol wok we i impoten blong yumi mas mekem. Sapos yumi glad blong mekem wok, Lod bae i helpem yumi blong mekem wok ia. ■

Sindi Hegi, Albeta, Kanada

Be, bokis ia i brok, i open, mo sam foto oli foldaon. Taem mi stap lukluk i go, mi gat strong filing blong go mo karem bokis blong pikja ia.



?Olsem Wanem Nao Bae Mi Stap Olsem Wan Misinari we I WOK GUD?

*Nomata kompanion blong mi mo mi i wokhad, evriwan i
stap sakemaot mesej blong mitufala. ?Wanem nao mitufala
i save mekem blong kam ol misinari we i wok gud?*

I Kam long Loren Bangata Waeld

Mi bin stap long misin blong mi blong moa long wan yia, afta, mi kasem wan spesel hadtaem. Mitufala i stap long medel blong wan taem we weta i nogud tumas—jes kamaot long kolkol winta mo stap muv i go long springtaem. Mo nomata we kompanion blong mi mo mi i wokhad, evriwan we mitufala i stap toktok wetem, i sakemaot mesej blong mitufala wantaem. Taem mitufala i mit wetem ol narafala misinari, mifala i lanem se wok blong olgeta i gud mo i strong. Mi no save tingabot wan risen from wanem mitufala i no save wok gud. Mi bin stap ia longtaem inaf blong toktok gud lanwis; kompanion blong mi mo mi i gudfala fren, mitufala i kasem tras blong ol memba, mo mitufala i traem blong folem Spirit mo obei stret long ol misin rul.

Be nomata wanem samting mitufala i stap mekem, mitufala i fesem man we i sakemaot mitufala long evri kona. Wik afta wik wetem sem samting, mi letem konkon fasin blong mi i winim gud fasin blong mi. Long wan taem blong mekem plan, mi talemaot: “?Bae from wanem? I no gat man i stap lisin long yumitu ia.” Kompanion blong mi,

we lukluk blong hem i gud moa long mi i talem simpol nomo: “Yumitu putum gol blong yumitu blong soemaot fet blong yumitu. Yumitu foemap ol gol blong yumitu blong kaontem ol blesing blong yumitu.”

Taem mi tingting long wanem hem i talem, mi luksave se mi bin stap yusum rong mak blong skel blong jajem sakes blong mi olsem wan misinari. *Prijim Gospel blong Mi: Wan Gaed long Misinari Seves* i givim wan lis blong ol fasin blong ol misinari we oli gat sakes¹ mo mi luksave se evri fasin ia, misinari i save kontrolem. Mi no save kontrolem sapos ol pipol insaed long misin blong mi bae oli akseptem mesej o no, be mi save kontrolem kaen misinari we mi jusum blong kam. Kompanion blong mi i soem se sapos mi gat moa fet long Jisas Kraes, mo moa glad long ol blesing blong Lod, bae mi luksave ol wei we mi kam wan misinari we i wok gud finis.

Fet I Saenem Rod blong Ol Merikel

I putum tingting blong mi i stap daon taem mi luksave se fet blong mi i stap go daon. Mi lukaotem ol ples we mi save mekem fet blong mi i kam

strong moa, mo faenem se taem ol samting oli no wokaot folem plan, mi letem tingting blong mi i kam slak. *Prijim Gospel blong Mi* i talem: “Be, yu no mas lusum hop mo daonem tingting blong yu; fasin blong lusum hop olsem bae i save mekem fet blong yu i go daon, bae wok blong yu i go daon, bae yu nomo wantem blong mekem samting, mo bae yu gat moa hadtaem blong folem Spirit”² Mi luksave se mi bin letem ol taem we mifala i no gat sakes oli mekem fet blong mi i go daon.

Mi stat blong prea blong gat jenis long hat mo gat moa fet. Mo tu, mi dipen long promes we i stap long Momon 9:21: “Eni man we i biliv long Kraes, mo i no gat tingting nating blong no biliv strong; eni samting we bae hem i askem long Papa long nem blong Kraes, bae i givim long hem; mo promes ia i go long evriwan, hem i long ol en blong wol.” Promes ia i lidim mi blong prea moa strong from ol blesing mo ol merikel we kompanion blong mi mo mi i filim se mitufala i nidim, mo oltaem talem: “Olsem we Yu Yu Wantem.” Ol prea ia oli bin helpem mi blong akseptem ol jenis



STAP KAM WAN MISINARI WE I WOK GUD

Yu save kam blong save se yu bin wan misinari we i wok gud o gat sakeses taem yu:

- Filim Spirit we i testifae long ol pipol tru long yu.
- Lavem ol pipol mo yu wantem se bae [Jisas i sevem olgeta.]
- Obei stret evriwan.
- Dvelopem ol sem fasin olsem hemia blong Kraes.
- Wonem ol pipol long ol samting we i kamaot long sin. Invaetem olgeta blong mekem mo kipim ol komitmen.
- Go mekem gudfala samting mo stap sevem ol pipol long eni janis we yu gat, nating oli akseptem o no akseptem mesej blong yu.

I kamaot long *Prijim Gospel blong Mi: Wan Gaed long Misinari Seves* (2004), 11-12.



LUKLUKGUD BLONG LOD I AKSEPTEM YU

"Wetem ful hat blong mi, mi invaetem yufala blong wantem lukaotem blong Lod i akseptem yumi mo stap glad long ol blesing we Hem i promesem. . . . bae yumi kam blong save se Hem i akseptem yumi, nomata wanem posisen, ples, mo bodi yumi gat. Fasin we Hem i akseptem yumi bae i pusum yumi, i mekem fet i kam antap, mo i helpem yumi blong lukluk long evri samting yumi fesem long laef. Nomata ol jaljen blong yumi, bae yumi gat sakeses, yumi gro [luk long Mosaea 2:22], mo filim se yumi stap long pis [luk long Mosaea 2:41]."

Elder Erik W. Kopiske blong Olgeta Seventi, "Stap Olsem Wan we Lod I Akseptem," *Konfrens Ripot*, April 2013.

long ol plan, mo ol taem we mitufala i no gat sakeses wetem moa fet, wetem save ia se Papa long Heven i stap ansarem ol prea oltaem—nomata ol ansa oli kam long ol wei we yumi no tingting long hem. Mi kam blong save luksave moa ol wei we Lod i stap lidim mifala long hem truaot long dei blong mifala.

Taem mi wok blong mekem fet blong mi i kam strong moa, mi faenem gud toktok we i stap long *Prijim Gospel blong Mi* i tru: sapos yu mekem tingting blong yu i kam antap, bae yu wok gud moa, bae tingting blong hat blong yu i gro, mo bae yu save folem Spirit long wan wei we i gud moa. Antap long hemia, mi gat moa hop long misinari wok mo misinari seves blong mi taem mi save luksave mo glad long ol merikel we oli bin stap hapen evri dei.

Fasin blong Talem Tangkyu I Atakem Fasin blong Stap Jalus

Lod i stat blong soemaot long mi se Hem i stap mekem ol merikel long wanwan long mifala evri dei—be mi no bin save luksave kasem taem mi mekem strong tingting blong stap talem tangkyu wetem hat blong mi. Blong talem tangkyu i moa bitim blong i stap olsem wan gud fasin o wan stret fasin. Taem mi talemaot tangkyu long Lod mo long ol narafalawan, mi gat paoa. Mi faenem se mi glad tumas long ol nara misinari taem oli gat sakeses, be mi no stap jalus (luk long Alma 29:14, 16). Mi bin save lukluk moa long wanem we mi gat, mo wanem we i bin go gud bitim we blong lukluk long wanem mi no gat, mo wanem i no bin go gud.

Mi bin lanem se fasin blong talem tangkyu i meresin blong posen blong stap komperem yumi long ol narafala man. Ol taem ia, we mi no filim blong

stap olsem wan misinari we i wok gud, i hapen from se mi stap talem long miwan: "Mi mi no mekem gud nating semmak long olgeta," o, "Olgeta oli wok gud moa long samting ia i bitim mi." Mi bin lanem tu se nomata hem i paten blong Lod blong givim yumi ol stret mo gud eksampol blong mekem folem, hem i giaman blong Setan blong temtem yumi blong komperem yumi blong faenemaot se yumi impoten o yumi gat sakeses. Be insaed long *Prijim Gospel blong Mi* i talemaot klia samting ia: "Yu no mas stap komperem yuhan wetem ol narafala misinari mo stap skelem ol frut blong ol wok blong yu wetem hemia blong olgeta."³ Long en, fasin blong talem tangkyu i bin hel-pem mi blong no gat hae tingting mo i mekem mi tingbaot se Lod i bos long wok blong Hem. Mi no nidim blong stap jalus from i luk se ol narafala fren misinari oli gat moa sakeses.⁴

Tru Mak o Skel blong Sakeses

Bifo mi jenism wei blong lukluk long ol samting, mi bin stap lukluk nomo long wan kaen blesing, we i mekem mi fogetem blong livim ae blong mi i open long ol nara wei we Lod i bin stap ansarem ol prea blong mitufala, mo stap blesem misinari wok blong mitufala. Long en, Lod i stat blong blesem misinari wok long eria blong mitufala long sam naes wei we mitufala i no ting long hem. Mitufala i faenem ol pipol we oli rere blong akseptem mesej blong mitufala, be mi bin lanem finis, long taem ia, se mi no mas skelem sakeses blong mi wetem joes blong ol narafala.

Presiden Godon B. Hinkli (1910–2008) i serem kaonsel blong wan presiden long saed blong misinari wok: "Mekem bes blong yu, bes we beswan blong yu. Talem prea blong yu mo wok had mo livim Lod i sendem ol



Long plante wei, mak blong makem sakeses blong mi olsem wan misinari, oli save jajem long hamas mi wantem sakem sin, mo hamas mi gat strong tingting blong gohed blong wok.

man i kam long yu.”⁵ *Prijim Gospel blong Mi* i tijim ol semmak samting abaot ol misinari we oli gat sakeses: “Mekem bes blong yu blong tekem ol sol oli kam long Kraes, mo luklukgud blong lanem samting mo kam antap.”⁶

Sapos mi save stap gohed blong wantem sakem sin, sapos mi save ones mo ripot long Lod se mi bin stap mekem bes blong mi, mi save trastem miwan se mi bin wan misinari we i wok gud—nomata se pipol i akseptem mesej blong mifala o no. Long plante wei, mak blong makem sakeses blong mi olsem wan misinari, oli save jajem long hamas mi wantem sakem sin, mo hamas mi gat strong tingting blong gohed blong wok.

Mi gat plante merikel we mi rekomdem longjenol blong mi abaot taem blong mi long misin. Taem mi bin stap traehad blong stap moa fetful mo talem tangkyu moa, lukluk blong mi i kam gud moa, mi nomo slakem

tingting, mo mi bin filim Spirit plante moa long wok ia. Mi bin faenem se wanem we *Prijim Gospel blong Mi* i stap tijim, i tru: “Taem yu mekem evri samting we yu save mekem, bae yu save yet samtaem, lusum hop, be bae yu no save lusum hop long yuwan o yu no save tingting daon long yuwan. Yu save filim tru se Lod i glad long yu taem yu filim se Spirit i wok tru long yu.”⁷ Mo taem mi bin filim se Lod i bin glad long mi, mi bin save stanap strong tru long eni tes. ■

Woman we i raetem hemia i stap long Mein, YSA.

OL NOT

1. Luk long *Prijim Gospel blong Mi: Wan Gaed long Misinari Seves* (2004), 10–11.
2. *Prijim Gospel blong Mi* 11.
3. *Prijim Gospel blong Mi* 11.
4. Luk long Jefri R. Holan, “Olgeta Wokman insaed long Plantesen,” *Konfrens*, Mei 2012, 31.
5. Godon B. Hinkli, “Find the Lambs, Feed the Sheep,” *Liahona*, Julae 1999, 120.
6. *Prijim Gospel blong Mi* 11.
7. *Prijim Gospel blong Mi* 11.

SEREM EKSPERIENS BLONG YU

“Mi jes kambak long misin blong mi, mo mi filim se mi nomo save se mi stap ia from wanem. ?Wanem nao bae mi mekem?”

Ol riten misinari. Plis, talem long mifala olsem wanem yu mekem blong aot long laef blong misin i gobak hom mo yu gohed wetem skul, wok, o sam narafala samting. Sendem eksperiens blong yu tru long imel, liahona@ldschurch.org o sendem tru long Intanet long *liahona.lds.org*. Plis putum ful nem blong yu, deit we yu bon, mo nem blong wod o branj blong yu.



Stap Kam Wan Misinari blong *Prijim Gospel blong Mi*



I Kam long Elda
Deved A. Bedna

Blong Kworom
blong Olgeta
Twelef Aposol

!Yu save mekem hemia! Lod ia we yu stap ripresentem mo givim seves long Hem, i save se yu save mekem wok ia. Mi save se yu save mekem hemia.

Wan Aposol, hem i faswan,
mo antap long evri samting,
mo oltaem, wan misinari.
From risen ia, mi glad tumas blong
toktok long yufala olsem ol wokman
long bigfala wok ia blong ol las dei.

?WANEM HEM I WAN
MISINARI BLONG PRIJIM
GOSPEL BLONG MI?

Wan misinari blong *Prijim Gospel blong Mi* i wan wokman blong Lod, we oli singaotem hem tru long profesi, mo i kasem atoriti tru long fasin blong putum han antap long hed blong man, mo i talemaot gospel ia we i kambak mo i no gat en blong Sevya long wei blong Hem (luk long

D&C 50:13–14, 17–24; D&C 68:1).

Stamba tingting we i kavremap wok blong wan misinari we oli tokbaot insaed long *Prijim Gospel blong Mi*, hem i blong “helpem ol narawan blong kam long Kraes tru long fet long Jisas Kraes mo Atonmen blong Hem, fasin blong sakem sin, kasem presen we i Tabu Spirit, mo stanap strong kasem en.”¹

Tabu responsabiliti blong talemaot, wetem atoriti, gospel mo givim ol odinens blong sevem laef, i bin wan wok we i bin stap stat long taem we God i sendem Adam i kamaot long Garen blong Iden mo bambae i gohed kasem taem Hae Jehova bae i talem se wok ia i finis.²

OL SAMTING WE WAN I MAS MEKEM BLONG KAM MISINARI BLONG PRIJIM GOSPEL BLONG MI

Mi wantem tokbaot faef stamba samting blong mekem blong kam ol misinari blong *Prijim Gospel blong Mi*.

Wok #1: Ol misinari blong Prijim Gospel blong Mi oli andastanem se oli givim seves mo ripresentem Jisas Kraes.

Ol misinari blong *Prijim Gospel blong Mi* oli save mo andastanem huia oli ripresentem, from wanem oli stap givim seves, mo wanem nao bae oli mekem. Oli singaotem ol fultaem misinari blong givim seves, mo oli setem olgeta apat long stret fasin olsem ol wokman mo ripresentativ blong Lod Jisas Kraes. Yumi talem witnes abaot nem blong Hem, mo se i tru se Hem i stap, Hem i tabu, mo yumi talem witnes abaot misin blong Jisas Kraes i go long evri kantri, mo famle, mo lanwis, mo pipol (luk long D&C 133:37).

Yumi lavem Lod. Yumi givim seves long Hem. Yumi folem Hem. Yumi ripresentem Hem.

Ol stamba tingting blong Hem, oli mas kam ol stamba tingting blong yumi. Ol intres blong Hem, oli mas kam ol intres blong yumi. Wok blong Hem, i mas kam wok blong yumi. Ol wei blong Hem, oli mas kam oli wei blong yumi. Tingting blong Hem, slo-slo, i mas kam tingting blong yumi.

Olsem ol ripresentativ blong Ridima, yumi stap prijim stamba dok-trin mo prinsipol blong gospel we i kambak blong Hem long simpol mo klia fasin. Yumi no stap presentem ol tingting blong yumiwan, o sam tingting olbaot. Yumi talemaot mo testifae abaot ol simpol trutok we i kambak, long wei blong Lod mo tru long paoa blong Spirit blong Hem.

Ol misinari blong *Prijim Gospel blong Mi* oli andastanem se responsabili blong ripresentem Sevya mo testifae



- Yumi ol ripresentativ blong Ridima mo Sevya blong wol, we yumi nao i gat raet.
- Oli singaotem yumi blong talemaot gospel ia we i kambak mo i no gat en, we i blong Hem.
- Yumi no save gat ol mak blong wol, mo semtaem, gat raet ia blong ripresentem Hem mo mekem samting wetem paoa blong tabu nem blong Hem.
- Yumi no save helpem ol narafala man blong kamaot long fasin blong stap slef long sin, sapos yumiwan bakegen, yumi fas insaed long sin (luk long D&C 88:86).
- Yumi no save helpem ol narafala man blong lan blong sakem sin, sapos yumiwan, yumi no bin lanem blong sakem sin long stret fasin mo sakem sin fulwan.
- Yumi save talemaot mo prij wetem paoa long wanem nomo we yumi stap traem blong kam.
- Bambae yumi mas ansa long fes blong God from ol gudfala tingting blong hat blong yumi, mo tu, long fasin we yumi stap klin inaf blong tekem aksen olsem ol wokman blong Hem.

abaot Hem, i neva stop. Plis tingbaot Hem long evri samting we yu stap tingting long hem, long evri samting we yu stap mekem, long evri samting we yu stap traem blong kam, mo ripresentem Hem long stret fasin long evri pikinini blong Papa long Heven we bae yu toktok o wok wetem, naoia mo oltaem.

Wok #2: Ol misinari blong Prijim Gospel blong Mi oli klin inaf.

Wan samting we wan i mas gat bifo hem i kam wan misinari blong *Prijim Gospel blong Mi* hem i blong hemwan, hem i mas klin inaf long fes blong Sevya.

Bae mi talemaot sam simpol trutok long wan wei we i kliagud.

Naoia i stap, i no wan mas blong yumi kam stret evriwan. Be, yumi kasem komanmen blong stap klin mo wokbaot long stret fasin long fored blong Ridima blong Isrel. Lod i talem se olgeta we oli stap tekem toktok blong Hem i go, oli mas stap klin (luk long D&C 38:42).

Fasin blong sakem sin, hem i wan prinsipol blong hop mo hiling—i no blong slakem tingting mo lusum hop. Fasin blong sakem sin i mekem man i putum tingting i stap daon—i no mekem man i fraet. Fasin blong sakem sin i, long semtaem, askem fulap samting mo i givhan, i askem blong yu mekem samting i stretgud mo i mekem yu ha-reng gud. Fasin blong sakem sin, hem

i wan presen we praes blong hem i bigwan tumas, mo i stap blong yumi yusum tru long Atonmen blong Hem we yumi stap lavem Hem, yumi givim seves long Hem, mo folem.

Nomata we yu mekem ol bigfala sin, tru long Atonmen blong Jisas Kraes, mo tru fasin blong sakem sin, yu bin kam, o yu save kam klin mo klin inaf.

I gat ol yut we i stap, we oli nidim yet blong sakem sin. Taem hem i naoia. Plis, plis, plis, yu no pusumbak dei blong yu sakem sin.

I gat ol yut we oli bin sakem sin, mo oli stap gohed blong sakem sin, mo oli stap askem olgetawan sapos oli bin mekem evri samting we i nid blong Lod i akseptem olgeta (luk long D&C 97:8). Plis tingbaot. Lod i askem yu blong yu stap klin, be i no blong yu kam strel evriwan. Tabu Spirit we i wok bakegen long laef blong yu i wan ki we yu save trastem we i talemaot long yu se Lod i fogivim yu o no, from se “Spirit blong Lod i no stap long ol tempol we i no tabu” (Hileman 4:24). Mo luksave se oda



ia blong “fogivim evri man” (luk long D&C 64:10) hem i tekem tu blong yu fogivim yuwan.

Ol misinari blong *Prijim Gospel blong Mi* oli ol disaepol blong Lod Jisas Kraes we oli givim ona long kavenan, mo oli obei long komanmen. Plis, oltuem tingbaot Hem, mo stap klin gud mo klin inaf blong ripresentem Hem.

Wok #3: Ol misinari blong *Prijim Gospel blong Mi* oli holemtaet gud ol toktok blong laef we i no save finis.

Mi invaetem yu blong yu holemtaet gud oltaem long maen blong yu, ol toktok blong laef (luk long D&C 84:85). Blong holemtaet gud ol toktok blong laef we i no save finis i moa bitim blong stadi, mo lanem ol toktok bae hat, o blong “kakae long ol toktok blong Kraes” (2 Nifae 31:20; luk tu long 2 Nifae 32:3); hem i moa bitim blong jusum samting, o kakae wan smol kaekae. Blong holemtaet gud i minim blong lukluk nomo long wan samting mo wok from, blong lukluk raon mo tekem samting, blong tingting hevi mo stap prea, blong yusum samting long laef mo lanem, blong luk samting i impotem mo glad long hem, mo blong stap glad long wan samting mo stap laekem blong yusum samting ia.

Tingbaot olsem wanem ol boe

blong Mosaea—fo gudfala misinari, we nem blong olgeta i Amon, Eron, Omna, Himnae—“oli bin kam strong long save blong trutok; from oli ol man blong wan stret haremsave mo oli bin stadi long ol skripja strong oltaem, blong oli save andastanem toktok blong God” (Alma 17:2).

Ol strong misinari ia, i tru we oli bin holemtaet gud ol toktok blong laef we i no save finis. Oli no bin sarem ae, o mekem skripja stadi blong olgetawan mo kompanion skripja stadi nating nomo. Save long saed blong spirit, o andastaning i bin go daon insaed long wol blong olgeta, mo insaed long hat blong olgeta, i gat konfemesen se ol doktrin mo ol prinsipol blong gospel oli tru, mo hemia tru long paoa blong Tabu Spirit.

Olsem ol ripresentativ blong Sevya, yu mo mi, i gat wan responsabiliti we i gogohed, blong stap wok strong wetem strong tingting mo blong putum gud insaed long hat blong maen blong yumi, ol stamba doktrin mo prinsipol blong gospel we i kambak, speseli, olgeta we oli stap long Buk blong Momon. Taem bae yumi mekem olsem, blesing we Hem i promesem yumi i we Tabu Spirit bae i “mekem yufala i tingbaot olgeta samting ya bakegen” (Jon 14:26) mo bae i givim paoa long yumi taem yumi stap tij mo testifae. Be Spirit i save wok wetem mo



tru long yumi nomo sapos yumi givim Hem wan samting blong wok wetem. Hem i no save helpem yumi blong tingbaot ol samting we yumi no bin lanem (luk long Alma 31:5).

Ol misinari blong *Prijim Gospel blong Mi* oli stap holemaet gud oltaem ol toktok blong laef we i no save finis, oli dipen long paoa blong toktok, mo oli gat paoa blong toktok i stap insaed long olgeta. Plis, oltaem tingbaot Hem, oltaem stap klin inaf blong ripresentem Hem, mo holemaet gud mo dipen long paoa blong toktok.

Wok #4: Ol misinari blong *Prijim Gospel blong Mi* oli andastanem se Tabu Spirit i wan tija ia nomo, mo i tru tija.

Tabu Spirit i nambatri memba blong Godhed, mo Hem i witnes blong evri trutok mo i wan tija ia nomo, mo i tru tija. Ol lesen we yumi tijim, mo ol testemoni we yumi talem, oli blong mekem yumi rere from wan investigeta we i stap tekem aksen mo i stap lanem samting blong hemwan.

Olsem ol misinari, wan long ol wok blong yumi we i moa impoten, hem i blong invaetem ol investigeta blong yu-sum fridom blong olgeta blong mekem joes, mo blong oli tekem aksen folem ol tijing blong Sevya. Blong mekem mo kipim ol komitmen long saed blong spirit, olsem blong prea blong kasem wan witnes blong trutok, blong stadi mo prea long saed blong Buk blong Momon, blong stap go long ol miting blong Jos, mo stap kipim ol komamen, i nidim blong wan investigeta i yusum fet, i tekem aksen mo i jenis.

Nomata hamas yumi stap givim seves, yu mo mi, i no save pusum o fosem trutok blong go insaed long hat blong ol investigeta. Bes wok blong yumi, i blong tekem mesej blong trutok *i go long* hat (luk long 2 Nifae 33:1). Long en, wan investigeta i nidim blong tekem aksen long stret mo

gud fasin, mo long wei ia, i invaetem trutok *i go long* hat blong hem. Long wei ia nomo, olgeta we oli ones blong lukaotem trutok mo ol niufala konvet bae oli developem wan paoa, long saed blong spirit, blong faenem ol ansa olgetawan.

From se responsabiliti blong yumi i blong helpem ol investigeta blong lanem samting tru long fet mo tru long paoa blong Tabu Spirit, wok ia, i neva abaot mi mo i neva abaot yu. Yumi nid blong mekem evri samting we yumi gat paoa blong mekem blong mekem misinari responsabiliti blong yumi, mo semtaem, "kamaot long rod" blong letem Tabu Spirit i save mekem tabu wok blong Hem. Wanem we i tru, i we, eni samting we yu o mi i mekem olsem ol ripresentativ blong Sevya we yumi save se bae i pulum tingting blong man long yumiwan—long ol mesej we yumi stap prisentem, long ol fasin blong wok we yumi yusum, o long fasin blong yumiwan o wei we yumi luk—i wan wei blong stap olsem wan giaman pris we i stap stopem Tabu Spirit blong wok gud.

Lod i askem se ?wan man o woman i stap prijjim toktok blong trutok tru long Spirit blong trutok, o tru long sam narafala wei? Sapos hem i tru long sam narafala wei, nao hem i no kam long God (luk long D&C 50:17–18).

Plis, oltaem tingbaot Hem. Stap klin inaf blong ripresentem Hem, blong holemaet gud toktok blong Hem, mo letem wan tija ia nomo, mo tru tija ia, Tabu Spirit, blong i testifae long evri trutok.

Wok #5: Ol misinari blong *Prijim Gospel blong Mi* oli andastanem se, blong tij, i moa bitim blong toktok mo talemaot samting.

Taem Sevya i bin stap long Hil blong Tri Ia Olif, Hem i talemaot se: "Be taem oli kam tekem yufala blong traem yufala, yufala i no wari. Yufala i no tingting tumas se ?Bambae mi talem wanem tok long olgeta?" Yufala i mas talemaot ol tok ya we Tabu Spirit bambae i givim long yufala stret long taem ya, from we bambae i no yufala nomo i tok, be Tabu Spirit bambae i tok long maot blong yufala" (Mak 13:11).



Sevya, long ol fas dei blong dispensesen ia, i givim instraksen long ol misinari blong oli mas openem maot blong olgeta mo bae maot blong olgeta bae i fulap (luk long D&C 33:8, 10), mo oli mas leftemap voes blong olgeta long ol pipol, mo oli mas talemaot ol tingting we bae Hem i putum long hat blong olgeta, mo bae oli no lusum fes long fored blong man, be, bae Hem i givim long olgeta long stret aoa, long stret taem, ol samting we bambae oli talem (luk long D&C 100:5–6).

Ol skripta ia, oli poenemaot wan paten we i strik mo i askem fulap paoa blong prij mo helpem ol investigeta blong lanem trutok. Ol misinari blong *Prijim Gospel blong Mi* oli save se yumi no stap tijim ol lesen; yumi tijim ol pipol. Yumi no stap talemaot nating baehat, o presentem ol mesej we yumi lanem baehat abao ol topik blong gospel. Yumi stap invaetem olgeta we oli stap lukaotem trutok blong oli gat wan eksperiens blong bigfala jenis long hat. Yumi andastanem se blong toktok mo talem samting nomo, i no blong tij.

Blong prijim gospel long wei blong Lod, i minim blong save lukluk ol samting fastaem, mo lisin, mo luksave samting bifo yu toktok. Oda we ol fofala samting ia i happen, mo i joen tugaeta, i impoten. Plis, yufala i mas save se blong lukluk gud samting, mo lisin, i kam fastaem blong luksave; mo blong luklukgud samting, lisin mo luksave, oli kam fastaem long toktok. Taem yu stap yusum paten ia, bae i mekem se ol misinari oli save faenemaot mo tij folet nid blong ol investigeta.

Taem yumi stap lukluk gud samting, lisin mo luksave, bae Lod i givim long yumi long stret aoa, pat ia we bae Hem i givim long evri man (luk long D&C 84:85)—we oli ol trutok blong tokbaot gud, mo ol ansa blong givim we i stretem gud ol stret nid blong wanwan investigeta. Taem yu mekem olgeta samting ia nomo



we i blong lukluk gud samting, lisin mo luksave, nao bae Spirit i lidim yu blong talem mo mekem ol samting we bae i helpem gud olgeta we yu stap givim seves long olgeta.

Blong stap luklukgud samting, i wan impoten wei blong rere blong kasem presen ia blong luksave samting. Fasin blong luksave samting, i blong luk wetem ol ae blong spirit *mo* blong filim wetem hat—blong luk mo filim se wan tingting i wan giamanwan, se wan man o woman i gat gud fasin, o luksave nekis prinsipol i we i gat nid blong helpem wan investigeta. Fasin blong luksave samting, hem i blong harem samting wetem ol ae blong spirit *mo* filim wetem hat—blong harem mo filim wari ia we man o woman i no talemaot long wan toktok o kwestin, blong harem mo filim trutok blong wan testimoni o doktrin, o stret save mo pis we i kam tru long paoa blong Tabu Spirit.

Ol misianri blong *Prijim Gospel blong Mi* oli tekem aksen wetem fet, mo Spirit i lidim olgeta blong helpem ol investigeta blong oli lanem trutok. Plis, oltaem tingbaot Hem; stap klin inaf blong ripresentem Hem; holemtaet gud toktok blong Hem; letem Tabu Spirit i witnesem evri trutok; mo lukluk gud samting, lisin, mo luksave samting taem yu stap testifae abao Jisas Kraes long ol ones man mo woman we oli stap lukaotem trutok.

!YU SAVE MEKEM HEMIA!

Yu save ridim mesej blong mi mo bilivim se evri narafala yut oli save mekem, mo bae oli mekem wanem we mi bin tokbaot. Be tu, yu save askem yuwan sapos yu save mekem. !Yu save mekem hemia!

Sapos mi save kasem wanem hat blong mi i wantem, bae mi tekem smol taem wetem wanwan long yufala. Bae mi sekhan long yu, kam kolosap long yu, luk stret long ae blong yu, mo talem: “!Yu save mekem hemia! Lod we yu stap ripresentem mo wok blong Hem, i save se yu save mekem hemia. Mo olesm wokman blong Hem, mi promesem yu se bae yu kasem help blong Hem. Plis, tingbaot oltaem se wetem help blong Hem, mo wetem paoa blong Hem, lyu save mekem hemia!

Mi lavem yu mo prea taem yu stap traehad blong kam wanem we yu nid blong kam, bae yu luksave mo mekem samting wetem fet tru long voes mo daereksem blong Lod. Afta, bae i tru se bae yu kam ripresentativ blong Lod Jisas Kraes we i gat paoa mo i wok gud. ■

I kamaot long wan divosen toktok we hem i givim long Provo Misinari Trening Senta long 24 Jun 2011.

OL NOT

1. *Prijim Gospel blong Mi: Wan Gaed long Misinari Seves* (2004), vii.
2. *Teachings of Presidents of the Church: Joseph Smith* (2007), 142.

Jes

SMAEL mo TALEM NO

I Kam long Hesel Meri Tibule

Wan samataem, mi tekpat long wan smol wok long wan ae-lan long Bikol, Filipin. Taem mi lukluk i go long solwota, i naes tumas, mo mi wantem luk samting ia evri moning.

Be, mi no laekem ol naet taem. Hemia i taem we ol pipol long kamp bae oli stat dring mo gat pati. Oltaem oli invaetem mi blong go long ol pati olsem, mo ol nara fren blong mi mo mi i mas go, from se sapos mifala i no go, i olsem se mifala i no gat respek.

Fas pati, hem i wan pati blong wel-kamem ol niu wokman long wok. Mi fraet blong go, from se mi save gud se bae oli givim dring mo mi no save stret olsem wanem blong talem no. Mi sing-aotem wan fren long wod blong mi long hom, mo hem i givim sam gudfala advaes we i leftemap tras blong mi.

Taem pati i stat, oli stat blong givim ol dring long mifala, be laki, oli no fosem mifala blong dring. Ol fren blong mi oli akseptem se mi mi no stap dring, mo afta, i kam isi blong no akseptem wan dring—kasem wan naet. Long wan long ol pat ia, presiden blong kampani i kam. Hem i stap holem wan botel blong *lambanog* (wan lokol waen we oli mekem long kokonat). I no longtaem afta we hem i kasem pati, mi bin luk hem i stap

kapsaetem sam waen ia i go. Afta hem i talem: "Yu mas lan olsem wanem blong dring" mo i givim wan glas long wan long ol niu wokman ia. Woman ia i dring glas ia kwiktaem.

Hat blong mi i stat blong pam strong. Bae i no longtaem, bae i raon blong mi. Mi stap toktok sloslo long miwan: "Bae mi no dring. Bae mi no dring." Afta, mi luk presiden i givim

*Mi bin stap talem no long
olgeta we oli givim dring long
mi, be naoia, presiden blong
kampani i stap givim wan
glas waen long mi.*

glas waen long mi. Mi no save wanem blong mekem. Ol fren blong mi oli stap lukluk mi, oli wet se bae mi mekem wanem. Mi smael long presiden mo wetem tingting i stap daon, mi talem: "Sore masta, be mi mi no dring."

Mi save se hem i harem nogud. Hem i askem se from wanem mi no stap dring. Mi talem: "Mi mi wan Momon."


Hem i talem: "Mi no harem abaot relijin ia. I saon olsem wan kaen kae-kae." Evriwan i laf.

Mi smael tu, i no from fani tok blong hem, be nomo, from se mi save se mi bin mekem stret samting.

I no gat wan i givim wan dring long mi bakegen. Be yet, fani tok ia i no stop, iven ol fren blong mi oli stap talem. Wan i talem se mi stap giaman, mo i no posibol nating se ol memba blong Jos oli no dring. Long taem ia, mi filim ol fos we oli kam agensem ol memba blong Jos.

Taem ia we mi spendem long aelan ia, i tijim mi plante lesen; i no long skul nomo, be tu, long saed blong spirit. Mi bin lanem se fasin blong jik i neva stop, be Spirit blong Lod, oltaem bae i lidim yu blong mekem wanem we i raet. ■

Hem we i raetem atikol ia i stap long Metro Manila, long Filipin.





I Kam long
Elda Adrian Okoa
Blong Olgeta Seventi

?Yu wantem filim gud moa
mo gat moa tras long yuwan
long saed blong bodi mo
filing? Blong mekem spot
oltaem bae i help.

I no longtaem i pas, mi bin ridim wan gudfala tingting abaot fasin blong mekem spot. Mi ridim se sapos yu girap eli long moning, yu putum klos blong spot, mo tingting: “bae mi we rem hemia, go wokbaot aotsaed, mo sapos mi stat blong harem gud, bae mi stat blong ron,” ating bae yu mekem wan gud spot taem bifo yu luksave. Sapos yu kam antap wetem wan simpol plan olsem, hem i save helpem yu blong divelopem ol gud fasin blong mekem spot, mo kea long bodi blong yu. Long plante pipol, blong stat mo stap gohed oltaem, i pat ia we i moa had. Sapos yu tingbaot se blong mekem smol spot bae i blesem bodi blong yu, be tu, maen blong yu mo waes blong yu, bae i helpem yu blong wantem kam fit moa long saed blong bodi blong yu. Taem yu stap mekem smol spot, bae i kam wan man o woman we i gat fulap paoa, we i filim se hem i strong, i gat tras, i luksave kwik ol samting, mo i gat sekuriti.

Mi tingbaot stori blong wan pijin we i stat blong salem ol feta blong hem blong save kakae ol wom. Hem i wan isi kaekae blong kasem long wei ia, mo pijin i tingting se hem i gat plante feta. Taem hem i stap gohed blong stat salem ol feta blong hem, pijin ia i stap glad blong no stap girap eli long moning blong lukaotem wom bakegen. Hem i sidaon nomo long

STAP STRONG, STAP HELTI, STAP SMAT

bed blong hem ful dei, mo i neva muvum wan masol blong hem. Be long en, pijin i nomo save lego fasin ia, mo i luksave se hem i nomo save flae from se hem i lusum ol impoten feta blong hem.

Hemia i save happen long eniwan we i foldaon long trap blong ol nogud fasin, ol les fasin, o fasin blong yusum ol samting we i mekem man i adik. Insaed long buklet, *Blong Ol Yut Oli Kam Strong* yumi ridim se ol samting ia oli “spolem gud laef blong bodi blong yu, tingting blong yu, filing blong yu, mo spirit blong yu. Oli spolem ol rilesensip wetem famle mo ol fren, mo i daonem filing blong yu blong tingting gud long yuwan.”¹ Blong muvmuvum bodi mo kakae stret kaekae i helpem yumi blong stap longwe long ol nogud fasin ia. Sapos pijin ia i bin gohed nomo blong flae mo lukaotem kaekae blong hem, bae hem i neva lusum feta blong hem. Semmak, sapos yumi “saksakem wing blong yumi” mo stap mekem smol spot, bae yumi developem gud fasin ia blong stap longwe long ol samting we bae i spolem yumi mo daonem yumi.

Semmak olsem se sam man o woman oli stap traehad wetem helt blong bodi blong olgeta, sam narafala bae oli traehad wetem helt blong filing blong olgeta. Laef i save had, mo samtaem yumi save gat ol filing blong wari, tingting tumas, o nomo trastem yumiwan.

Be tingbaot se tugeta samting ia, helt long saed blong bodi mo long saed blong filing, taem yu mekem smol spot mo wok had, i helpem yu blong gat wan gud tingting. Taem yu tekem kea long bodi blong yu tu i blesem maen blong yu, mo i helpem yu blong tingbaot se yu wan pikinini blong God, mo yu save gat tras long yuwan mo stap hapi. Ol saed blong yumi, long saed blong filing, bodi, mo spirit, evriwan ia oli joen tugeta. *Blong Ol Yut Oli Kam Strong* i tijim se: “helt blong yu long saed blong filing i impoten tu; mo i save spolem o no spolem gud laef blong yu long saed blong spirit o long saed blong bodi. Fasin blong man i harem nogud wanwan taem oli pat blong laef ia long wol. Be, sapos yu gat ol bigfala filing blong harem nogud, se yu blong nating, filing blong wari, o tingting we i tumas, toktok wetem papa mo mama blong yu, mo wetem bisop blong yu mo luklukgud blong askem sam help.”²

?From wanem yumi faenem ol pipol raon long yumi we i luk se oli gat moa paoa long bodi mo oli glad moa? Wan stamba risen, hem i ol fasin blong mekem samting. Sapos yumi lukluk long bodi blong yumi long saed blong spirit mo andastanem se hem i “wan tempol, wan presen we i kam long God,” bae yumi lavem bodi blong yumi, mo bae yumi kipim i tabu.³


Long mi, *tabu* i minim klin, we oli fidim gud, mo i strong. Wan long wei we Papa long Heven i helpem yumi blong kipim bodi blong yumi i tabu, i taem Hem i givim Tok blong Waes long yumi. *Blong Ol Yut Oli Kam Strong* i eksplenem: "Taem yu obei long Tok blong Waes, yu stap fri long ol nogud fasin we i mekem bodi blong yu i adik, mo yu gat kontrol long laef blong yu. Yu kasem ol blesing blong wan helti bodi, wan tingting we i opengud, mo yu kasem daereksem long Tabu Spirit. Bae yu rere blong givim seves long Lod. Neva letem Setan, o ol narawan oli giaman long yu blong tingting se blong brekem Tok blong Waes bae i mekem yu hapi moa, i moa popula, i moa naes."⁴ Taem yu stap folem Tok blong Waes, tingbaot se yu stap tekem kea long tugeta samting ia, bodi mo maen blong yu, mo hem i letem yu faenem

waes tingting mo ol bigfala rij save" (luk long D&C 89:19).

Yu no stap olsem wan les pijin we i stap salem ol feta blong hem, be yu putum maraton sus blong yu mo yu muvmuv. Mekem spot o muvum bodi blong yu oltaem. Rejista long wan spot we yu laekem, o mekem fren wetem sam we yu save ron, o mekem sam narafala samting wetem. Taem yu mekem sam samting blong muvum bodi, yu stap trenem bodi blong yu, be tu, tingting blong yu. Smol spot o blong muvum bodi, i mekem helt long saed blong filing tu i kam strong moa. Tingbaot se samting we i moa impoten, i no se yu ron spid o no, o yu wan spotman o spotwoman—hem i sapos yu muvmuv oltaem. Taem yu stap mekem spot o muvum bodi oltaem, bae yu no stap hapi nomo, be tu, bae yu kam strong moa, helti moa, mo smat moa. ■

OL NOT

1. Luk long *Blong Ol Yut Oli Kam Strong* (buklet, 2011), 27.
2. Luk long *Blong Ol Yut Oli Kam Strong*, 27.
3. Luk long *Blong Ol Yut Oli Kam Strong*, 25.
4. Luk long *Blong Ol Yut Oli Kam Strong*, 25.



*Yu no stap
olsem les pijin we
i stap salem feta blong
hem blong gat sam wom.*



FOLEM OL Step blong Hem

Blong kam olsem Sevya, i wan rod we yu
folem sloslo, long ful laef, mo yu save stat
blong mekem ol smol step evri dei.

I Kam long Melisa Senteno

Oi Magasin blong Jos

Ol skripja oli leftemap tingting blong yumi blong kam moa olsem Jisas Kraes mo blong mekem “fasin blong [yumi] i stret gud wetem fasin blong Jisas Kraes” (Fas Jon 2:6). Be, blong tekem fas step ia, ating i had—speseli taem yu no save olsem wanem blong stat.

Bae yu faenem help insaed long *Prijim Gospel blong Mi: Wan Gaed long Misinari Seves*. Ating yu ting se hem i wan hanbuk nomo blong ol fultaem misinari, be wanem we i stap, hem i we hem i wan gudfala tul we i save helpem yu blong statem gol blong yu blong kam olsem Sevya. Oli raetem Japta 6 blong mekem se i helpem yu blong andastanem mo yu yusum ol naen stret fasin we i olsem hemia blong Kraes.

Hemia sam tingting long olsem wanem blong yusum *Prijim Gospel blong Mi* mo ol skripja taem yu stap luklukgud blong developem ol fasin we oli olsem hemia blong Kraes:

- Blong stat, go long Aktiviti blong Developem Fasin we i stap long en blong japta 6 insaed long *Prijim Gospel blong Mi* (pej 139). Aktiviti ia, i save helpem yu blong faenemaot wijwan fasin oli stap olsem ol paoa blong yu long saed



OL SANDEI LESEN

*Topik blong Manis ia:
Blong Kam Moa
Olsem Kraes*

JOENEM STORIAN



Blong kam olsem Sevya, Jisas Kraes, i wan rod blong folem sloslo, mo wan samting blong lukaotem long ful laef. Samtaem, hem i moa had bitim ol fisik klas we i had tumas. Be yu no lusum hop. Lod i promesem yumi se hem we i kasem laet, mo i gohed wetem God, i kasem moa laet; mo laet ia i saen bigwan mo bigwan moa kasem dei ia we i stret evriwan (luk long D&C 50:24). Taem yumi stap kasem, stadi mo yusum laet mo trutok, mo gohed blong folem God long evri dei, bae yumi save stret se bae yumi kam moa olsem Sevya blong yumi, Jisas Kraes. ■

blong spirit, mo wijwan nao yu nid blong wok long olgeta.

- Afta we yu finisim aktiviti, prea blong jusum wan fasin we bae yu lukluk long hem nomo. Tingting blong ridim sekseen long japta 6 we i tokbaot ol fasin.
- Setem ol stret gol we yu save skelem, we bae i helpem yu blong divelopem fasin ia. Givim wan taem we bae yu wok long gol blong yu ia. Afta, skelem progres blong yu. Eksapol, sapos yu stap traem blong gat moa jareti, ating bae yu putum wan gol blong talem ol gudfala samting abaot brata o sista blong yu tri taem long wan dei blong wan wik taem. Long en blong wik, bae yu skelem olsem wanem yu bin wok long gol blong yu, mo stretem yu long wan wei we bae i helpem yu blong gohed blong kam antap.
- Prijim Gospel blong Mi* i givim wan skripja stadi blong wanwan fasin. Yu save stadi long ol skripja we oli stap wetem prea, mo afta, raetemdaon ol tingting we yu bin kasem taem yu bin stap rid.

WOK BLONG MEKEM EVRI DEI

Ol smol aksen evri dei, oli wanwan step folem rod ia blong kam olsem Sevya blong yumi. Tingting long ol narafala aktiviti ia blong helpem yu blong developem ol fasin olsem hemia blong Kraes:

- Ridim ol skripja we oli raetemdaon insaed long Topical Guide o Guide to the Scriptures we i go wetem fasin we yu stap luklukgud blong developem.
- Prea evri dei blong kasem filing long hat blong yu, blong jenis mo kasem paoa blong kam antap.
- Kipim wan Jenol blong raetemdaon progres blong yu.
- Toktok wetem papa mo mama blong yu. Letem olgeta oli save long ol gol blong yu blong mekem se oli save helpem yu.

Truot long manis Oktoba, bae yu stadi long wei blong kam moa olsem Kraes (sapos wod blong yu o branj blong yu i gat ol niufala lesen long lanwis blong yufala). Afta we yu ridim atikol ia, prea blong jusum wan fasin blong wok long hem long wik ia o manis ia. Yu save putum wan gol, mo afta, skelem progres blong yu. Eksapol, ?Yu bin gat moa jareti, o yu bin obei moa, o yu bin gat moa fasin blong save wet longtaem? ?Olsem wanem nao gol blong yu blong kam moa olsem Kraes i bin helpem yu blong winim wanem i bin had? Tingting blong serem eksperiens blong yu wetem ol nara yut o wetem famle blong yu.

“?Wanem nao mi talem long olgeta we oli no memba we oli stap askem se from wanem sam memba blong Jos oli no stap laef folem ol standet blong yumi?”

Bae i gud tumas sapos evri memba blong Jos i laef fulwan folem gospel. Bae oli gat moa blesing long laef blong olgeta, be tu, bae oli stap olsem ol moa gud eksampol long olgeta we oli stap raon long olgeta. Be yumi man we i stap long wol ia, mo yumi foldaon long sam samting. Stamba risen se sam oli laef folem gospel moa fulwan bitim sam narafala, hemi we from we wanwan long yumi i no stap long semfala ples long fasin blong jenism laef blong yumi, mo long paoa blong testemoni blong yumi. Wanwan long yumi i gat ol defren tes, mo ol defren tul blong wok wetem, mo ol defren pipol blong helpem yumi.

Olgeta we oli no memba, ating bae oli no andastanem ol toktok olsem “jenism laef” mo “testemoni,” be bae oli andastanem se wanwan man mo woman i save jusum olsem wanem blong laef. Yu save eksplenem se Papa long Heven i minim blong hem i olsem. Hem i givim long yumi, fridom blong joes blong mekem se yumi save gro long saed blong spirit taem yumi jusum raet. Be Papa long Heven i save tu se evriwan—be Jisas Kraes nomo—bae i mekem ol mistek, mekem se Hem i givim wan Sevya long yumi. From Atonmen, yumi save sakem sin, yumi save kasem fogivnes, yumi save lanem samting aot long mistek blong yumi, mo yumi save muv fored long laef.

Yu save eksplenem tu se yumi no stap jajem olgeta we oli no stap folem ol standet blong Jos. Be, yumi traem blong helpem olgeta, andastanem olgeta, mo stap wet longtaem wetem olgeta. Nomata we yumi no stap akseptem sin, yumi no stap panisim man we i mekem sin (luk long Jon 8:11). Fasin blong sakem sin i posibol i stap, long yumi evriwan.

Luklukgud long Ol Skripja



Ansa long kwestin, yumi save faenem insaed long ol skripja. Taem ol pipol oli no obej ol komanmen, yumi mas traem blong no stap jajem

olgeta (luk long Matiu 7:1). Rom 3:23 i talem: “Olgeta evriwan oli mekem nogud finis, mo oli stap afsaed olgeta long ol gudgudfala fasin blong God.” Be, hem i tru se ol memba blong Jos oli mas traem blong stap obej.

Madison M., 13 yia, Teksas, YSA

Tij abaot Atonmen



Taem ol pipol oli talem ol samting olsem, mi no traem blong faenem rong long memba we i no stap folem ol rul, be mi yusum olsem wan janis blong tij abaot Atonmen. Mi talem long olgeta se, from se yumi ol Momon, i no minim se yumi stret evriwan, mo yumi gat Atonmen mekem se yumi save sakem ol sin blong yumi mo stretem ol mistek ia. Hemia, oltaem, i openem doa long plante moa kwestin.

Jeid H., 16 yia, Oregon, YSA

Jos I Tijim Yumi blong Mekem Gud



Semmak olsem eni narawan, ol memba blong Jos oli gotru long ol jalenj mo ol temtesen. Yumi evriwan i gat ol samting we yumi no strong long hem, be, hemia i no minim se Jos ia i no tru. Hemia i Jos blong Jisas Kraes, we i stap helpem ol pipol blong save tru gospel mo blong kasem fasin blong sevem man. Man we i folet fasin blong wol nao i man we i no stap obej long ol komanmen (luk long Mosaea 3:19), mo hemia i

no rong blong Jos. Jos i tijim yumi blong mekem ol gud wok. Be yumi evriwan i save mekem joes.

Lavinia S. 19 yia, Bulakan, Filipin

Ol Standet Oli Stap blong Mekem Yumi Hapi



Kwestin ia, mi save gud long hem, from se mi save sam man o woman we oli bin mekem ol joes we i bin tekem olgeta longwe long gospel. Lod i givim yumi ol komanmen blong yumi stap hapi, mo blong mekem i hapan fasin we man i nomo save ded mo i kasem laef we i no save finis (luk long Moses 1:39). Lod i wantem yumi blong gobak long Hem; be, Hem i wantem yumi blong mekem ol joes blong yumiwan. From hemia nao sam man o woman oli no laef folem ol standet blong yumi. Ol standet oli helpem mi, miwan, from se mi save se Papa long Heven i bin givim olgeta komanmen ia long mi blong mi save gobak mo stap wetem Hem mo stap hapi. Oli pruf ia blong lav we Hem i gat long mi.

Morgan D. 18 yia, Langedok-Rusiyon, Franis

Stap Wan Eksampol



Jos i impoten tumas blong helpem yumi blong mekem ol komanmen blong Papa blong yumi long Heven oli hapan, mo blong laef wetem Hem bakegen. I no from se wan i blong Jos, nao i minim se hem i stap oltaem olsem wan gudfala man o woman. Lukluk long wol blong yumi tedei; i fulap long nogud fasin, mo rabis sin nomata we wol ia i fulap wetem ol pipol we oli bin disaed blong folem Jisas Kraes long laef bifo laef long wol ia. Mi ting se samting we

i moa gud blong mekem, i blong stap olsem wan eksampol long ol fren blong yumi.

Kaden S., 15 yia, Yuta, YSA

Prea from Olgeta mo Visitim Olgeta

Ol memba we oli no laef folem ol standet blong yumi, ating oli no gat wan testemoni we i lukluk nomo long Jisas Kraes. Yumi mas prea from olgeta, se bae oli lukaotem blong Spirit i lidim olgeta, mo blong oli save kasem wan testemoni blong olgetawan. Yumi mas visitim ol pipol ia mo helpem olgeta blong kam long Kraes.

Andrea K., 13 yia, Lima, Peru

Laef Folet Ol Standet blong Yumi



Semmak olsem eni oganaesesen o religjin, i gat sam pipol we oli putum moa tingting, o oli no putum ful tingting. Yumi mas laef folet ol standet blong yumi nomo long bes wei we yumi save mekem, mo hop mo prea se ol narawan bae oli mekem tu.

Maren S.; 16 yia, Arisona, YSA

LUK OL NARAWAN OLSEM WE OLI SAVE KAM

"Yumi gat responsabiliti ia blong luk wanwan man o woman, i no olsem we oli stap, be olsem we oli save kam. Mi plis long yufala blong tingting long olgeta long wei ia.

Presiden Tomas S. Monson, "Luk Ol Narawan Olsem we Oli Save Kam," Konfrens Ripot, Okt. 2012, 44.

KWESTIN WE I STAP KAM

"Mi stap traem blong kontrolem ol tingting blong mi, be i gat fulap temtesen tumas. ?Olsem wanem mi save gat ol tingting we oli klin moa?

Bifo long 15 Novembra, sendem ansa blong yu, mo sapos yu wantem, sendem wan gud kwaliti foto i kam long liahona@ldschurch.org o sendem tru long postofis we i stap long adres long pej 3.

Infomesen mo raet ia i mas stap insaed long imel o leta blong yu: (1) ful nem blong yu, (2) deit we yu bon long hem, (3) wod o branj, (4) stek o distrik, (5) leta blong yu blong givim raet, mo, sapos yu no gat 18 yia yet, papa o mama blong yu i mas raetem leta i kam blong givim raet (oli akseptem tu tru long imel) blong pablism ansa mo foto blong yu.



I Kam long
Elder K. Skot Gro
Blong Olgeta
Seventi

Blong stap helpem yu blong sakem sin, hem i wan spesel pat blong koling blong wan bisop. Tingting blong yu bae i talemaot long yu wetaem nao yu nid blong toktok long hem.

Ating yu save askem yuwan from wanem nao oli stap tijim yu blong stap konfes long bisop o branj presiden blong yu taem yu mekem ol bigfala sin. Yu save talem long yuwan: “Be fasin blong sakem sin i wan samting blong mi wan, i bitwin mi mo Lod? Sapos mi stop blong mekem rong fasin blong mi, mo mi bin konfes i go long God, ?from wanem mi nidim blong toktok wetem bisop blong mi?”

?From Wanem Bisop be I No Wan Narafala Man?

Plante yut oli filim gud moa blong konfesem ol sin blong olgeta long papa mo mama blong olgeta, o long yut lida blong olgeta. Nomata papa mo mama blong yu, o lida i save givhan mo givim kaonsel, Lod i bin talemaot se bisop nao i jaj blong evri man long Isrel (luk long D&C 107:72, 74). Hem nao i gat responsabiliti blong talemaot se ol memba blong wod blong hem oli klin inaf o no. Tru long odinesen mo stret fasin blong laef, bisop i gat raet ia, tru long revelesen we i kam tru long Tabu Spirit, long saed blong ol memba blong wod blong hem, mo hemia i tekem yu tu.

Bisop i save helpem yu blong gotru long rod blong fasin blong sakem sin long sam wei we papa mo mama



?FROM WANEM MO WANEM NAO MI NIDIM BLONG **KONFESEM** LONG BISOP BLONG MI?

blong yu, o ol nara lida oli no save mekem. Sapos sin i series tumas, bae hem i save talemaot wanem samting bae yu nomo mekem insaed long Jos. Eksapol, olsem pat blong rod blong yu blong sakem sin, bae hem i save askem yu blong no tekem sakramen, o no yusum prishud blong yu blong sam taem. Bae hem i wok wetem yu mo talemaot wetaem nao yu klin inaf bakegen blong statem ol tabu aktiviti ia bakegen.

Bisop bae i toktok wetem yu long wanem blong mekem blong mekem paoa blong yu blong stanap agensem temtesen i kam strong moa. Bae hem i

save leftemap tingting blong yu blong stadi long wan topik blong doktrin, olsem fasin blong sakem sin, mo afta, serem wetem hem wanem nao yu bin lanem. Hem i save askem yu blong luk hem evri wik blong yu ripotem olsem wanem yu stap wokhad blong yu kamaot long ol situesen blong temtesen.

?Wanem Taem Nao bae Mi Mas Toktok long Hem?

Ating bae yu tingting: “Evri samting ia i saon gud long sora, be ?olsem wanem nao bae mi save save sapos wanem mi mekem i series inaf blong

mi nid blong toktok long bisop?" Sotfala ansa: "Tingting blong yu bae i talemaot long yu." Taem yu filim tingting blong yu i stikim yu, tekem aksen kwiktaem (luk long Alma 34:31–34).

Long saed blong fasin blong sakem sin, King Benjamin i tijim: "Mi no save talem long yufala evri samting we yufala i save mekem sin long hem; from i gat plante defren wei mo plante fasin, hem i plante tumas mekem se mi no save kaontem olgeta" (Mosaea 4:29). Mekem se, i no nid blong givim wan ditel lis blong ol samting we yu mas konfes long bisop, be mi mas serem sam prinsipol we bae i helpem yu blong mekem desisen ia.

?Wanem Nao Mi Nidim blong Konfes?

Mi save se yu bin traem blong stap obej, be ating yu bin mekem sam mistek—sam series mistek. Plante long ol mistek we ol pipol oli stap mekem, oli save stretem nomo tru long prea blong olgetawan, mo tru long fasin blong sakem sin wetem tru hat. Sam mistek, speseli olgeta long saed blong fasin blong seks, i nidim blong yu konfesem olgeta long bisop bifor yu save kasem fogivnes blong Lod.

Taem yu stap tingting long ol mistek we yu bin mekem, ating bae yu filim gilti, yu filim se tingting blong yu i no stap kwaet, yu no hapi, o yu harem nogud evriwan. Sapos yu stap filim eniwan long ol filing ia, ating yu nid blong toktok wetem bisop blong yu long saed blong ol mistek ia.

Yu no traem blong faenem wan eskius, o faenem wan gud risen blong yu save ronwe. Ating yu tingting: "Bae mi sem tumas blong talem long bisop wanem samting we mi bin mekem. Hem i tingting se mi mi wan man o woman we i stret gud. Bae hem i sek sapos mi talem long hem wanem nao

mi bin mekem. Bae hem i nomo laekem mi bakegen."

Mi promesem yu se bae hem i no panisim yu. Olsem wan wokman blong Lod, bae hem i kaen mo i save andastanem yu taem bae hem i lisin long yu. Afta, bae hem i helpem yu tru long rod blong fasin blong sakem sin. Hem i mesenja blong Lod we i gat sore blong helpem yu blong kam klin tru long Atonmen blong Jisas Kraes.

Lod i bin talem se hem we i sakem ol sin blong hem, bae Lod i fogivim hem mo bae i nomo tingbaot ol sin ia bakegen.

Tru long wei ia, bae yumi save sapos wan i sakem ol sin blong hem—bae hem i konfesem olgeta mo i livim olgeta fogud (luk long D&C 58:42–43).

Taem yu konfes mo livim ol sin blong yu fogud, Lod bae i fogivim yu. Bae yu no nid blong ansa long Hem from ol sin ia long taem we i kam we bae oli jajem yu.

?Wanem bae I Hapen Sapos Mi No Konfes?

Samtaem, wan i stop blong mekem rong samting be i neva konfesem, long taem we i nid, long bisop blong hem. Olsem risal, man o woman ia i stap tekem hevi blong sin ia hemwan, be i no letem Sevya i tekemaot hevi sin ia.

Bae mi givim wan eksampol long yu. Wan naet, sam yia i pas, mi bin stap intaviu long ol adalt blong riniu ol tempol rekomen. Wan woman, we i medel yia, i kam from intaviu blong hem. Hem i bin mared long tempol, mo i stap aktiv insaed long Jos long ful laef blong hem.

Mi filim se sol blong hem i no hapi. Taem intaviu i stap gohed, mi kasem wan tingting long saed blong spirit. Mi talem long hem: "Sista, mi gat filing ia

se yu bin mekem wan series mistek taem yu bin yangfala, mo yu no bin konfes long wan prishud lida. ?Bae yu glad blong talemaot long mi long saed blong samting ia?

Wantaem nomo, hem i stat blong krae. Hem i talem long mi se i tru, be oltaem, hem i filim se hem i sem blong konfesem sin ia long bisop. Taem hem i konfesem wanem hem i bin mekem, hem i serem inaf ditel long mi blong mi talemaot se hem i klin inaf o no.

Taem hem i bin konfesem sin blong hem long wan prishud lida, hemia i bin makem en blong rod blong hem blong sakem sin, be i no stat blong hem. Hem i bin tekem blong nating nomo hevi blong sin ia mo harem nogud blong hem blong moa long 30 yia.

From se hem i bin finisim las step blong fasin blong sakem sin, filing blong hem blong filim gilti i lus evriwan. Bae mi luk hem wanwan taem afta long naet ia blong intaviu ia. Fes blong hem i saen gud, mo hem i bin hapi.

Mi wantem yu blong save se mi no nid blong tingbaot nem blong hem. Lod i save karemaot ol memori ia long ol bisop. Wanem we mi tingbaot, i we, tru long taem ia blong konfes long prishud lida blong hem, wan woman we i medel yia, i pulum win mo i nomo tekem hevi harem nogud we hem i bin tekem blong plante yia tumas.

Plis no mekem mistek ia. Sapos yu gat ol filing se yu rong long wan samting, be yu no save stret we yu nidim blong konfes long bisop blong yu o no, go luk hem. Letem hem i helpem yu. Yu no tekem janis ia mo tekem wan hevi samting long ful laef blong yu, we bae i livim yu stap filim nogud tumas. Tru long fasin blong konfes



long bisop, mo fasin blong yu blong sakem sin, Lod bae i karemaot hevi samting ia long sol blong yu (luk long Aesea 1:18).

?From Wanem Mi Nidim blong Sakem Sin?

Jisas Kraes i bin pem praes blong ol sin blong evri man tru long sakri-faes blong Hem we i pemaot man. Hem i stap invaetem yu blong sakem sin mo stap longwe long fasin blong harem nogud mo stap safra. Hem i talem se yumi mas sakem sin sapos no, bae safaring blong yumi bae i soa tumas—bae i soa hamas, yumi no save, i bigwan olsem wanem, yumi no save, i had olsem wanem blong tekem, yumi no save.

Hem i bin talem se Hem i safra ol samting ia blong evri man blong mekem se oli no save safra sapos oli sakem sin.

Be sapos oli no wantem sakem sin, oli mas safra olsem we Hem tu i bin safra.

From hemia, Hem i givim koman-men long yumi bakegen blong sakem

sin, mo blong yumi konfesem sin blong yumi, nogud bae yumi safra long ol panismen ia we Hem i bin tokbaot (luk long D&C 19:15–17, 20).

Mi testifae se tru long safaring blong Hem, Jisas Kraes i bin pem praes finis from ol sin blong yu. Yu save kasem fogivnes sapos yu sakem sin. Yu no traem blong pem praes from ol sin blong yu. I no gat wan safaring we i bigwan inaf blong i pem-aot yu; hem i tru nomo long Atonmen we yu kasem fogivnes.

Bae yu yusum fet long Jisas Kraes mo Atonmen blong Hem. Mi testifae long nem blong Jisas Kraes, se tru long fasin blong sakem sin, we i tekem blong konfes long bisop blong yu taem i nid, we bae yu kam klin. Antap long hemia, tru long gladhat blong Sevya—paoa blong Hem we i save sevem man—yu save kam strong moa long paoa blong yu blong stanap agensem temtesen long fiuja. Olsem ia, bae yu gat wan pis long maen blong yu, mo bae yu hapi long laef ia, mo bae yu kasem laef we i no save finis long wol we i stap kam. ■



HAE DOKTA BLONG YUMI

"Sevya, plante taem, yumi tokbaot Hem olsem Hae Dokta. . . Blong filim rong

i, long spirit blong yumi, wanem i soa long bodi blong yumi—wan woning blong denja mo wan proteksen blong no kasem moa kil. Aot long Atonmen blong Sevya, i gat krim ia we i smut i kamaot, we i hilim ol soa long saed blong spirit mo i karemaot ol filing blong gat rong. Be krim ia, oli save putum nomo sapos yu yusum ol prinsipol blong fet long Lod Jisas Kraes, fasin blong sakem sin mo fasin blong stap obei oltaem. Risal blong tru fasin blong sakem sin oli pis long maen, kamfot, mo hiling long saed blong spirit mo kam niu bakegen.

"Bisop o branj presiden blong yu, oli ol man blong givhan blong dokta long saed blong spirit, we i gat raet blong helpem yu blong sakem sin mo kam gud bakegen."


Elda Deved A. Bedna blong Kworom blong Olgeta Twelef Apostol, "Mifala I Biliv blong Stap Klin," Konfrens Ripot, Epril 2013.



I kam long Elda
O.Vinsen Halek
Blong Olgeta Seventi

Stap Invaetem Sevya blong Kam Insaed

*"Yufala i luk. Mi mi stap stanap long doa, mi stap kilkilim doa.
Sipos wan man i harem tok blong mi, i openem doa, mi bambae
mi kam insaed long haos blong hem" (Revelesen 3:20).*



Taem mi bin wan smol boe, long taem blong Krismes, mama blong mi bae i putum wan pikja blong Sevya we i stap noknok long doa blong mifala i luk. Mifala i no bin memba blong Jos yet, mo oltaem mi askem, "From wanem Jisas i stap noknok long doa? Huia i stap narasaed long doa?" Sam yia afta, mi bin faenem se i no bin gat wan handel aotsaed long doa ia we Sevya i stap noknok long hem. Man we i stap insaed i nidim blong openem doa ia. Naoia mi save huia i stap narasaed long doa ia. !Yumi ia nao! Sevya i stap noknok, mo yumi evriwan i mas openem doa ia mo invaetem Hem blong kam insaed long ol laef blong yumi.

Taem mi bin wan yang-fala, mi disaed blong invaetem Sevya i kam long laef blong mi tru long baptaes mo blong kam wan memba blong Jos. Ol fren

blong mi oli bin ol gud eksampol long mi. Mo apu woman blong mi tu. Hem i bin stap wok long tempol long Los Anjeles Kalifonia Tempol. Bae hem i aot long haos long 4 klok long eli moning blong givim seves long Lod long tempol.

Tu yia nomo afta we mi bin kasem baptaes, mi bin disaed se mi wantem blong givim seves long Lod olsem wan fultaem misinari. Long misin blong mi, mi bin helpem plante man blong lanem abao Sevya blong oli save invaetem Hem long ol laef blong olgeta.

Samtaem afta, mi bin givim seves olsem wan misin presiden long Samoa. Oltaem mi askem ol niu misinari wetaem nao oli bin disaed blong go long wan misin. Plante oli taem se oli bin jusum blong sevem wan misin taem oli bin stap long Praemerri.

Praemerri bae i helpem yu blong rere from misinari wok. Lanem plante we yu save mekem. Putum wan gol blong go long wan misin. Afta bae yu tu bae yu save helpem ol nara man blong invaetem Sevya i kam long ol laef blong olgeta. Blong stap wan misinari bae i jenise laef blong yu—i bin jenise laef blong mi. ■

Wan Fres Niu

Blong pasem sakramen, i wan bigfala responsabiliti. ?Be sapos hem i mekem wan mistek?

I kam long Jen MakBraed Koet

I kamaot long wan tru stori

*Mo tu olgeta evriwan we i kasem
prishud ia oli kasem mi, Lod i talem;
(luk long D&C 84:35).*

Benji i bin stanap long fored blong glas blong lukluk, mo stap stretem nektae blong hem. Waet set mo dak blu longfala traoses blong hem i stret gud wantaem. Hem i komem hea blong hem. Hem i luk se hem i rere blong oli odenem hem i kam wan dikon. ?Be from wanem hem i filim se hem i fraet?

Benji i pikmap ol skripja blong hem mo go aot long rum. Hem i bin traem blong no tingbaot olsem wanem ol samting bae i defren te-dei long jos. Mo afta, hemia niufala prishud wok ia we i stap mekem hem i wari evritaem we hem i tingbaot: blong pasem sakramen. ?Be sapos hem i mekem wan mistek blong fastaem long nekis wik? Hem bin traem blong fogetem tingting ia tu, taem hem i stap aot long haos.

Sakramen miting i bin gohed semmak olsem oltaem. Be afta long hemia, Benji mo famle blong hem i bin wokbaot i go long ofis blong Bisop Salasa. Hemia i defren olgeta. Long taem olsem, hem i mas



Dikon



"Sapos yufala ol dikon . . . i wok strong long koling blong yufala, bae yufala i stap olsem ol tul long han blong God, naoia, from se prishud we i stap long boe i gat paoa semmak long prishud we i stap long man taem hem i yusum prishud ia long stret mo gud fasin."

Elda Tad R. Kalista blong Olgeta Seventi,
"Paoa blong Prishud we I Stap long Boe,"
Liahona, Mei 2013, 54.

stap long Praemeris sering stret long taem ia.

Benji i bin sidaon taem we Papa, bisop, Yang Man presiden, mo ol kaonsela long bisoprik i bin putum ol han blong olgeta long hed blong hem. Papa i bin givim Aonik Prishud long hem. Long taem blong blesing, ol fraet blong hem i bin lus. Hem i bin filim gud mo hapi.

Benji i bin stanap mo sekhan wetem evriwan. Afta hem i haggem Mama mo brata blong hem, Jei, mo smol sista blong hem, Mirasol.

Afta long hemia, hem i bin go long Sandei Skul. Nomata ol niufala klas ia oli no bin semmak olsem Praemeris, oli i stil gat sem filing ia. Lesen hem i abot prea. Hem i bin gat plante lesen bifo abaot prea insaed long Praemeris. Benji i pulum gud win blong hem. Ating blong kam wan dikon i no wan had samting.

"Bae i gud tumas," Jei i bin talem long Benji afta long jos. "Bae mi blessem sakramen, mo yu save pasem."

Fraet i stat blong kambak kwik. "Yes, i gud," hem i talem kwaet nomo. !Blong pasem sakramen i bin wanem we Benji i bin stap wari tumas long hem!

Afta long naet ia, Benji i luk Papa we i stat rid long sopsop jea. "?Be sapos mi mestem wan man mo oli no karem sakramen?" hem i askem. "?Sapos mi mestem mo foldaon?" Hem i save luk hemia i klia olsem deilaet long maen blong hem, taem trei i foldaon long floa mo ol kap blong wota oi flae i go olbaot.

Papa i skwisim solda blong Benji. "Mi tingbaot fastaem we mi bin pasem sakramen. Ating mi bin fraet moa bitim yu naoia."

Benji i sarem ae kwik wetem sapraes. "?Yu? !Yu yu no stat fraet nating long wan samting!"

Papa i bin laf. "Mi bin stat fraet plante taem finis. ?Yu save wanem nao i bin helpem mi blong nomo stat fraet?"

Benji i bin tingting blong wan smol taem. "?Preah?"

Papa i smael. "Hemia nao. Preah. Mo papa blong mi i givim mi wan blesing. ?Yu wantem blong mi givim wan blesing long yu?"

Benji i muvum hed kwik. "!Yes! bae mi wantem hemia tumas."

Famle i bin kam tugeta long livingrum. Papa i putum ol han blong hem long hed blong Benji. Taem Papa i stat toktok, ol wota

blong ae i stat blong kam long ae blong Benji. "Tingbaot," Papa i talem long blesing, "yu bin kasem prishud tru long wan tabu odinens. Papa long Heven i bin givim prishud, blong yumi save givim seves long ol narafala man. Sapos yu save mekem hemia wetem hat we i fulap blong mekem samting, bae yu kasem blesing long hemia mo long evri samting."

Long ful wik ia, Benji i bin prea from help. Long nekis Sandei, hem i joenem ol dikon long fored blong japel. Hem i bin lisin gud taem Jei i stat blessem bred.

Kwiktaem nomo, hem i bin stat blong filim wari bakegen. ?Bae hem i save mekem samting ia? I bin impoten tumas! Afta hem i tingbaot ol promes long blesing we Papa i givim. Ol wari we hem i filim ia i go taem Spirit i kam stat wetem hem.

Hem i bin pikmap trei mo muv kwaet long ol ro we oli taelm long hem blong go long hem. Slo slo, hem i givim tre long wan woman long fas ro.

Hem i bin smael long hem. Benji i bin smael i gobak, wetem save ia, se hem i stat givim seves long Lod. ■

Blong Stap Wet

long

Winta Kwota



Winta Kwota

ROD BLONG WOKBAOT BLONG IOWA

Nauvu


I kam long Jenifa Madi

Wan Niufala Siti

Afta we Profet Josef Smit i bin ded, Nauvu, Illinois, i bin kam wan denjeres ples. Ol Sent oli bin ronwe long ol hom blong olgeta blong faenem wan ples we i moa sef blong stap long hem. Long Febwari 1846, ol fas grup blong ol Sent oli bin statem wokbaot blong olgeta i go long wes, be rabis weta mo siknes i bin mekem se oli slo. Long taem we oli kam blong krosem Iowa, hem i bin let long yia ia blong go kasem Roki Maonten bifo winta (kolkol taem).

Mekem se ol lida blong Jos oli bin jusum wan ples we Ol Sent i save stap long hem long taem blong winta ia. Mo oli sing-aotem ples ia Winta Kwota.

Pikja we i stap insaed long Momom Treil Senta long Winta Kwota i me-kem bakegen wan kamp blong Iowa Wokbaot, taem William Kleiton i bin raetem hym ia "Kam Kam Ol Sent" (Hym, namba 30 long Inglis Hym).





Stap Wok Tugeta

Sam man i bin bildim ol hom weterem ol wud o gras. Ol narawan oli stap long ol tenet mo ol hol blong ston. Ol Sent oli bin traem blong stap hapi long taem blong longfala kolkol winta ia. Oli bin helpem olgeta wanwan. Oli bin go long ol konset mo singsing mo danis. Oli bin bildim wan ples blong mekem flaoa, wan taon hol, mo wan faktri blong mekem basket.

Stap Muv I Go

Taem ia we ol Sent i bin spendem long Winta Kwota i bin had tumas. Plante man i bin ded. Be ol paeonea oli bin gat fet se Lod bae i blesem olgeta mo helpem olgeta blong save mekem go kasem Saeon. Taem spring (stat blong hot taem) i kam, fas grup blong ol paeonea i bin aot long Winta Kwota blong wokbaot i go long Sol Lek Vale.

Tedei yu save luk naesfala Winta

Kwanta long Nebraska Tempol mo visitim Senta blong Ol Momon mo Wokbaot blong olgeta long Winta Kwata blong lanem moa abaot ol paeonea. ■



Sam long ol Sent i bin bildim ol wud haos blong stap insaed long hem taem oli bin stap long Winta Kwota.

Long Momom Treil Senta, yu save luk ol defren kaen saplae we ol Sent we oli bin tekem mo folem rod i go long wes. Ol lida blong jos i bin talem long olgeta blong tekem flaoa blong mekem bred, ol spaes, raes, ol bin, mo ol buluk we i givim melek.



Ol Sent Oli Stop long Winta Kwota

I kam long Ari Van De Graf

Ol paeonia i bin stop blong sam taem long Winta Kwota blong wet kasem taem we winta (taem blong kolkol) i pas fastaem, bifo oli gohed blong folem rod blong olgeta i go long wes. Luk sapos yu save faenem ol tul we i haed long pikja ia.



Pensel



Wan pis pae



Sospen



Spun



Flat spun



Buk



Spana (tul blong tanem samting)



Kap



Bandej



Bowling pin



Karot



Loli stik



Nidil



Hanwaj



Pea




I Kam long Elda
D. Tod Kristofeson


Blong Kworom
blong Olgeta
Twelef Aposol

*Ol memba blong
Kworom blong Olgeta
Twelef Aposol oli ol
spesel witnes blong
Jisas Kraes.*


?Olsem wanem nao Jisas Kraes i toktok long ol profet?



Hem i save sendem wan
mesenja o i save kamaot
olsem Hemwan.




Hem i save
toktok tru
long voes
blong Hem-
wan o tru
long voes
blong Tabu
Spirit.



I kam long "The Doctrine of Christ,"
Liahona, Mei 2012, 86–90.

Hem i save toktok long
wanwan long ol wokman blong
Hem, o ating hem i toktok long
ogleta taem oli kaonsel tugeta.



?Olsem
Wanem nao
Ema i save kaen
taem Vaelet i
strong tumas?

I kam long Salot Mae Sepad

I kamaot long wan tru stori

*"Yufala i mas lavem ol man we
i stap raonabaot long yufala"*
(Mak 12:31).

Ema i hang strong long basket blong hem biaen long bak blong hem, taem hem i stap wokbaot i go long niufala klasrum blong hem. Hem i bin fas dei blong skul. Hem i bin werem dres we hem i laekem tumas, mo Mama i bin fulumap wan spesel kaekae blong hem blong lanj—ol animol biskit.

“Tedei bae i wan gud dei,” Ema i stap tingting long hemwan. “Hemia nomo sapos—”

Ema i stop mo lukluk i go naraasd long klasrum. Hemia hem. Vaelet.

Las yia, Vaelet i bin stap bos nomo long gem blong mangki long evri brek. Hem i bin singaotem Ema long plante nem. !Hem i bin stilim bes fren blong Ema tu!

Vaelet i bin luk Ema mo i soem tang blong hem long hem. Ema i lukluk bak hem wetem kros, wetem han blong hem i hang strong long basket blong hem biaen long bak. Vaelet i no bin gud fren nating tru-aot ful las yia, mo i luk olsem se yia ia bae i semmak nomo.

“!Welkam long wan niu yia, klas!” Mis Kodwel i talem long fored blong rum. “Bae mi jusum ol jea blong yufala.”

Oli laenemap ol desk long tu tu krosem klasrum. Mis Kolwel i go tru long rolkol wetem fingga blong hem; afta hem i poenem tu desk long biaen. “Ema. Bae yu sidaon biaen longwe.”

Ema i bin sidaon long wan long ol desk biaen. Hem i hop se Lisel bae i sidaon kolosap long hem.

O Jem. O—

“Vaelet”

Hed blong Ema i go antap kwik.
?Hem i stap harem stret ia?

Yes. Mis Kolwel i stap poenem yet desk ia we i stap long saed blong hem. “Bae yu stap kolosap long Ema, Vaelet,” hem i talem.

Vaelet i muv slo nomo wetem wan strong fes i go long Ema. Ema i putum hed blong hem antap long desk blong hem mo lukluk i go long wol. Bae hem i wan longfala yia.

Long taem blong lesen blong mats, Mis Kodwel i bin raetem sam problem long blakbod blong klas blong oli faenem ansa blong hem. “Yu save wok yuwan o wetem neiba blong yu,” hem i talem.


Kwiktaem Ema i tanem pepa blong hem i go long hem, mo mekem olsem se hem i bisi. Ol problem ia i isi. Hem i stap traem

nomo blong no luksave Vaelet. Hem i no bin lukluk hem nating long ful moning.

Wan samting i stikim solda blong hem. I olsem wan pensel. Ema i no wantem save.

Wan moa stik bakegen. !Vaelet i stap stikim hem! Ema i goheda blong wok strong nomo.

Nambatri taem we Vaelet i stikim hem i so nao. Ema i save filim hem-wan se hem i hot insaed. ?Bae ful yia




Stap

Helpem Vaelet

ia i olsem nao? Hem i tingting blong leftemap han blong hem blong talem Mis Kodwel. O ating bae hem i lukluk strong nomo Vaelet.

Afta Ema i harem wan noes blong krae. ?Wan man i stap krae? Pensel ia i stikim hem bakegen. Hem i luk i go mo luk Vaelet we i stap lukluk hem. Pensel blong hem long han, mo wota blong ae long fes blong hem. Pepa blong hem, i fulap wetem toti we raba i mekem.



Vaelet i tantanem pensel long ol han blong hem. ?Yu save helpem mi? hem i askem kwaet nomo.

Ema i lukluk hem blong wan minit, wetem sapraes. ?Vaelet i wantem hem blong helpem hem? Afta we hem i bin nogud oltaem? Ema i tanem hem bakegen i go long pepa blong hemwan. Vaelet i save wok hemwan. Hem i no gud inaf blong kasem help blong Ema, nomata sapos hem i . . .

. . . ?neiba blong hem?

Kwaet nomo, Ema i lukluk i go fored. Hem i save harem Vaelet i stap krae slo kolosap long hem. Ol skripja i talem oltaem blong hem i lavem neiba blong hem—!be Vaelet i defren! Ema i sidaon nomo kolosap long hem long klas!


Ema i bin go bak mekem wok blong hemwan. Afta hem i stop. Ating Vaelet i no bin defren. Ating taem ol skripja i talem blong lavem neiba blong yu, oli minim evriwan. Olgeta we oli nogud tu. Nomata sapos oli had.

Ema i pulum win mo putum sloslo pensel blong hem i go daon. Hem i tanem hem i go long Vaelet

mo traem bes blong hem blong smael. ?“Mi save help?” hemi askem.

Vaelet i seksekem hed blong hem blong talem yes, mo waepem wota blong ae blong hem wetem han blong hem.

Ema i lei i go fored long pepa blong Vaelet mo stat blong helpem hem wetem fas problem. Hem filim finis wan gudfala filing insaed long hem. Hem i stap tingting sapos Vaelet i laekem ol animol biskit ia. ■



BLONG STAP FOLEM JISAS

Jisas i wantem yumi blong lavem evriwan. Insaed long ol skripja, Hem i bin tijim yumi blong lavem ol famle mo fren blong yumi mo tritim olgeta wetem kaen fasin. Jisas i bin tijim tu, “se yufala i mas lavem ol enemi blong yufala, mo yufala i mas prea from olgeta we oli stap mekem i nogud tumas long yufala” (Matiu 5:44). Hemia i minim tu se taem wan man i nogud long yu, yu save folem Jisas blong stap kaen mo traem blong stap olsem wan fren.



Bae Mi Serem Gospel wetem Evri Pikinini blong God

LEF: PIKIA I KAM LONG MAK JAVAN LONG RAET FOLEM FASIN BLONG KLOK STAT ANTAP LONG LEF: OL PIKIA WEI KAM LONG JIM MADSEN, JARED BEKSTRAN, ERIK BARKEI, MO SELESTI SMITH

OL KAD BLONG SEREM

Yu save serem gospel tru wan kad we bae yu serem. Yu putum glu long ol kad long nekis pej long wan hevi pepa. Afta katemaot ol kad mo raetem mesej blong yuhan long narasaed blong kad ia.

Yu bin kakae wan samting we i naes tumas mo we yu wantem blong serem? Profet Lihae i bin drim wan taem se hem i bin stap kakae wan pis blong wan frut we i naes tumas. Tes blong hem i naes tumas we i “fulumap sol blong [hem] weten bigfala glad we i bigwan tumas.” (1 Nfae 8:12). Lihae i bin wantem famle blong hem blong kakae lnaes-fala frut ia tu.

Frut ia long drim blong Lihae i olsem lav blong Papa long Heven. Lihae i bin wantem famle blong hem i filim lav blong Papa long Heven. Hem i bin wantem blong serem gospel ia wetem olgeta from hem i bin save se bae i mekem olgeta i glad.

Ol pikinini oltaem oli mekem gud tumas blong serem gospel wetem ol narafala man.

Maria we i gat eit yia, i bin luk ol misinari long ol rod blong Ekwado. Hem i askem olgeta sapos oli save tijim gospel long hem. Ol misinari i bin kam long hom blong Maria blong tijim famle blong hem. Maria i bin faswan long famle blong hem blong kasem baptaes. Hem i bin glad tumas taem ful famle blong hem i joen tu long Jos afta.

Erik we i gat naen yia i bin glad tumas abaot Praemer sakramen miting presentesen we i mekem se hem i invaetem ol neiba blong hem blong kam. Oli bin kam.


Tugeta tufala pikinini ia i bin serem wan speselm samting wetem ol pipol we tufala i lavem. Taem yu serem gospel, testemoni blong yu bae i gro. Olsem Lihae, bae yu filim “bigfala glad ia we i bigwan tumas.” ■


SINGSING MO SKRIPJA

- “We’ll Bring the World His Truth,” [Bae Yumi Karem Trutok blong Hem I Kam long Wol] *Children’s Songbook*, 172–73
- Matiu 5:13–16

YUMI TOKTOK

Yu save gat wanwan memba blong famle i droem wan pikja blong wan frut we hem i laekem tumas. Afta long biaen blong pepa ia, wanwan man i save raetem olsem wanem gospel i blesem laef blong olgeta. Afta yufala i save toktok tugeta abaot ol wei we yufala i save serem gospel wetem ol fren mo neiba.





Kamil blong Niu Yok Siti

Kamil we i gat naen yia i gat plante fren. “Samting we mi laekem tumas abaot ol fren blong mi, hem i we olgeta evriwan i defren,” hem i talem. “Oli kam long ol defren ples, mo oli gat ol defren wei blong mekem samting.” Kamil i laekem tumas blong lanem ol gudfala samting long ol fren blong hem, mo hem i laekem blong serem ol samting wetem olgeta. Nambawan samting we hem i oltaem wantem serem wetem wan fren, hem i gospel.

Ol singsing we mi laekem tumas oli “Mi Pikinini blong God” mo “Famle I Save Stap Tugeta blong Oltaem.” Skripja we mi laekem tumas, hem i Doctrine and Covenants 19:23; Lod i talem blong lanem long Hem, mo lisin long ol toktok blong mi; wokbaot folem smol voes ia blong Spirit, mo bae yu save gat pis long Hem. Skripja ia i oltaem mekem mi glad taem mi sore.

Afta we hem i bin serem fas toktok blong bilif wetem fren blong hem Yailin, Kamil i in-vaetem famle blong fren blong hem blong mitim ol misinari. Kamil i bin tijim Yailin olsem wanem blong prea tu. Naoia Yailin mo mama blong hem oli memba blong Jos.

Fren blong mi Yailin i bin kasem baptaes long 2011. Mi laekem se mifala i save go tugeta long jos.

Mi stap helpem hem blong lanem baehat ol Toktok blong Bilif. Mifala i stap wok long nambanaen toktok blong bilif.





Mama mo papa blong mi oli blong Dominiken Ripablik. Ating hemia nao from wanem mi laekem tumas blong kakae raes mo ol bin mo jiken. I mekem mi mi tingbaot ples we famle blong mi kam long hem.



I gat faef man long famle blong mi. Sista blong mi, Emili, we hem i kasem baptaes mo konfem long Disemba. Brata blong mi, Vikto, hem i karem nem blong papa blong mi. Mi no bin gat wan animol blong lukaot yet, be mi stap tingting blong karem wan totel. Mi laekem totel from oli naes mo oli slo, mo oli no save ronwe.



Mi laekem storian blong Kapten Moronae long Buk blong Momon. Papa blong mi i bin ridim long famle haos naet, mo inspiresen i kam long mi blong mekem wan flag blong miwan. Flag blong mi i rimaenem mi long huia mi mo we Papa long Heven i stap oltaem wetem mi.

PEJ BLONG YUMI



Papa mo Mama blong mi i bin tijim mi gospel mo oli bin ol gud eksampol long mi stat long taem we mi bin smol. Mi bin lanem blong ridim ol skripja stori blong ol pikinini, mo naoia mi lavem Buk blong Momon. Mi bin ridim evri dei, miwan mo wetem famle blong mi. Amon i man we mi laekem tumas insaed long Buk blong Momon. Hem i bin wan gudfala misinari, mo hemia nao wanem mi wantem blong kam taem mi kam bigwan.

Esteban M., 8 yia, Kolombia



Taem famle blong mi i bin go spel long Panama, kantri blong mama blong mi, papa mo mama blong mi i bin tekem smol sista blong mi, Yoalibet, mo mi i go blong visitim Panama Siti, Panama Tempol. Mama blong mitufala i karem mitufala blong tajem wol blong tempol. Afta, taem mi bin talem long mama olsem wanem mi bin filim glad taem we mifala i bin stap long tempol, hem i bin talem long mi se mi bin filim Tabu Spirit.

Serjio B. Junia, 7 yia, Florida, YSA



Pasa Z., 9 yia, Ukrein



Taem we Letisia C., 6 yia, i bin gat 3 yia, taem we wok blong bildim Kuritiba Bresil Tempol i fins. Hem i laekem tumas blong go long tempol, mo go evri dei blong las wik blong openhaos. Hem i laekem tumas yet blong visitim tempol mo wokbaot tru ol naesfala garen. Letisia i laekem tumas tu blong dro mo swim.



PRAEMERI: FOLEM JISAS

Morisio D., 11 yia, hem i laekem sakramen miting from hem i lanem abaot Papa long Heven mo Jisas Kraes. Hem i laekem blong go long jos from hem i save gat gud taem mo hem i intresting mo i naes tumas. Hem i glad tumas long Jos mo gat plante fren.



Taem mifala i stap rere blong graonbreking blong Tijuana Meksiko Tempol i tekem ples, mifala i bin glad tumas. Mifala i bin go olsem wan famle blong givim seves. Mifala i klinim ples we tempol i stap long hem. Mi save se Lod bae i visitim haos blong Hem taem bae i finis.

Jisas S., 6 yia, Meksiko



Bảng Khắc Bảng Vàng

Stap stadi ol skripja i helpem mi blong
jusum raet.

**"Ol Gol Plet," i kam long P. Tuyet Hoa,
10 yia, Kambodia**




Mi jusum raet taem mi folem Papa long
Heven mo Jisas Kraes.

N. Ti Linda, 8 yia, Kambodia



Mi laekem blong go long jos
wetem famle blong mi mo
lanem abaot Jisas Kraes. Long
hom, mi laekem blong rid mo
lanem ol skripja stori, singsing
ol hym, mo pleplei ol gem long
taem blong famle haos naet.
Gospel i blesem famle blong
mi mo mekem mi filim glad.
Mi bin givim finis wan Buk
blong Momon long tri skultija
mo long bes fren blong mi,
Migel. Praemeris singsing we
mi laekem tumas hem i "We'll
Bring the World His Truth" [Bae
Yumi Karem Trutok blong Hem
I Kam long Wol] (*Children's
Songbook*, 172 long Inglis).

Martim P., 6 yia, Portugal



Pat we mi laekem tumas long
Buk blong Momon, hem i storian
blong Nifae mo wokbaot blong
olgeta we i oli krosem ol solwora.

Keli C., 10 yia, Filipin



Yumi nid blong sil long tempol,
blong yumi save stap olsem wan
famle blong oltaem.

Sana C., 8 yia, Filipin




Henrike S., 7 yia, Brasil


Jisas I Blesem Oi Pikinini blong OI Man blong Nifae

I Kam long Jan Pinborog

Oi Magasin blong Jos

Plante man i bin kam tugeta
raon long Jisas. Oli wantem
blong harem Hem i talem ol
stori. Oli wantem blong harem
Hem i tij abaot heven.





Taem ol pipol oli sik, Jisas i bin hilim olgeta. Hem i bin hilim ol man we oli no save lukluk. Hem i bin hilim ol man we oli no save harem samting.



Wan dei sam man i bin karem ol smol pikinini i kam blong luk Jisas. Oli binwantem Hem blong givim wan blesing long ol pikinini blong olgeta. Ol disaepol blong Jisas i bin talem ol man blong no stap distebem Jisas. Oli i bin ting se hem i bisi tumas.

Jisas i no bin bisi
tumas. Hem i bin
talem long ol disaepol
blong lego ol pikinini
i kam long Hem. Hem
i talem se kingdom
blong heven i blong
ol man we oli olsem
ol smol pikinini.



Jisas i lavem evri pikinini. I nomata yu huia, yu luk olsem wanem,
o yu stap wea. !Jisas i lavem yu! ■

Long Mak 10:13–16



Jisas I Blesem Ol Pikinini blong Ol Man blong Nifae

Nao hem i putum han blong hem i goraon lng ol pikinini ya, mo i putum han blong hem long olgeta, i blesem olgeta (Mak10:16).

MI SWEA . . .

I kam long R. Val Jonson
Ol Magasin blong Jos

Kaen lukluk ia we i stap long fes blong Mama blong mi, i brekem hat blong mi. Hem i sek. Wari. Harem Nogud. Ol samting ia i bin fulumap ol ae blong hem wan afta narawan mo afta i mekem hem i harem nogud bigwan.

Nomata ol tijing blong hem long mi kasem we mi gat 15 yia blong gat hona long Papa long Heven long ol toktok mo wok, mi stanap i stap, harem nogud long wan rabis toktok we mi mestem i kamaot long maot blong mi.

Mi no bin minim blong swea. Bifo long yia ia, mi neva yusum ol rabis toktok. Be long sama ia mi bin wok blong Gem Fising Dipatmen long Yuta mo pikmap sam fasin blong ol narafala boe we i stap wok tu wetem mi.

Wok blong mifala we mifala i stap mekem oltaem i blong katemaot ol rabis gras long saed blong ol rod. Mifala i bin disaed kwik se *Arctium minus* (*Aktium Maenes*) i wan rabis gras we i spesel lelbet. Hem i gro long wan hip long eniples, mo i kavremap eni narafala plan. Ol nil blong hem i stikim eni samting we i fas long hem.

Wetem ol savel long han, mifala i traehad blong karemaot ol gras ia long ful sama kasem we mifala i taed gud—mo wetem rabis toktok. Long fastaem mi bin faenemaot se ol toktok blong olgeta i oraet nomo. Afta mi stat blong akseptem. Long en, mi stat yusum. I kam long en blong sama, Ol swea toktok i fas gud long ol toktok blong mi olsem ol nil blong gras ia we i fas long hea blong dog.



*Ol toktok blong
swea i fas gud long
ol toktok blong mi
olsem ol nil blong
gras ia we i fas long
hea blong dog.*

Aksen blong mama from mi mestem toktok blong mi, i givim strong tingting long mi se mi nid blong jenis.

Hem i no bin isi. Blong swea i no wan joes nomo blong ol toktok. Hem i wan fasin tu blong tingting. Ol storian we yumi letem i kam long ol laef blong yumi, ol toktok we yumi ridim, mo ol pikja we yumi luk i jenise tingting blong mifala.

Wetem fasin blong talem tangkyu, mi bin aktiv blong atendem jos mo seminari. Fasin blong swea i karem i kam plante hae tingting, be from mi stap long wan ples we i isi blong fas wetem olgeta we oli gat hae tingting, i mekem se ol rus i gro bakegen. Mi bin tingting strong blong ridim olgeta skripja evri dei mo stap prea. Mi no bin watjem ol muvi mo televisen program we i save soem bakegen ol tingting blong tudak.

Slo slo, mi luk se lanwis blong mi i stap kam moa gud. Long en blong yia ia, mi bin kamaot long fasin ia blong stap wea.

Afta long eksperiens ia, mi bin lanem plante abaot paoa blong ol toktok. Ol toktok i save statem wan samting o i save smasem gud. Oli save mekem man i harem nogud, o oli save hilim man. Oli save spolem nogud man, o oli save ol planem ol sid blong hop mo lav.

Mi luk hemia i interesting se Sevya Hemwan, we i Krietem heven mo wol, oli lukluk long hem olsem ol Toktok (luk Jon 1:1–4 D&C 93:6–11).

Mi bin lanem se fasin blong swea i gat ol stret mining semmak olsem hemia we i no stret. Mifala i swea blong talem trutok long wan kot loa. Mifala i promes, o swea, blong kipim ol komanmen blong God taem yumi kasem baptaes. Semmak, yumi mekem ol tabu promes blong kipim ol tempol kavenan blong mekem se yumi save kasem ol bigfala blesing long Papa long Heven.

En blong stori i olsem: Yumi kam moa olsem Toktok ia taem we ol toktok blong yumi i givim hona long Hem mo i soem glori blong Hem. ■



PIKA | KAM LONG ROBERT T. BARRET

DEVED O. MAKEI

Deved O. MaKei i bin gro i kam antap long **fam blong famle blong hem** long Hansvil, Yuta. Hem i laekem ol animol mo lukaotem ol **hos** truaot long laef blong hem. Taem hem i go long wan misin long Gret Briten, hem i faenem wan **toktok** we afta i bin kam moto blong hem: "Nomata wea ples yu stap, mekem gud pat blong yu." Hem i bin gobak long Gret Briten plante taem mo dediketem **London Ingla Tempol** long 1958.



“**O**lsem ol papa mo mama, mo ol lida, yumi nidim blong helpem ol yut, i no blong rere from wan fultaem misinari seves, we i stap sam manis nomo, be tu, blong oli mekem mo kipim ol kavenan blong tempol, we i stap blong taem we i no save finis. Ol fas step i stat long taem we wan i smol pikinini.” Luk long “Ol Yangfala mo Ol Kavenan blong Tempol,” pej 18. Stori ia, wetem ol narafala storian insaed long magasin ia i save helpem ol memba, ol yangfala, mo ol olfala blong oli rere gud moa blong serem mo laef folem gospel.

JOS BLONG
JISAS KRAES
BLONG
OL LATA-DEI SENT